

XTIIDZ NDZON DIOS MIÑE PQUIAA MATEW

¹ Jesús meñ ne pxeel Dios ga, lo xtii Abraham, lo xtii David, ga brieequia me. Lëë grë xmenḡoldoo me nu:

² Abraham goc pxoz Isaac,
Isaac goc pxoz Jacob,

Jacob goc pxoz Judá (bio zla xpëed Jacob),

³ Judá goc pxoz Far ni Zar (Tamar brieelë tsiel Judá),

Far goc pxoz Srom,
Srom goc pxoz Aram.

⁴ Aram goc pxoz Minadab,
Minadab goc pxoz Naasón,
Naasón goc pxoz Salmon.

⁵ Salmóngoc pxoz Booz (Rahab brieelë tsiel Salmon),

Booz goc pxoz Obed (Rut brieelë tsiel Booz),
Obed goc pxoz Isaí.

⁶ Isaí goc pxoz rey David,
David goc pxoz Salomón (lëë Salomón ga gop tsiel Urí wnaa ne bionie David).

⁷ Salomón goc pxoz Roboam,
Roboam goc pxoz Abí,

Abí goc pxoz Asá,

⁸ Asá goc pxoz Josafat,
Josafat goc pxoz Joram,

Joram goc pxoz Uzí.

⁹ Uzí goc pxoz Jotam,

Jotam goc pxoz Acaz,
Acaz goc pxoz Ezequí.

¹⁰ Ezequí goc pxoz Manasés,
Manasés goc pxoz Amón,

Amón goc pxoz Josí,

¹¹ Josí goc pxoz Jeconí (bio zla xpëed Josí).

Leñ dze ne nac Jeconí mëed, leñ dze co güeybee
zhoo zha Babiloin grë zha Israel, beynie zho zho
Babiloin.

¹² Babiloin, ga gol tib xpëed Jeconí brieelë Salatiel,
Salatiel goc pxoz Zorobabel.

¹³ Zorobabel goc pxoz Abiud,
Abiud goc pxoz Liaquim,

Liaquim goc pxoz Azor.

¹⁴ Azor goc pxoz Sadoc,
Sadoc goc pxoz Aquim,

Aquim goc pxoz Liud.

¹⁵ Liud goc pxoz Leazar,
Leazar goc pxoz Matán,

Matán goc pxoz Jacob.

¹⁶ Jacob co nagon goc pxoz José, meñ ne ptsieelnia
Marí.

Marí goc xníaa Jesús, Meñ ne nacle diidz ga cxeel
Dios guiaad lo guidzliu.

¹⁷ Zig choopchop bdziñ lo dii co, dzigoraa brie-
quia Jesús. Tsiida zho wban desde Abraham haxta
David; stsiida zho wban desde Salomón haxta leñ
dze ne bey zho Babiloin; stsiida zho wban desde
leñ dze co haxta bdziñ dze ne goc me mëed.

Gol Jesús

(Lc. 2:1-7)

¹⁸ Znu bzhaac Marí grop José leñ dze ne zi-
aadyob gal Jesús. Gard ctsieelnia Marí loxaque

xtiidz me no ne laa me ycaa José, zeene bnabey Espíritu Sant pquialo tib mēēd zdoo me. ¹⁹ Zeene bien Joséw, miñe been me gocladz me mazd nsaan me Marí; sac sca rnabey ley ni zienalpaa me miñe rnabey ley; per laa me gocladz zhlianse nzozit me, sacne racladz me nriee xquielto Marí. ²⁰ Zhgab co no me, tibaque blulo tib xanj Dios lo me lo mcaal.

—José (xiag David) —rēb anjl co—, peet tsienied guic luu, pcaania Marí gac me tsiel luu; sac gon mēdyeen ne zoney me ga, Espíritu Sant bnabey pquialo win zdoo me. ²¹ Zeene gal dze ne laa win gal, JESUS cueelē luu win, sca grieelē win sac win csilaa grē menladz win lo dol.

²² Ga briequia miñe bnee Dios padzeela, zeene bzeet zha ne biadnee xtiidz mew, rēb zho:

²³ Bii zan to ganle zeene laa tib mēēdbgui yquiaalo zdoo tib wnaayeen ne gard gnee mgui lo.

Zeene laa win gal, Emanuel grieelē win.

(Emanuel nac zig nacne rnee ne: Dioszhal ziaad lo ne.)

²⁴ Zeene bna José laa guic me goc tibli; bin me xtiidz anjl co laa me ptsieelnia Marí. ²⁵ Laa me wban tipse grop me per ib bgaald me Marí, haxta bded dze ne laa mēdyeen co gol. Bdziñ dzew, laa win gol, dzigo bleelē José win JESUS.

2

Güeygan bla zha rac Jesús

¹ Tib guiedz win ne ndxie xtan Judé lē Belén, ga gol Jesús. Lēetse len dze co zob men ne lē Herod nac me rey ne rnabey dan co.

Goc palal dzew, laa bla zha ne runbey lo mel ziaad nēz ne rlan ngbidz bdziñ Jerusalén, ²bnabdiidz zho rēb zho:

—¿Pa lo dieñ no mēēd ne gac meñ ne gnabeyladz to nu, mēēd ne griiñ gol ga? Bdzioñ no tib mel nēz ne no no, mel co blu lo no laa win gol-le, miñ co ne ziaad no nu ziaaddziañ no win.

³⁻⁴ Grē meñguiedz Jerusalén, zeēne bin zhow bzee zdoo zho. Laa Herod, rien draa me zha gun me, bnabey me pcaalsa grē zha ne nac pxoz non, grē zha ne rseed miech ley, bnabdiidz me lo zho dieñ pa lo nac diidz gal Meñ ne nole diidz cxeel Dios guiaad lo guidzliu ga. ⁵ Dzigo rēbchaa zho lo me:

—Belén, guiedz ne ngab Judé ga none gal meñ co, sac scale zhobnee lo guits ne pquiaa zha ne pxeel Dios padzeela biadteed xtiidz me, zeēne psiaab me guic zho znu bnee zho:

⁶ Tel Belén,
niicle ne winraaw lo grē guiedz ne ngab Judé, per nroob nona;
sac gon ga grieequia tib meñ ne gnabey,
meñ ne so yquiaanap grē meñ Israel, ne nac zho zha ne ngab lo naa.

⁷ Nacne zhliaanse bnabey Herod gocredz gza zha rac co, bnabdiidz me lo zho dieñ blapaa dze rac psilo gon zho blan mel co.

⁸ Blozhse ga, dzigo pxeel me zho Belén, rēb me lo zho:

—Ga goltsie goltsieguib mēēd co. Zigne gdziel to win, goltēniegash diidz lo naa nu, zeēna ye naa ga gagan naa win.

⁹ Blozhse sca pso me diidz lo zho, laa zho bio nēz stib laa zho zie. Laa mel ne goṅ zho brieequia nēz ne ziaad zho ga, laa ma neraque lo zho; haxta bdziṅ ma ngali guic yu ne no mēdyeeṅ co, gataa laa ma blēz.

¹⁰⁻¹¹ Zeēṅe goṅ zho laa mel co blēz ga, per nli rley zho. Bzēēb zho leṅ yu co, goṅ zho laa mēdyeeṅ co no ga grop xniaa win, dzigo pquitsgzhīb zho lo win, bnee zho tib xtiidz zho lo win. Blozh ga blee zho ncuaaṅe zienie zho lo win, blee zho or, blee zho tiblo yaalnex, ni tiblo nceit nex rnee zho mirr, bgad zho lo win.

¹² Zeēṅe laa gza zha rac co wbi Belén, laa ne nieted zho Jerusalén, stible nēz bzheṅ zho zey zho; sac bnee Dios lo zho lo mcaal, rēb me tsienied zho diidz lo Herod.

¹³ Laa gza zha rac co zey, zeēṅe güeylulo tib xanjł Dios lo José lēētse nixguies me, rēb anjł co lo me:

—José, na zeēṅa guche i pcaanie mēdyeeṅ qui nēz grop xniaa win, golsē nēz Egipt, sac laa Herod yquiaguib win gut me win. Egipt, ga cuēznie to win, na naaque guialnie diidz lo to zeēṅe laa to ghi ga.

¹⁴ Guieel cogazh guche José, pcaanie me mēdyeeṅ co nēz grop xniaa win, laa zho ziese nēz Egipt; ¹⁵ ga blēz me haxta bdziṅ dze ne laa Herod gut. Ga brieequia miṅe bnee zha ne biadteed xtiidz Dios padzeela, zeēṅe znu bnee zho: “Nēz Egipt no xpēēd naa, zeēṅe bredz naa me.”

Bnabey Herod gut grē mēēdlas

¹⁶ Laa zeēṅe goṅ Herod wbiredraa gza meṅ rac co nienie zho diidz lo me, per nli blēē me. Ntseeb rac me, pxeel me zha ne güey Belén ni grēraa

guiiedz ne ndxie gax ga, güeygut zho grëse mëëdbgui yeen ne no grë guiedz co, desde win ne golnëz, haxta win ne rap chop iz. Tibaque nañ me sca ngaa mëdyeen ne nac Jesús ga niët win, sac blee me cuent zhile gac chop iz psilo gon gza zha rac co blan mel co. ¹⁷ Guielñëdox ne bio grë miech co, ga briequia miñe bzeet Jeremí meñ ne biadteed xtiidz Dios padzeela, zeene znu rëb me:

¹⁸ Tib redz nroob ne zëëb leñ guiedz Ramá.

Grë wnaa Judá, zha ne ziaad lo xtii Raquel, mbanse rac zho, roon zho no zho xquieñë xpëed zho;

zha rna zha ne cchoobladz zdoo zho, sac laa xpëed zho gut.

¹⁹ Goc palal dzew laa Herod gut, dzigo pxeel Dios tib xanj l me güeynee lo José lo mcaal zaatne no José nëz Egipt, rëb me lo José:

²⁰ —José, guche i, pcaanie mëdyeen qui nëz grop xniaa win, golbire nëz Israel stib; laa zha ne quiana l win ga gutle.

²¹ Dzigo brieenie José mëdyeen co ga grop xniaa win, bio me nëz laa me wbire zeynie win nëz Israel. ²² Per zeene bin José lëëque tib xpëed Herod meñ ne lë Arquela, meñ co biaan xlugar Herod zobnabey xtan Judé, bdzieb José ndziñnie me mëdyeen co nëz co. Dzigo bneeque Dios lo me lo mcaal tsie me nëz Galilé.

²³ Gol zho Galilé, bdziñaque zho guiedz Nazaret, ga wbannie zho mëdyeen co. Ga briequia miñe bzeet grë zha ne biadteed xtiidz Dios padzeela, zeene rëb zho: meñ Nazaret guiab miech nac Jesús.

3

Psilo Juan Bautist noseed me miech

(*Mr. 1:1-8; Lc. 3:1-9, 15-17; Jn. 1:19-28*)

¹ Leñ dze ne psilo Juan Bautist noseed Juan miech xtan zha Judé, dan zit ne no me ga; ² rnee me lo zho:

—¡Gołsaan xquiełntseeb to, gołnab lo Dios guñ me to perdon grëtaa doł ne ziyuñ to; sac goñ laa dze bdziñle laa me csilo gnabey!

³ Lëë Juan Bautist ga bzeet profet Isá, zeene znu pquiaa me:

Bii zon miech ganle zeene laa tib tsi men zëeb tib dan zit, rnee me:

“Gołzhixcuaa nëz ne ted men ne rnabey, gołsaan grë guiełntseeb ne ruñ to.”

⁴ Niapse guits lad camell niaa xab Juan, guid nac ncuaane ndxie leñ me, ni niapse nguzhanch ni dzin dan row me.

⁵ Nzian grë menquiedz Jerusalén, grë men Judé, grë men ne no gax ro guiubee Jordán, rree zho riequiaadiag zho zhiwseed me. ⁶ Grë zha ne rxobdoł grëse xtoł zho, dzigo rchoobnis me zho ro guiubee co.

⁷ Laa zeene ran me grë zha farisé, zha saducé ne rdziñ lo me ga racladz zho ye zho chobnis, dzigo rnee me lo zho:

—¡Miech ngoopdoł, masaque nac to zig nac meel! Nan to na lëë, loxaque chobnis to laa to laale lo grë guiełnëdox ne ziaadyob. ⁸ Led scada goñ, none zaacse gban to zeena glu nli dib zdoo to psaan to grë xquiełntseeb to. ⁹ Ni gacniatsde to guiab to loxaque por nacse to xtii Abraham, laa Dios csilaale to; sac gneli naa lo to ganle telne gacladz

Dios, haxta grë quie zac gnabey me tsaalow miech ne gac zha xtií Abraham. ¹⁰ Nanle to ganle, grë yag nex, zeene rquiad nex low led rruga, rlozh ga rliaala lo gui, ga reca. Scadaa nagon gdieelo miech ne gband zigne racladz Dios, sac rrieequia laa me nzhenle xquiibyag me cchug me yag ne sca nac.

¹¹ 'Nli tib wrobnisse nu rnedz naa lo to, nac-sew zig tib señ, sac lëë gdib rluw laa to psaan xquieintseeb to, laa to bzëëb xnëz Dios. Sangué men ne no guiaad ga, mesi Espíritu Sant gdeed me lo zha ne gliladz me; ni scagaa zha ne gliladz me, sonëz me zho zaatne nitlo zho. Ne nligaa tib men non nac me, tel naa peet nond naa, per ni par tib ngundziin ne glit lab me raguiald naa gac naa. ¹² Laa me guiaad zig tib zha ne rbeeguizh zhobxtil, sac zha co rlozhse runmbe zho zhob, rgotsow zhow, laa paj rielaal zho lo gui, ga reca. Per gui ne gzëëg grë paj ne guiadbee me ga, gdziind dze guiuuw.

Brobnis Jesús

(Mr. 1:9-11; Lc. 3:21-22)

¹³ Len dze co brieé Jesús nëz Galilé zie me nëz ro guiubee Jordán, laa me zie par cchoobnis Juan me. Bdziin me ¹⁴ nëd Juan cchoobnis Juan me, rëb Juan lo me:

—Lëda i gon, naa none guial lo luu cchoobnis luu naa.

¹⁵ Dzigo rëb me lo Juan:

—Nli scaw, per mazd pchoobnis naa, sac gon ib nonguiela dziuun ne miñe rnabey Dios.

Dzigoraa pchoobnis Juan me. ¹⁶ Laa me zieriee lo nis zeene laa zhan gbaa bzhial, gonpaa me zig rlu

tib palom rlu Espíritu Sant laa me ziad-zëeb bdzin me guic me, ¹⁷ ni blu zëeb tib tsi meṇ co nëz gbaa rnee me:

—Xpëed naa gon nac meṇ qui, rleynie naa me, meṇ nziuu nac me lo naa.

4

Gocladz meṇdox niuṅüet ma Jesús

(Mr. 1:12-13; Lc. 4:1-13)

¹ Zeene blozh brobnis Jesús, dzigo güeynie Espíritu Sant me tib dan zit, zaatne guiend miech; ga gocladz meṇdox niuṅüet ma me niuṇ me miṇe racladz ma.

² Zeene goc choo ngbidz choo guieel no me dan co ni tib lë peet rowd me, laa me pcaabedz ³ hor co bdzin meṇdox zaatne no me ga, rëb ma:

—Telne nli Xpëed Dios nac luu, bnabey tsaalo grë quie rii ncuaaṇe gow luu.

⁴ Dzigo pquiab me rëb me lo ma:

—Znu zhobnee lo Xtiidz Dios: “Niapse por xtiidz Dios mban miech, yquiamband zho loxaque guielwagwse.”

⁵ Blozh ga güeynie ma me Jerusalén, blep ma me glaa guic yadoo nroob ne zob lad guiedz co, ⁶ rëb ma lo me:

—Telne nli Xpëed Dios nac luu, bringaa nu, benque led znu zhobnee lo Xtiidz Dios: “Znabey Dios grë xanjl me yquiaanap luu, zha queedz luu, zeena ni tib quie ycaand ni luu.”

⁷ Pquiab me rëb me lo ma:

—Psoladz ganle, noque stib zaatne znu rnee lo Xtiidz Dios: “Bien, Dios nac meṇ ne rnabey luu,

nodne quitnie luu me gnab luu lo me ncuaane nod guṇ me.”

⁸ Blozh ga bii güeynie ma me glaa tib guic gui, ga blu ma grëse guiedz ne ndxie dib lo guidzliu lo me, ni blu ma grëse ncuaan ndaan ne rap tib tib guiedz co, ⁹ rëb ma lo me:

—Bui ganle, grëse ncuaan qui goṇ gnedz naa lo luu telne squiitsgzhìb luu lo naa niina, guṇnon luu naa.

¹⁰ Horco pquiab me rëb me lo ma:

—jBiche lo naa nu menḁox! Znu goṇ zhobnee lo Xtiidz Dios: “Diosse nac meṇ ne rnabey, mese none guṇnon luu, lo me rieguial yquiitsgzhìb luu; ni miṇe rnabey me miṇ co none guṇ luu.”

¹¹ Dzigoraa biche ma lo me, dzigo bdziṇ bla anjl bdeed zho ncuaane dow me.

Psilo Jesús pseed me miech nëz Galilé

(Mr. 1:14-15; Lc. 4:14-15)

¹² Zeene bin Jesús laa Juan biab ladzguiib, dzigo brieeme me ga güey me nëz Galilé, guiedz ne lë Nazaret.

¹³ Zhisaque goca, brieequeme me ga güey me Capernaum tib guiedz ne ndxie gax ro Nisdoo Galilé, zaatne nac xtan zha xtii Zabolón ni zha xtii Neftalí.

¹⁴ Ga brieequia miṇe bzeet Isá (meṇ ne pxeel Dios padzeela biadnee xtiidz me), zeene psiaab Dios guic Isá rëb Isá:

¹⁵ Grëse menzit ne ndxie xtan Galilé, nëz dan ro guiubee Jordán, gax ro Nisdoo Galilé, zaatne goccheṇ Zabolón ni Neftalí;

¹⁶ miech ne no lo ncow nac zho, per niina tib biini nroob biab lo zho. Ladzniale guielgut no zho,

per laa biini co biab lo zho par grieë zho ga.

¹⁷ Ga psilo Jesús pseed me miech, rnee me lo zho csaan zho xquie_lntseeb zho, gbig zho lo Dios, sac laa dze ne csilo gnabey Dios ziaadgaxle.

Bredz Jesús tap ngoozme_l
(Mr. 1:16-20; Lc. 5:1-11)

¹⁸ Le_n dze co, tib dze zieded Jesús gax ro Nisdoo Galilé go_n me chop ngoozme_l, tib zho lë Simón Pedr, stib zho lë Ndrés; grop bets zho lëëtse laa zho noro_n guie_x ne rgaa me_l lo nis. ¹⁹ Dzigo bredz me zho, rëb me lo zho:

—¡Goltë go_ltëna_l zhits naa! ¡Laa naa cxel_l to tsie to stib gooz, tsietop to grë miech ne sëëb xnëz Dios!

²⁰ Horcogazh psan_n zho guie_x ne rgaa me_l ga, laa zho ziena_l zhits me.

²¹ Zhisaque bzë me ro nis co, go_n me laa Jacob ni Juan (lëë grop xingan me_n ne lë Zebedé ga) no tib le_n barcw gza pxoz zho, noquiaabdie zho guie_x ne rgaa me_l; dzigo bredz me zho. ²² Zigne bredz me zho biaan_nieque pxoz zho barcw ga, laa zho ziena_l zhits me.

Zëëb diidz grë_taa milagr ne ru_n Jesús

²³ Dipse xtan zha Galilé, guiedz ne rdzi_nt_taa Jesús rie me grë yadoo ne zob lad guiedz co rseed me miech Xtiidz Dios, rnee me lo zho zha racladz Dios gban zho, ni ru_nguiac me grë me_n rzacnë, tel_l pe guiel_lguiidztaa rzac zho.

²⁴ Tel_l pa lotaaw zëëb diidz scataa ru_n me grë milagr, haxta nëz Siria bin miecha. Nzian grë me_n co brieë ga bdzi_nnie zho grë zhimguidz zho lo me: no grë me_n rzacnë co noguitnie me_ndox, no zho rlan guiel_lguidz gutye, no zho gutoo dipse xcuerp,

no zho rlan grë pe stib guielguidz, nogaa zho rlan grë pe yoob; grëse zho beenguiac me zho. ²⁵ Zaatne zieetaa me, miech guizhiu ne naļ zhits me, grë zha Galilé, grë zha Decápolis, grë zha Jerusalén, grë zha Judé, haxta grë zha ne no stib nêz ro guiubee Jordán.

5

Cho nac zha ne wen zie (Lc. 6:20-23)

¹ Tib dzew, gon Jesús laa grë miech guizhiu co bdziņ lo me, dzigo bzoquia me glaa tib guic gui win. Ga zob me, bdziņ grë xpëedscuel me lo me, ² dzigo psilo me pseed me zho, rëb me:

³ —įWen zie zha ne rien ib none gbig zho lo Dios, sac ib zdziņ zho zaatne rnabey me!

⁴ ’įWen zie zha ne mban rac roon niina, sac schoobladz Dios zdoo zho!

⁵ ’įWen zie zha ndooladz, zha ne zienie guic gban zigne rnabey Dios, sac scaania zho guidzliu ne gdeed me lo zho!

⁶ ’įWen zie zha ne racladz gun grë miņe rnabey Dios, rzac zhow zigne rzac zha ne rcaabedz, zha ne rnabгаа zhis, sac ible zacnie Dios zho parne grieelo gun zhow!

⁷ ’įWen zie zha ne rquia zdoo miech, sac zigne rquia zdoo zho samiech zho scaque Dios squia zdoo me zho!

⁸ ’įWen zie zha ne mbele zdoo, zha ne biaanmbele lo xtoļ, sac zaņlo zho Dios!

⁹ ’įWen zie zha ne noxco zaacse gban miech, tiļd zho, sac masaque mëed gac zho lo Dios!

¹⁰ 'iWen zie zha ne loxaque porne quiayun zho mine rnabey Dios, rquianał miech zho, sac ible zdziñ zho zaatne rnabey me!

¹¹ 'Zig nac to, zeene csilo grē miech yquiaago zho to, ctsidil zho to, yquiadiidzguizh zho to loxaque ne rliladz to naa, iwen zie to ga! ¹² iNley golco zdoo to, nguieel golgac, sac gon tib guielnzaac nroob ne gneedz Dios lo to! Golsoladz ganle, scaque been zho grē zha ne pxeel me padzeela biadnee xtiidz me.

Nac to zig nac zed, zig nac biini
(Mr. 9:50; Lc. 14:34-35)

¹³ 'Masaque nac to lo guidzliu rii zig nac zed. Nanle to ganle pa lotaa rquiin zed, per telne nzhida, ¿pa dien rquiina? iLëë gdib rliaala lo guizh, zaatne rded rzē miech rzëeni zhow!

¹⁴ 'Nac to zig tib biini ne noziini lo guidzliu. Grieelod tsongueets to, sac tib guiedz ne ndxie glaa tib guic gui, grieelod tsongueetsa. ¹⁵ Golguien ganle nacd biini parne tsolana, sinque parne gzi-iniw lo grē miech ne no len yu. ¹⁶ Zaacse sca golgac, mine rquiin min co golgun, masaque lëew gac zig tib biini; zeena zeene gan miech biini co zien zho ganle pa lotaa men nroob nac Pxoze to men ne no gbaa.

¹⁷ 'Guiabde to togo bod laa naa zial zialtichee naa ley ne psan Moisés, o grëgaa mine bnee zha ne biadteed xtiidz Dios padzeela; sac led mincod zial naa, sinque laa naa zial gun naaw zigne no gaca.

¹⁸ Gneli naa lo to ganle: Laga niaa guidzliu rii, laga niaa gbaa, ib none gac mine zhobnee lo ley, mine bneegaa zha ne biadteed xtiidz Dios, ni tib lë paat gdzëeda. ¹⁹ Gacxe waa zha ne quiits tib ley niicle

mine mazdraa wina, ni cseed zho miecha zigne run zho ga, ib tedsod zha nac zha ne mazdraa win guiaan lo grë zha ne yгаа заатне rnabey Dios. Saṅgue zha ne guṅa zigne rnabeya, ni cseed zho miech scaque tsienal zhow, zha cosi nroob gacnon zho lo grë zha ne gdziṅ zaatne rnabey Dios.

²⁰ 'Rso naa diidz lo to sca, zaacse golgac gunde to zigne run grë maistr ley, grë zha farisé; sac telne tsoxcode to gban to zigne racladz Dios, grielod gdziṅ to zaatne rnabey me.

Nodne gut miech

(Lc. 12:57-59)

²¹ 'Led nanle to ganle, no tib ley ne biaan lo xmenḡol to padzeela, rneew: "Gute luu samiech luu"; rnabeya zha ne gut samiech, ib none guetaque zho, quizhgazh zho dol co. ²² Sca rnee ley co, per zig nac zha ne gon në rac zdoo ran samiech, rrieequia beetle zho ga, ye zho riegual quizh falt co. Zig nac zha ne gnee pe tib diidznë lo samiech, none gacredz zho lo wxtis zeena guṅquizh zho zho dol co; zha ne quiegaa samiech, lëëque zha rguib guey zho gabil ga.

²³ 'Gacxe waa tel ziesan to tib gon, per lo pcoogle zo to rsoladz to rdilnie to tib samiech to, ²⁴ gase golsan gon co, goltsie goltsienabgazh perdon lo zha ne rlëë to lo ga, gbireraa to dzigo gdeed to gon co.

²⁵ Zha ne sca rlëënie to, goltsoxco pront golguiaan wen; zeena tsiezod zho to lo wxtis, sac tel laa zho tsiezo to lo wxtis ib znabey wxtis tso to ladzguib.

²⁶ Gneli naa lo to ganle grieede to ga, haxtaque lozh quizh to grë dimi ne gnab wxtis lo to.

Nodne tsonie miech zha ne led tsieeld zho

²⁷ 'Nanlaque to ganle zha rnee stib ley ne biaan lo xmengol to, rneew: "Zha ne nole tsieel, zigtaa mguiw zigtaa wnaaw, nodne tsonie zho zha ne led tsieeld zho." ²⁸ Per zig nac zha ne gon, ran tib wnaa ni rsilo zho riogui zho tsonie zho wnaa co, laa zho bdiitsle ley co.

²⁹ 'Gacxe waa, bziaalo to mine rquiaqui runctal to xtol to, mazd golcueegazha; niicle tel bziaalo derech tow. Peet nacd nitlo tib leque xcuerp to, ledle dib nacesw tsietsobe gabil. ³⁰ Laa tel niagaa tow, mine rquiaqui runctal to xtol to, niicle tel nia derech tow, golchuggazha. Peet nacd nitlo tib nia to, ledle nitlo to len gabil dib nace xcuerp to.

Nodne csëbtsieel miech
(Mt. 19:9; Mr. 10:11-12; Lc. 16:18)

³¹ 'No stib ley znu rnee: "Mgui ne racladz csaan tsieel, zac ctso zho; totsaque gdeed zho tib guits lo wnaa, zaatne raquiet ne laa zho psaan wnaa."

³² Per gni naa lo to ganle: telne quiangobd tsieel zho stib mgui, ni rsëbtsieel zho, lëëque zha rguib ga yquianie tsieel zho stib mgui. Mgui ne ctsieelnia wnaa co, dol ga gun zho, sac gon nole tsieel wnaa co.

Nodne yquidie miech

³³ 'Ziyon to ganle zha nac stib ley ne biaan lo xmengol to rneew: "Zha ne gzeet lë Dios par glu zun zho mine bnee zho, yase zeene gdeed zho tib gona, gunгаа zho pe tib dziina, ib none gun zhow."

³⁴ Per gni naa lo to ganle: nodne sca gzeet to lë Dios, per ni gbaa nodne ne sca gzeet to, sac gon ga nac zaatne zob Dios; ³⁵ per ni guidzliu, sac lo guidzliu nac zaatne zo ni me; per ni Jerusalén, sac

ga nac guiedz nroob ne rnabey me; ³⁶ guiaabгаа to gzeet to guic to. Gun̄scade to, sac gon̄ zig nac guic to, per ni tib guitsguic to grieelod csaṅ nquits to, grieelodгаа csaṅ ngas tow. ³⁷ Gacxe waa ncuaane rgobey to zrieelo gun̄ to, gol̄guiab: “zuṅ naaw”, togo riengaa to grieeloda, gol̄guiab: “grieeeloda”; tsoḁe to dieen̄ cho gzeet to, sac gon̄ led Diosdraa rnabey miṅ co.

Nodne ctsire miech guieṅñe

(Lc. 6:27-36)

³⁸ No stib ley znu rnee: “Teṅ cuee zho tib bziaalo luu, guiaaṅd luu scase bleeque stib bziaalo zho, teṅ cueegaa zho tib lay luu, scaque been̄ blee stib lay zho.” ³⁹ Saṅgue naa laa naa rso diidz lo to gon̄, gun̄scade to; zha ne gacntseeb lo to, gacndaande to lo zho. Teṅ cap zho lo to, tiblise gol̄gac, ib guṅde to glisaeque nia to.

⁴⁰ Zha ne tsiezo to lo wxtis, ni lozh ga haxta gla zho xibiaagw to, gol̄saan güey zhow haxta xabnaṅ to gol̄deed lo zho. ⁴¹ Zeene grieequia zha ne gnabey to güey to xyo zho tib grol̄ hor, gol̄güeya, haxta tib hor gol̄tsie güey tow. ⁴² Zha ne gnabtaa pe cos lo to, gol̄deeda; zig nac zha ne ziadtiṅ, gol̄deed ncuaane ziadtiṅ zho, ctsirede to zho scase.

⁴³ Ziyonle to gan̄le no zha ne znu rnee: “Zha ne rdzieel xtiidz luu bleynie zho, scagaa zha ne rlëe lo luu, blëenie zho.” ⁴⁴ Per led scada gon̄, ṅnone zaacse gac to lo zha ne rlëe lo to! ṅZha ne rgodee to, gol̄nab lo Dios gun̄lay me zho! ⁴⁵ Zeena sca glu nli xpëed meṅ ne zob gbaa nac to. Gol̄gaṅ gan̄le teṅ me rnabey me rziini ngbidz lo grëse miech, zigtaa lo zha wena, zigtagaa lo zha ntseeba; scaque nisguie

me rsiaba rquiin zho grëse zho, rbed me dien cho ngable lo me, chogaa ngabd lo me. ⁴⁶ ¡Gase nasca golwi! Tel loxaque zha ne ndzieeldiidz to zha cose rleynie to, ¿niacxe zгаа to guielnzaac ne gdeed Dios? Haxta zha ne mazdraa ntseeb run min co. ⁴⁷ Tel loxaque zha ne nacse menlidz to, lo zha cose zaacse rnee to, ¿pe lëë guielwen ga na rlu to? Haxta zha ne runbeyd Dios run min co. ⁴⁸ Goltoxico sca ndzinli golgac, zigne rleynie PxoZ to (men ne zob gbaa) grëse miech, scaque none gun to.

6

Zha ne run xyudar samiech

¹ Zeene gun to xyudar samiech to, ib gunde to zaatne ndxiepaa miech ga so to glu to xquielwen to, par gan zho mine run to. Telne sca gun to, ygaade to guielnzaac ne gdeed PxoZ to men ne zob gbaa. ² Gacxe waa, zeene gun to xyudar zha ne guien pe yquiin, gooldide tow zigne run grë zha ne rquiaalo rquia zdoo samiech; sac zha co tel pe ncuaane rgad zho, rzo zho len yadoo, rzo zho ro nëz rlozhd yquiaabdzie zhow par gacnanpaa miecha, zeena zha ne gona guiab zho: ¡Zha wentaa zha qui! ¡Gneli naa lo to ganle ne sca riannziiuu zho lo miech, lëële gdib guielnzaac ne yгаа zho ga!

³ Golguien sca, zeene gun to xyudar zha ne no tib liaadz, choot lo gzodiidzde tow, per ni zha ne mazdraa ndzieeldiidz to nodne gacnaa. ⁴ Dzigo scagaa PxoZ to nroob guielnzaac ne gneedz me lo to, sac tel me grësew ran me.

Zha gzodiidznie miech Dios

(Lc. 11:2-4, 34-36; 12:22-31, 33-34; 16:13)

⁵ 'Scaque zeene gzodiidznie to me, gunde to zigne run grē zha ne rquiaalo miech wen nac zho. Sac tel zha co zeene rzodiidznie zho me, rzo zho zaatne ganpaa miech zho, zig nac len yadoo, zig nac len guiedz zaatne rded rzē miech. Gneli naa lo to ganle lēēle guielnzaac ne ygaa zho ga. ⁶ Golguien zeene gzodiidznie to me, golsēēb len lidz to dziits golsioog ro yu, ga golzodiidznie me. Ible tedsod nroob guielnzaac gneedz me lo to, sac niicle ncuaane mazdraa ngueets zhliaana, ran mew.

⁷ 'Ni zeene nozodiidznie to me, gunde to ncuaane nonee to lēēw rlozh, lēēw rsilo zigne run grē zha ne runbeyd me. Sac zha co rzac zho por nroob diidz gnee zho, por nzian vuelt gnee zhow dzigo squiaadiag mew. ⁸ Gunscade to, sac me ne nac me Pxoz to gardle gnee to xliaadz to lo me laa me nanle pe nac ncuaane rquiin to. ⁹ Gacxe waa zeene gzodiidznie to me, znu golnee:

Dios, luu ne nac luu Pxoz no, zob luu gbaa;
luuse nac men ne mazdraa ndzon.

¹⁰ Luu nac men ne gnabey no,
mine gnabeytaa luu zigne raca gbaa,
scaque none gaca lo guidzliu nu.

¹¹ Been guielnzaac bneedz ncuaane dioow no
nadze.

¹² Bzhiguiel been no perdon grēse dol ne ziodzi-
uun no lo luu,
zigne rdziuun no samiech no perdon grē falt ne
run zho lo no.

¹³ Gdeete luu diidz yquiil mendox no,
been guielnzaac bla no lo ma.

Luu nac men ne rnabey, men ne rap poder, men ne mazdraa nroob. Miñe rnab no nu, ndionpaa no zun luuw.

¹⁴ 'Sca nagon none gnee to. Ni golgona ganle, zha ne gon gun samiech zho perdon tel pe nactaa falt ne been zho lo zho, scaque Pxoze to men ne zob gbaa, zun me zho perdon. ¹⁵ Zha ne gund samiech zho perdon, niicle megaa gund me perdon xtol zho.

¹⁶ 'Stiba, zeene nocuan to nozodiidznie to me, gunbande to lo to. Sac gre zha ne rquiaalo miech wen nac zho, sca run zho; zeene nocuan zho xtsinpaarun zho runmban zho lo zho par gan miech laa zho nocuan. Gneli naa lo to ganle, zha ne sca run leele guelzhaac ne ygaa zho ga. ¹⁷⁻¹⁸ Gunscade to, nguieel golgac ine golzee biegw guic to, golquiib lo to, zeena ni tib choot guend laa to nocuan, loxaque Pxoze to gacnaa, sac grese ncuaane rac ngeets ran mew. Grese ncuaane rac, me rana, me nac men ne gneedz tib guelzhaac nroob lo to.

¹⁹ 'Tsienalde to loxaque dien zha gapchen to lo guidzliu rii, sac nac ncuaan lo guidzliu rii rban ngbaana, rnitlo mxila, haxta noxtseeb guioochena.

²⁰ Mazd goltoxico ygaa to guelzhaac ndzon ne no gbaa, sac miñe no gbaa, led yed min co guioochen, led yed min co cuan ngbaan, led yedgaaw gnitlo mxil. ²¹ Golgona ganle, guelzhaac ne gon gunlo to, ga glu pa gdzin xalm to, sac zaatne gunlo to guelzhaac co ga nac zaatne gdzin xalm to.

²² 'Rriequia nac bziaalo to zig nac tib biini. Telne niapse lo gre ncuaane ndzinli rwi to, dzigo gdipse xcuerp to no lo guelbiini. ²³ Laa telne loxaque lo gre ncuaane nonguield rwi to, dzigo

gdipse xcuerp to no lo guiel_{cow} ga. ;Zha rnazhe lo guiel_{cow} co, tel_{lëëque} biini noyac guiel_{cow}!

²⁴ Golgona gan_{le}, grieelod gon_{gleynie} to dimi, ni gleynieque to Dios. Ib none tel_{ne} Dios rleynie to, me none gleynie to, togo dimigaaw, dimi gol_{leynie}.

²⁵ Gacxe waa, gni naa lo to gan_{le}: Tso_{de} to zhgab dien_{zha} gban to lo guidzliu rii, pa griee pe gow to, pe guie to, pe gacwxab_{gaa} to. Stiba, ;niacxe mazdraa non guiel_{wagw} lo xquiel_{mban} to? Xab_{gaa} tow, ;niacxe mazdraa nona lo xcuerp to? ²⁶ Gol_{wi} lo grë mguin_{gan_{le}}, led yed ma rquia gon, led yed ma rquia wlaap, led yed ma rgotsow pe guiel_{gon}, per row ma, sac P_{xoz} to men_{ne} zob g_{baa}, men_{co} rdeed ncuane row ma. ;Tel_{to} gon_{mazdraa} non to lo grë mguin_{co}! ²⁷ Ni lalnu paat rquiinda tant tso to zhgab. Tel_{ne} guiab to tso to zhgab dien_{zha} gacnool xtse to spalal yeense, ;niacxe zrieelo to gun_{nool} tow?

²⁸ Zig nac lar, ;pe nacne tant tso to zhgab dien_{pe} gacwxab to? Pe rwide to lo grë guiee ne gan_{le} zëëb dan, zha rrooba, led yeda rio zhgab dien_{zha} gacwxaba, per niow rnaw; ²⁹ gni naa lo to gan_{le}, per ni rey Salomón con grë xab niazh me, blud me scataa niow.

³⁰ Gase na gan_{le} gol_{wi}, niicxe grë guiee dan co na, zna dze zob nguiaw, gzhe widz laaw bidzle, laaw tsece, ni scataa niow rgacwxab Diosa, ;pe lel_{to} dzigo ygacwxabd me, niicle ne squi gard guien_{to} dib zdoo to gnalo to me?

³¹ Tso_{de} to zhgab sca guiab to: “;Bay pa griee pe dioow ne, pa griee pe dio ne, pa griee pe dziaacwxab ne?” ³² Grë miech ne run_{beyd} Dios, tibaque zhgab co rio zho. Sa_{ngue} to gol_{soladz} gan_{le},

Pxoz to men ne zob gbaa, nanle me pe nac grë xliaadz to, ³³ me nac men ne gneedz ncuaane yquiin to, per ib none glo tsoxco to gban to zigne rnabey me. ³⁴ Golguien sca tsoode to zhgab dien zha ted to gzhe widz, sac gzhe widz co zhaalaeque xco ne ziaad. Tib tib dze zhaase zhaase zhgab ne ziaadniew.

7

Nodne gzee zdoo ne cho zha rac (Lc. 6:37-38, 41-42)

¹ Blozh ga rëbchaa me lo zho:

—Golguien, ib gunde to në gac zdoo to zeene ran to ncuaan nonguield ne run stib miech, sac to tozhal gunquizh zhow; zeena scagaa Dios, gunscad me to. ² Sac gon tel zha rzac to samiech to, scasaque sac Dios to.

³ 'Lëda ga gon tso to lozhd gzee zdoo to dien cho pe run, ni nenda mazdraa mine run to! ⁴ 'Pe ro to glisqui to mine run stib zho, ni tel mazdraa nac mine run to? ⁵ 'Golguien sca glude to ncuaane nade to! Glo goltsoxco ndzinli gac to, dzigo lozh ga zac tsienee to lo stib zho zha gacndzinli zho.

⁶ 'Ndzon nac Xtiidz Dios, gdeete tow lo zha ne rlëeniew, sac gon rriequia lo mëcw ga gdeed tow, ib zun zho mine run mëcw zacntseeb zho lo to. Naca zig nac quie perl, gdeete tow lo zha ne rleynieda, sac gon rriequia lo nguts ga gdeed tow, tel ngutsa niicle ncuaane mazdraa non glaal zho lo ma, loxaque gzëeni maw.

Ncuaane gnabtaa ne zгаа new

(Mr. 1:22; Lc. 6:31, 43-44, 47-49; 11:9-13; 13:24-27)

⁷ Ncuaane rquiin to, golnaba lo Dios, scagaa me zneedz mew. Golguib tel pe racladz to, me nac men ne gacnie to gdziel tow. Golcuedzle me, scagaa me scaania me to. ⁸ Sac grese zha ne rbig lo me rnab zho ncuaane rquiin zho, rdeed mew. Zha ne rguib ncuaane racladz, racnie me zho rdziel zhow. Zha ne rbedzle me, rcaania me zho.

⁹ Golwi ganle, zig nac to zeene rnab xpeed to guiet gow win, zniacxe ziazh to co to tib quie nia win? ¹⁰ Zeene rnabгаа win mel, zniacxe zdeed to tib meel lo win? ¹¹ Led rioxco to lee niapse ncuaane wen rdeed to lo xpeed to, niicle ne miech ntseeb nac to. Telne sca rioxco to xpeed to, pelej Pxoz to dzigo, men ne zob gbaa, tsoxcd me to. Ib tedsod grese zha ne gnab lo me gdeed me ncuaane rquiin zho, zdeed mew.

¹² Zha ne racladz ndzinli gac miech lo zho, none glo zho zaacse gac zho lo miech. Zigtaa ley ne psan Moisesa, zigtagaa mine bnee gre zha ne biadteed xtiidz Dios padzeelaw, sca rnabeya.

¹³⁻¹⁴ Goltsoxco sca tsienal to mine rnabey Dios, niicle ne nac guielmban co zig nac zeene rze ne tib nez nia. Zhis zha ne rzeeb nez co, per nez co zгаа miech guielmban ndzon ne rdeed Dios. Sac gon zha ne mban zigne notaa guic zho, rriequia tib nez nzhen ga zie zho; ndal miech ne zie nez co, per nez ne nitlo zho ga zie zho.

¹⁵ Nsin golso lo zha ne gacladz yquidie to gne zho xtiidz Dios noteed zho, niicle ndooladz rlu zho pale cho gre mecwxiiil yeen, per zha ntseeba,

masaque nac zho zig grë coyot blë. ¹⁶ Zigne runbey miech tib yag por nex ne rquia low, scaque wen wen golwi zha nac ncuaane run zho, dzigo ga gunbey to cho nac zho. Sac gon zig nac uv, rquiada lo yag guiets; niicle guigwgaaw rquiada lo grë lbë guiets. ¹⁷ Tib tib yag nex rdeedsew xnexa. Tib yag wen, nex wen rquia low; scagaa yag ncuaana, nex ncuaan rquia low. ¹⁸ Grielod yquia nex ncuaan tib lo yag ne rquia nex wen, ni grielodgaa yquia nex wen tib lo yag ncuaan. ¹⁹ Gacxe waa grë yag ne rquia nex ncuaan, paat rquiinda, lëë gdib rruga, rlozh ga rzëëg zhow. ²⁰ Miñ co nagon rne naa lo to, zha ne sca guiaad, por ncuaane run zho ga gunbey to cho nac zho.

²¹ Grë zha ne rnee noxco zho mine rnabey Dios, no zho lega rneesew. Nenda haxta rnee zho, naa nac men ne rnabey zho, per gdziñd zho zaatne rnabey Pxoz naa. Sac zha ne nlipaa run mine rnabey me, zha cose gdziñ ga. ²² Gal dze co, nzian zha ne grieequia gnë lo naa: “Conque rdziunbey no luu, blactaa name bio no bionee no Xtiaz luu lo miech, nzian milagr ne bdziun no, haxta mendox bdziunxoon no zeene bzeet no lë luu.” ²³ Niicle sca gnë zho, ib ycaaniad naa zho, sonëz naa zho; sac ni lalnu beend zho ncuaane ndzinli.

²⁴ Zha ne rquiaadiag mine rne naa, ni rioxco zho rban zhow zigne naca, rrieequia nac zho ga zig tib zha ndzielguic ne bzaa lidz zaatne nac tib lo quie. ²⁵ Niicle riab guiedox per peet racd lidz zho, niicle rriee medox, nis naal ne raclo rded zaatne zoba ga, per rbixcheda.

²⁶ Laa grë zha ne rquiaadiag xtidz naa, ni rioxcod zho gban zhow zigne naca, ziaad gac zho

ga zig tib zha nxen ne güeyzoob lidz zaatne nac tib lo yuzh. ²⁷ Znuse bnitlo lidz zho, sac zeene biab guiedox, lo medox ne brieë, lo nis naal ne goclo bded zaatne zoba, znuse bixchew, ni stib lëw biaand.

²⁸ Zeene blozh bnee Jesús, grë miech ne noquiaa-diag ga, per nli rzee zdoo zho gon zho zha rseed me, ²⁹ sac rlu men rnabey nac me, led yed me rseed miech zig rseed grë maistr ley.

8

*Biac tib mgui ne rlan lepr
(Mr. 1:40-45; Lc. 5:12-16)*

¹ Laa Jesús ziad-zëëb cho gui win co, miech guizhiu ne nal zhits me, ² tibaque brieëquia tib mgui ne rlan guiedzdox ne lë lepr, wbig me pqui-itgzhib me lo Jesús, rëb me:

—Tebaa sigueel luu gunguiac luu naa.

³ Dzigo pxobnia Jesús guic mgui, rëb Jesús:

—Zunguiac naa luu. ¡Niinagazh laa luu guiaanmbe!

Horcogazha laa grë guiedz co bnitlo. ⁴ Dzigo rëbchaa Jesús lo me:

—Bina ganle, choot lo gzodiidzd luu gon zha biac luu; sinque güey lo pxoz güeyсан gon ne rieguial gdeed luu zigne rnabey ley ne psan Moisés, zeena gan zho ganle laa luu biacle.

*Biac tib zha ne rquia dziin tib lo menquiib
(Lc. 7:1-10)*

⁵ Loxaque bdziñ Jesús guiedz Capernaum, laa tib men ne rnabey lo xmenquiib zha Roma bdziñle

lo me, rnab meṅ co guṅguiac Jesús tib zha ne quia xtsiṅ me, rēb me:

⁶—Been tib guieṅnzaac beenguīac tib zha ne rquia xtsiṅ naa, laa zho nix lidz naa ib gacd grial zho, mban rac zho yoobdox ne rquia zho.

⁷Dzigo rēbchaa Jesús:

—Peet nacda, na sē naa guio ne guṅguiac naa zho.

⁸—Coo —rēb meṅguiib co—, rieguaṅld csodziin naa luu sēē luu haxta lidz naa. Nanṅpaa naa zrieelo luu nugazh gnabey luu guīac zho. ⁹ Sac zig nac naa no zha ne rnabey lo naa, ni ron naa miṅe rnabey zho; scagaa tel guiep naa tib lo zhaguiib ne rnabey naa: “Güey nu”, rie zho; rnegaa naa: “Dē nu”, riaad zho; zha ne ruṅгаа dziin lo naaw, miṅe rnabeytaa naa zho, ruṅ zhow. Scaque luu nagon nanṅpaa naa zrieelo sca gnabey luu guīac xmoz naa.

¹⁰ Zeēne goṅ Jesús sca rnee meṅ co, rley me, rēb me lo grē zha ne zienal zhits me ga:

—Lo grē zha Israel, gard goṅ gaṅ naa tib zha ne squitaa dib zdoo rnalō Dios. ¹¹ Ni goṅquiaadiaga gaṅle, zdziṅ dze grēle zha zit ne squi gnalo Dios, zha co ygaa sobnie Abraham, sobnie Isaac ni Jacob zaatne rnabey Dios. ¹² Laa grē zha Israel, niicle nac zho zha ne nac diidz gdziṅ ga, lel lo ncow nēz ley guīaan zho, ga tso zho goonnē zho, haxta gow lay zho lo guieṅnēdox co.

¹³ Blozh ga rēbchaa me lo meṅguiib co:

—Bzē nasca, gocnaṅ gaṅle zigne bliladzse luu guīac xmoz luu, sca gaca.

Horcogazha laa moz co biac.

*Biac xniadzoop Pedr
(Mr. 1:29-34; Lc. 4:38-41)*

¹⁴ Laa zeene bdziñ Jesús lidz Pedr, gon me laa xniadzoop Pedr nix rlan xlëe. ¹⁵ Dzigo bded me zaatne nix zhuz co, zigne bzhen me nia zhuz laa xlëe co blëz. Horcogazh guche zhuz beenlo zhuz ncuaane dow zho.

¹⁶ Ziedzele dzew, laa ngbidz rzëëblew, zeene bdziñ grë miech co, nzian grë zha ne nosacsi mendox bdziñnie zho lo me. Grëse zho beenguiac me, goctox me lo grë mendox ne nosacsi zho ga, beñcxoon me ma; ni zha ne rlangaa pe stib guielguidz, grëse zho beenguiac me. ¹⁷ Ga brieequia mine bzeet Isá, men ne biadteed xtiidz Dios lo miech padzeela, zeene rëb me: “Grëse xquielnë ne, grëse guielguidz ne rziaac ne, me biw.”

*Zha ne racladz sëëb xnëz Jesús
(Mr. 4:35-41; Lc. 8:22-25; 9:57-62)*

¹⁸ Zeene gon Jesús scataa ndal miech ne goclo lo me ga, dzigo bnabey me xpëëdscuel me gzhixcuaa zho, sac laa zho no tedquia stib nëz ro nisdoo co. ¹⁹ Dzigo wbig tib men ne nac maistr ley lo me, rëb maistr co:

—Zaatne tsietaa luu gon, sënal naa zhits luu.

²⁰ Dzigo rëbchaa me:

—Gocnana ganle, naa ne nac naa Mgui ne pxeel Dios, peet rapd naa nu, mazd zig nac grë mëz, grë mguin, rap ma zhibliee ma, rap ma zhiptsieez ma; per naa per ni zaatne gaguies naa quianied naa.

²¹ Wbigaque stib zha ne rzënalle zhits me, rëb zho:

—Ye naa gon sēna_l naa zhits luu, per bzhiguie_l bneedz diidzbey cuēz naa gan_gazh naa tso_liu pxoz naa.

²² Pquiab me rēb me:

—Dēna_l zhits naa. Psaan, nzian grē zha gut no, tsow tsiequeets zho samēngut zho.

²³ Dzigo laa me bzēēbnie xpēēdscuel me tib len_l barcw, laa zho zie. ²⁴⁻²⁵ Laa zho zie lo nis co, tibaque zeēne psilo brieē tib medox, masaque r_lis me lo nis co, laaw psilo rzēēb len_l barcw. Dzigo lēēlēd güey zho güeycuaan zho me, sac lēētaque nixguies me.

—Ligier gan_le —rēb zho—, blee mcaal_l lo luu. ;Bui gan_le laa ne nitlo lo nis rii, csaand luu guet ne nu!

²⁶ Dzigo rēbchaa me lo zho:

—;Pe nacne squitaa rdzieb to? ;Gardaque dzigo lēē gliladz to cho nac naa!

Dzigo guche me, bnee me lo me co, bnee me lo nis co cuedzew. Horcogazha blēz me co, niicle nis cow laaw bredze. ²⁷ Zeēne gon_l zhow, bzee zdoō zho.

—Bay chozhe waa nac men_l rii —rnee zho—. ;Zha nac ne haxta me, haxta nis ron xtiidz me?

Men_l Gadar ne nosacsi men_ldox
(Mr. 5:1-20; Lc. 8:26-39)

²⁸ Laa zho bdzi_lndze stib nēz ro nisdoo co, zaatne nac xtan zha Gadar, zeēne brieēquia chop mgui ne nosacsi men_ldox, bdzi_ln lo Jesús ga. Zha ntseeba, rdzieb miech zho, choot rdete nēz co. Len_l baa brieē grop mgui co bdzi_ln zho ga, ²⁹ nguiedz roptsie zho rnee zho:

—jPeet gund luu no Jesús, psaan no! Rdziuunbey no luu, Xpëed Dios nac luu. Ne nligaa been guielnzaac csacsid luu no niinaga.

³⁰⁻³¹ Zitlaaque ga ndxie tib dzoon nguts notop lag, dzigo bñab grë mendox co lo Jesús rëb ma:

—Telne cuee luu no nu, bzhiguieļ bneedz diidz lose grë nguts qui gdziin no.

³² —Niinaga sca goļtsie —rëb me.

Zigne psaan mendox co grop mgui co, güey ma bdziin ma lo grë nguts co. Horco psilo grë nguts co, rquiaa ma corr güeypix ma tib ro yeedox ne quia ro nisdoo co, bliiaal ma lo nis, grëse ma gut.

³³ Zha ne quianap grë nguts co, gzase zho bzhoon. Güey zho lad guiedz güeyzodiidz zho zha goc grë nguts co, ni bzodiidz zho zha biac grop mgui ne nosacsi mendox ga. ³⁴ Grëse miech co, brie zho zieso zho. Zeene bdziin zho gon zho laa Jesús zo ga, dzigo bñab zho lo me siguieļ me gbi me xtan zho.

9

Biac tib men ne gutoo

(Mr. 2:1-12; Lc. 5:17-26)

¹ Dzigo wbiireque bzëeb zho len barcw, bdziin zho guiedz Capernaum stib, sac ga nac zaatne rbëz Jesús len dze co. ² Zhisaque goc bdziin me, laa zho bdziinniele tib men rzacnë lo me, dipse men co gutoo, ib gacd së me. Lo yag zhoob me bdziinnie zho me ga.

Zeene gon Jesús dib zdoo grë zha co rnalo zho ne me gunguiac men rzacnë co, rëbchaa me lo men rzacnë co:

—¡Nley bloo zdoo luu xin! ¡Laa naa beñle perdon grëse xtol̄ luu!

³ Ga zob blalaa maistr ley, zeene gon̄ zho sca bnee me, bza zdoo zho rëb zho: “¡Quiaguitnie meñ qui Dios gon̄ squi rzë xtiidz me!” ⁴ Bienga Jesús sca rza zdoo zho, dzigo rëbchaa me:

—Lëda i gon̄ squi rza zdoo to. ⁵ Nli ngan̄da guiab ne lo miech: “Laa naa beñle perdon grëse xtol̄ luu”; per grieelod lega guiab ne laa ne gun̄guiac zho. ⁶ Gacnan̄ to sca gan̄le naa ne nac naa Mgui ne pxeel̄ Dios, ible rap naa poder par gon̄ naa miech perdon.

Dzigo rëbchaa me lo meñ rzacnë co:

—¡Niinagazh guche i, bi yag ne bzhoob luu i, zeen̄ bzë!

⁷ Zigne sca bnee me, laa mgui co bzoli, laa me zey. ⁸ Grë miech guizhiu ne ndxie ga, zeene gon̄ zho sca beenguiac me mgui co, bdzieb zho. Psilo zho rdeed zho xquizh lo Dios, scataa poder ne bdeed Dios lo me.

Bredz Jesús Matew

(Mr. 2:13-17; Lc. 5:27-32)

⁹ Blozh ga laa Jesús brieë ga. Ro nëz zieded me gon̄ me tib meñ lë Matew, lëëtaque laa meñ co zob lo mezh zaatne razh dimi ne rey lo zha Roma; sac me rcaania dimi co. Dzigo bredz Jesús me tsienal̄ me zhits Jesús. Ga guso me, laa me zienal̄.

¹⁰ Bded ga güeynie me Jesús tib wagw lidz me. Grë zha ne rcaania dimi ne razh lo zha Roma, grë zha ne zëëb diidz nac zha ntseeb, tipse brenie Jesús zho grë xpëëdscuel me.

¹¹ Blalaa zha farisé, gon̄ zho sca tipse zobnie me grë zha co, bded ga, rëbchaa zho lo xpëëdscuel me:

—¿Mod scataa na rownie xmaistr to grë zha ngoopdol, grë zha beed ne nac recaudador!

¹² Bin Jesús sca quianee zho, dzigo rëbcha me lo zho:

—Nanle to ganle, zha ne run rmed, zaatne no zha rzacnë ga rquiin zho, ¿niacxe squiin zho zaatne no zha ne ndip ndaan? ¹³ Golsoladz ganle znu rnee Dios: “Laa naa racladz gacndooladz miech, yquia zdoo zho samiech zho, racladzdaxe naa waa guiaad zho dieen peraa guiaadlogon zho lo naa.” Mazd ganle goltsie, tsow golsob golguien dien zha nacne sca rnee me. Tel naa, zialguibd naa miech wen, sinque laa naa zialguib grë zha ngoopdol.

¿Pe nacne rcuand xpëëdscuel Jesús?

(Mr. 2:18-22; Lc. 5:33-39)

¹⁴ Bdzinaque xpëëdscuel Juan Bautist, bnabdiidz zho lo Jesús, rëb zho:

—¿Pe nac waa ib rcuand xpëëdscuel luu? Ni no grë no zha farisé, zhiga zhiga laa no rcuanle.

¹⁵ Pquiab me rëb me lo zho:

—Zaatne nadien noyac tib guieltsieel, ¿pe niacxe lega csilo grë zha ne ndxie lo lni tso zho guielnë, ycuan zho, ni ran zho laa mgui ne notsieelnia zo lo zho? Per zdziñ dze zeene laa mgui co gbiche, ni zeene laa dze co gdziñ, dzigosi nagon rieguial tso zho guielnë, rieguial ycuan zho.

¹⁶ Ranle to ganle, zha ne rquiaabdie tib lë lar, yquiaad zho lar cub lad lar gox, sac zha ne sca gun paat yquiind wquiaabdie co. Zeene laa lar cub gbe, lëëque lëëw gunnat zaatne nriez lar gox.

¹⁷ Scaque tsod zha ne cotsow vin cub tib len guid ne padzeela noquiin, sac stsiez nziu cuba; dzigo

niicle guid cow, niicle nziugaaw laaw nitlo ga. Gacxe, tel̄ nziu cuba none len̄ guid cubaque tsot-sowa.

Brieeban tib mēdwnaa yeen

(Mr. 5:21-43; Lc. 8:40-56)

¹⁸ Lēētaaque sca quianee Jesús lo xpēēdsuel Juan Bautist, zeene bdziṅ tib mgui ne nac zha non yadoo. Zigne bdziṅ me pquitsgzhib me lo Jesús, rēb me:

—Been̄ tib guiel̄nzaac sē luu guio ne lidz naa. Laa tib xpēdwnaa naa blozh niina, per nan̄paa naa tel̄ne cxobnia luu guic win, zbeeban luu win.

¹⁹ Dzigo bio Jesús nēz zienal̄ me zhits meṅ co, gza xpēēdsuel me. ²⁰ Lad grē miech ne zienal̄ ga, lad co no tib meṅ wnaa, gocle tsiipchop iz rlan me tib guiel̄guidz, rzac me zigne rzac grē meṅ wnaa gzob mēē, tibaque rlan mew ib rbēzda.

Ga zie me, zeene wbig me nēz zhits Jesús, bzhen̄ me ro lar ne mbix Jesús, ²¹ sac tibaque güeynie guic me, ziac me totsaque ygaa xab Jesús nia me.

²² Dzigo wbiere lo Jesús, dze bui Jesús lo me.

—Xin —rēb Jesús—, peet tsienied guic luu. Laa luu biac sacne bliladz luu naa.

Gataa laa wnaa co biac lo guiel̄guidz co.

²³ Laa zeene bdziṅ Jesús lidz meṅ rnabey co, laa zha ne rool̄ ndxiele, noquiaa zho grē di ne rac lo ngutoo, grēraa zha ne ndxie ga, nguiedz zēēb tsi zho roon zho, tib ruid ne rac. ²⁴ Dzigo rēbchaa me lo zho:

—Gol̄ree nēz ley, sac goṅ gute mēēd qui, nixguiesse win.

Zha ne rlēē, zha ne rzhidzniegaa me, laa zho brieey ley. ²⁵ Dzigo laa me bzēēb len̄ yu zaatne nix

mëed co, bzhen me nia win. ¡Horcogazha laa win guche!

²⁶ Grëse guiedz ne ndxie dib gax ga, gocnañ miech scataa milagr nroob ne been me, bleeban me mëed co.

Biac chop zha ne rold lo ni tib zha ngop

²⁷ Zeene laa Jesús wbi ga, nöz zie me brieenañ chop zha ne rold lo zhits me, nguiedz rbedz zho rnee zho:

—¡Jesús, xingan David, pquia zdoo no!

²⁸ Bdzin Jesús yu ne rbëz me, laa zho wbig lo me. Dzigo rëbchaa me lo zho:

—¿Dib zdoo to dzigo lëe rliladz to zrieelo gunguiac naa to?

—Dib zdoo now —rëb zho.

²⁹ Dzigo pquiaania me zhits bzialo zho, ni rëb me:

—Mïne bliladz to i nasca, laaw gac niina zigne bliladz tow.

³⁰ ¡Horcogazha laa lo grop zha co biac!

Dzigo pso Jesús diidz lo zho choot lo gzodiidzd zho zha biac zho, ³¹ ni zigne brie zho ga, laa zho bzodiidzlew. Blozh ga, grëse guiedz ne ndxie dib gax ga, gocnañ miech scataa nac milagr ne run me.

³² Loxaque wbi grop zha ne biac lo ga, laa bla zho bdzinlaque, bdzinne zho tib men ne nosaci mendox, psanngop ma men co. ³³ Dzigo benxoon Jesús mendox co, zeene laa ma bzhoon laa men co psilo bnee. Grë miech guizhiu ne ndxie ga, per nli rzee zdoo zho, rnee zho:

—¡Wlaltaa gard dzian ne tib men ne squitaa gun grë milagr qui!

³⁴ Laa grë zha farisé rnee:

—Ma ne rnabey lo men_{dox} nacie men_{qui}, gane rrieelo run_{cxoon} me men_{dox}.

³⁵ Grëse guiedz ne ndxie gax ga, zigtaa guiedz nrooba, zigtagaa guiedz lasa rie Jesús rieseed me miech. Zaatne rdzi_{ntaa} me, rie me xyadoo zho rnee me lo zho zha racladz Dios gban zho, ni run_{guiac} me zho tel_{pe} nactaa guiel_{guidz} ne rzac zho.

³⁶ Zeene ran_{me} grë miech guizhiu ne rcaalsa lo me, rquia zdo me zho, sac ran_{me} mban rac zho guie_{nd} cho tib zha ne gacnie zho, rac zho zig grë mëcwxii_l yeen_{ne} guie_{nd} xbaxtor.

³⁷⁻³⁸ Tib vuelt haxta rëb me lo xpëedscuel me:

—Gol_{nab} lo Dios cxeel_{raa} me zha ne gun_{xtsiin} me. Gol_{wi} gan_{le} pe zhidaa grë miech qui, quiambëz zho die_n cho gnee Xtiidz Dios lo zho. Masaque nac zho niina, zig tib guiel_{gon} ne gol_{le} gliiap.

10

Bzo Jesús zha ne tsienee xtiidz me

(Mr. 3:13-19; Lc. 6:12-16)

¹ Blozhse sca bnee Jesús, dzigo bredz me gza tsiipchop zha ne nac xpëedscuel me ga, bzo me zho tsienee zho Xtiidz Dios lo miech, bdeed me poder lo zho gun_{cxoon} zho men_{dox} zaatne nosacsi ma miech, ni gun_{guiac} zho grë men_{rzacne}.

²⁻⁴ Znu lë gza tsiipchop zha co:
Simón (zha ne rneeque zho Pedr),
Ndrés (bets Simón),
Jacob ni Juan (zha co nac xingan Zebedé),
Lip,
Bartol,

Mazh,
 Matew (zha ne ptop dimi ne razh lo zha Roma),
 Jacob (xingan Alfé),
 Lebeo (zha ne rneeqe zho Tadé),
 Simón (zha ne no lo partid ne racladz griece zha
 Roma Israel),
 ni Judas Iscariot (zha ne güeyto Jesús).

*Pxeel Jesús zha ne tsienee xtiidz me
 (Mr. 6:7-13; Lc. 9:1-6)*

⁵ Blozhse ga, pso me diidz lo zho zha tsie zho, rëb me lo zho:

—Nanle to nagon, tsiede to zaatne no grë zha ne nacd zha Israel, niicle sëëbde to grë guiedz ne ndxie xtan zha Samar. ⁶ Zaatne no grë zha Israel, gase goltsie; lëë grë mëcwxiiil ne nonziaab ga.

⁷ Goltsie, goltsienee lo zho gacnan zho ganle laa dze ziaadgaxle zeene laa Dios csilo gnabey.

⁸ Grëse zha ne rzacnë, golgunguiac zho; zha ne rlan guiedz lepr, golsanmbe zho; zaatne nix zha ne gutle, golcueeban zho; grë zha ne nosacsi mendox, golguncxoon ma. Peet gnabde to lo miech, golguien ganle lega bnedz naa poder qui lo to, bzhiide tow.

⁹⁻¹⁰ Peet güeyde to, xab tow, lab tow, miñe nacwse to, miñe quiase ni to, miñcose goltsienie. Güeyde to dimi, per ni tib quiet güeyde to; sac zaatne tsiegun to dziin rii, ib ga none gneedz zho ncuaañe gow to.

¹¹ Guiedz ne gdzintaa to, golguib dien pa lo no tib zha ne ndzinli, dzigo lidz zha co goltsiebëz, haxta gza dze ne laa to gbi guiedz co. ¹² Zeene noguib to pa cuëz to, yu ne tsie to, zaacse golgac, golquiaabdiuzh zha ne no yu co, ¹³ golnab gunlay Dios zho. Telne wen gac zho lo to, zunlay me zho,

togo guṅcasdḡaa zho to, dzigo toque guṅlay me. ¹⁴ Zha ne sca siguielḡd ycaania to, goḡrieegazh lidz zho; guiedz ne siguielḡd zho yquiaadiag zho miṅe nonee to, goḡbigazh guiedz co; goḡlit grē yudie co ni to, goḡllu lo zho ganle led xtoldraa to ga telḡ laa zho nitlo. ¹⁵ Gneli naa lo to ganle zeene galḡ dze ne laa Dios guṅ xquielḡwxtis me, bii lēētaa gac guielḡnē ne ygaa grē miech ne bio guiedz Sodom, guiedz Gomorr, lēdle guielḡnē ro ne ygaa grē miech ne sca siguielḡd ycaania to.

¹⁶ 'Nsin goḡso, goḡguien ganle rrieequia tib mēcwxiiḡ yeenḡe nac to, ni laa naa rxelḡ to zaatne no grē coyot dox. Ndooladz goḡgac, niowse goḡgac lo miech zig rac grē palom, per scagaa con cuidad goḡtsie, goḡgan ganle zha rzē meel. ¹⁷ Nligaa nsin goḡso, sac goḡn ib ziezo miech to lo wxtis, ni lēēque lenḡ yadoo ga quinḡ zho to, ¹⁸ haxta ziezo zho to lo grēraa zha nroob ne rnabey. Laa zho guṅa, loxaque ne nac to zha ne no xnēz naa, ni gagaa nagonḡ gdeeda diidz gnee to xtidz naa lo grē zha co, ni lo grēragaa miech ne nacd zha Israel.

¹⁹ 'Zeene sca tsiezo zho to lo grē zha rnabey co, tsode to zhgab dienḡ pe gnee to, dienḡ zhagaa gnee tow; sac zeene sca tsiegala, Dios gneedz diidz ne gnee to. ²⁰ Led tod gnee, sinque, ḡzhiEspiritu Pxoz to menḡ ne zob gbaa, menḡ co gnee ga!

²¹ 'Zlēēniedox miech zha ne no xnēz naa. Zio zha ne lēēque bets zho, zha ne lēēque pxoz zho, zha ne lēēque xpēed zho ctsidilḡ zho, tsielo zho zho ladznia zha ne gut zho. ²² Telḡ to, guiets yag ganḡ miech to, per telḡne dziits so to telḡ pe nactaa lo guielḡnē ne ted to, ib zgaa to tib guielḡmban ndzon ne gdziṅdraa dze lozh. ²³ Guiedz ne no to, zeene laa miech csilo

yquiaanal to, gol₁ree ga, gol₁tsie stib guiedz. Gneli naa lo to gan₁le, niicle stib guiedz stib guiedz tsie to, gardaque lozh tsieted to grë guiedz ne ndxie Israel zeene gal₁ dze ne laa Mgui ne pxeel₁ Dios guiaad stib.

²⁴ 'Gol₁wi gan₁le zha ne nac mëëdscuel, tsod zha ne ndziibraa non lo maistr, zha ne rquiagaa dziin, tsod zha ne nonraa lo zha ne rree zho. ²⁵ Tel₁ zha gun₁ miech maistr, scaque gun₁ zho mëëdscuel; tel₁ pe cteed zho bizhuan dziin, min₁coque cteed zho zha ne quia dziin. Gacxe waa peet tsienied guic to, tel₁ pe nactaa ncuaane gnee miech to, sac gon₁ niicxe naa name ne nac naa Dad, men₁dox rnee zho nac naa.

²⁶ 'Gdziebde to, zdzi₁n dze ne glu gan₁le cho zianal₁ mine nac diidzli, chogaa zianal₁ guie₁ntseeb, gal₁ dze co grësew xoobne₁.

²⁷ 'Grëse mine rne naa lo to zeene nese rziodi-idza, gol₁neew lo miech, haxta glaa guic yu gol₁so, nguiedz gol₁neew. ²⁸ Gdziebde to miech, gol₁guien gan₁le no tib men₁ nroobraa, lëë men₁ co nac Dios. Tel₁ miecha, loxaque cuerpse zrieelo zho csacsi zho, san₁gue Dios, zrieelo me gnitlo me miech dib xcuerp zho, dib xalm zho len₁ gabil₁.

²⁹ 'Nligaa gdziebde to, csaand Dios lega pe gac to. Gol₁wi gan₁le, zig nac grë mguin₁ niicle ne rzac miech peet nond ma, haxta chop ma rdeed zho por tib gaay centav; per Pxoz to gon₁ men₁ ne zob gbaa rsaanladzd me ma, ni tib ma guete tel₁ne gdeete me diidz. ³⁰ Pele₁ to dzigo csaan me, haxta guits guic tow, grësew ngaba lo me. ³¹ Gdziebde to sca, gol₁guien gan₁le nonraa to lo tib dzoon mguin₁.

³² 'Gneli naa lo to ganle, zha ne glu lo miech nacie zho naa, scaque naa zeñ gal dze co zlu naa lo Pxoꝝ naa meñ ne zob gbaa, nacie naa zho. ³³ Sañgue zha ne ctoladzie naa lo miech, scaque naa ziep naa lo me runbeyd naa zho.

³⁴ 'iGuiabde to togo laa naa zial loxaque par cuin wense miech! Lëda gon, ye zial naa zialgunctil naa zho. ³⁵ Sac zha ne sëëb xnëz naa, zläënie xpëëd zho zho, tel mëëdgaaw, zläënie pxoꝝ zho zho; scaque meñ wnaaw, zläënie xinzhizh zho zho, zha ne nacгаа nguzhizha, zläënie xnïaa tsieel zho zho. ³⁶ iLëëque menlidz miech gac zha ne glëë gan zho!

³⁷ 'Zha ne mazdraa rquia zdoo glëënie pxoꝝ zho zho, glëënie xnïaa zho zho, glëëniegaa xpëëd zho zho, porne gun zho miñe rnabey naa, peet xtsiind zha co par ygab zho xnëz naa. ³⁸ Scaque zha ne yquia zdoo cueeladz zho zho guiaadnal zho zhits naa, grielod ygab zho lo naa. ³⁹ Sac grëse zha ne rquia zdoo guielmban ne rap zho lo guidzliu rii, ygaad zho guielmban ndzon ne gneedz Dios; sañgue zha ne cueeladz xquielmban, niicle tel csacsi miech zho loxaque ne no zho xnëz naa, ib zгаа zho guielmban ndzon co.

⁴⁰ 'Niina gon ne squi tsie to, grëse zha ne zaacse ycaania to, zaacse gnee zho lo to, rrieequia naa ga sca ycaania zho; ni zha ne sca ycaania naa, rrieequia meñ ne pxeelle naa ga sca ycaania zho. ⁴¹ Zha ne cuëzlo tib meñ ne noteed xtiidz Dios lo miech, guielnzaac ne gdeed Dios lo meñ co, ye zho yгаа guielnzaac co. Zha ne cuëzlo tib miech ndzinli, guielnzaac ne gdeed Dios lo zha co, ye zho ygaaw. ⁴² Ni zha ne gneedz maase tib zhigaque nis yag lo

cho tib zha win ne nac to ne nac to xpëëdsuel naa, ib tedsod zdeed Dios guie_lnzaac ne tsiegui_l zho.

11

Zha ne pxeel Juan Bautist

(Lc. 7:18-35)

¹ Zeene blozh pso Jesús diidz lo gza tsiipchop zha co, dzigo laa zho zie. Blozh ga laa me brieque, güey me grë guiedz ne ndxie gax ga, güeyseed me grë miech co.

²⁻³ Le_n dze co no Juan Bautist ladzguiib, ga no Juan bin Juan zha nactaa grë milagr ne run Jesús, dzigo pxeel Juan bla xpëëdsuel Juan güeynabdiidz zho lo me, dien pe lëele Me_n ne zëëble diidz cxeel Dios lo guidzliu ga nac me, te dzigora_a gdzi_n me_n co ye. ⁴ Dzigo rëbchaa me lo zho:

—Grë ncuane bin to rne naa, grëga_a ncuane gon to run naa, goltsie golzodiidza lo Juan. ⁵ Ra_n to ganle grë zha ne rold lo, grë zha ne gacd së, grë zha ne rlan guiedz lepr, grë zha ne rcuaat, laa zho riac; haxta grë zha ne gutle, laa zho rrieeban. Xti-idz Diosa, laaw quiagaaz lo grëse zha ne rquiina. Grësew, golzodiidza. ⁶ Ni golguiab lo me, dichos zha ne racchopd guic, sinque tiblique rac zho riladz zho cho nac naa.

⁷⁻⁸ Zeene laa xpëëdsuel Juan zey, dzigo psilo me bzeet me Juan lo miech guizhiu ne ndxie lo me ga, rëb me:

—Zeene güey to dan ngan co, güey to lo Juan, ¿zha dien güeynie guic to nian to me? ¿Pe rëb to rlu me zig tib goobgui ne nëzrii nëzrec rey me, te rëb to ye masaque grë lar niazh ne racw zha non nacw me? Per nanle to ganle zha ne scataa racwxab riod zho

dan. ⁹ Nligaa cho dien güeynie guic to nac me, ¿te rëb to ye tib meñ ne noteed xtiidz Diosa? Gacnañ to ganle tib meñ ne noteed xtiidz Dios goñ nac me, ni me nac tib zha ne mazdraa nroob lo grë zha ne ziyun dziin co. ¹⁰ Me ga raquiet lo Xtiidz Dios zaatne znu rnee:

Sxel naa tib zha ne tednerga lo luu,
zha co gzhixcuuaa nëz ne ted luu.

¹¹ Ne nligaa lo grëse mgui ne zieded lo guidzliu gard grieequia tib zha ne mazdraa non lo Juan Bautist; per zha ne goñ winraa zaatne rnabey Dios, nonraa zha co lo me.

¹² 'Desde psilo Juan noseed me miech zhapaa racladz Dios gban zho, ni rchoobnis me zho, hor co psiloque brieequia zha ne rlëenie zhiwseed Dios, gacxe waa zha ne nlipaa rdziebd, zha cose rcaaniaw, rzëëb zho xnëz me. ¹³ Mazd glo tibaque raquiet ne laa meñ ne cxeel Dios ga guiaad, zigtaa lo leya, zigtagaa grë zha ne biadteed xtiidz Diosa, bzeet zhow. Ni niina ne laa Juan biaad, laa meñ co blanso. ¹⁴ Juan goñ biaad niina zig no diidz guiaad Lí; golgacnañ sca ganle cho nac me. ¹⁵ Zha ne racladz guien zho zha nac grë mine none naa nu, ¡yquiaadiag zhow!

¹⁶⁻¹⁷ 'Nac grë miech rii, rienđ zho pe racladz zho. ¿Cho ganle run zig run zho? Lëë zho run mine run mëédlas ne rio wguít ro nëz, niicle rool xcompañer win di nguieel ríeed win, niicle roolga zho di ngan, roond win. ¹⁸ Sac goñ biaad Juan, ran zho rowd me tel pe ncuaane row zho, ríed me ncuaane rie zho, dzigo laa zho rnee mendox nacie me. ¹⁹ Blozh ga ziaad Mgui ne pxeel Dios, ran zho row me, rie me, laa zho rneeque, lega rowcho me,

lega riecho me, ib rienḁ me cho rtsieelsa me, haxta grē zha ngoopdol, haxta grē zha yozh ne rtop dimi ne razh lo zha Roma rzēnie me. Sca rnee zho, sangue zha ne rgaa guielbiini ne rdeed Dios, rien zho cho nac zha ne ziaadguḅ xtsiin me.

*Miech ne bzhiguielḁ ncaania xtiidz Jesús
(Lc. 10:13-15, 21-22)*

²⁰ Blozhse ga, dzigo psilo Jesús bzeet me miḅe yгаа grē zha ne pcaaniad xtiidz me; sac nzian guiedz ne güey me niicle goḅ zho grētaa milagr ne been me, per ib psaand zho xquielntseeb zho, rēb me:

²¹ —¡Probsaxe grē meḅ guiedz Corazín, grē meḅ guiedz Betsaid! Sac goḅ goḅpaa zho grē poder ne rap Dios, per ib psaand zho xquielntseeb zho. Teḁ niaca miḅe nian grē meḅ guiedz Tiro, grē meḅ guiedz Sidón, grē milagr ne goḅ zho beḅ naa, ib ndedsod mban niac grē zha co nio zho guielñē, zēēb nsaan zho xquielntseeb zho, mbig zho lo Dios.

²² Gacnaḅ zha Corazín, gacnaḅ zha Betsaid sca ganle, gal dze ne guḅ Dios guielwxtis, lēētaa caxtigw ne yгаа zha Tiro ni zha Sidón, mazdraa miḅe yгаа zho. ²³ Scaque zha Capernaum, masaque rzac zho niina zha nziuuraa lo Dios, per gacnaḅ zho ganle haxta guiet lo ncowdoo ne guey meḅdox ga guey zho; sac goḅ teḁ niaca miḅe nian zha Sodom grē milagr ne ran zho noyun naa, ible nsaan zha co xquielntseeb zho, nitlod zho. ²⁴ ¡Gacnaḅ zha Capernaum ganle gal dze ne guḅ Dios guielwxtis, lēētaa caxtigw ne yгаа zha Sodom, mazdraa miḅe yгаа zho!

²⁵ Dzigo bzodiidznie Jesús Dios, rēb me:

—Dios luu ne nac luu Pxoꝝ naa, luu rnabey gbaa luu rnabey guidzliu, rnedz naa xquizh lo luu sac grë miñe noyuñ luu nu niina bdeete luu diidz niacnañ grë zha raca, sinque laaw blu luu lo grë zha ne nac zig grë mēēdlas. ²⁶ Sca quiayuñ luu, sac ib scale racladz luu gaca.

²⁷ Blozh ga rëb me lo grë miech ne ndxie ga:

—Grëse ncuaañe ran to quiayuñ naa, Dios men ne nac Pxoꝝ naa, me bneedz poder rii lo naa; sac ib laa me bzo naa, naa gūna. Xpēēd me nac naa, wen wen runbey me naa, scagaa naa wen wen runbey naa me. Choot runbeyd me zigne runbey naa me, per zha ne gacladz naa gunbey me, zunbey zho me.

²⁸ 'Grëse to ne nac to zha ne nē noded, rdib rdzag to quiaguib to dien zha guiaanwen zdo to, goltē lo naa, naa gneedz tib wdziiladz ndzon lo to. ²⁹ Nligaa golbig lo naa, goltēnal zhiwseed naa, golgac tib miech tibliladz, tib miech ndooladz zigne nac naa; zeena gap to descans co. ³⁰ Nacda ncuaañe ngañ, nacda ncuaañe guiab to glēbde to guñ tow.

12

Dze ne rdziiladz zha Israel lo dziin (Mr. 2:23-28; Lc. 6:1-5)

¹ Leñ dze coquew, tib dze lēētaque dze ne rdziiladz zha Israel lo dziina, bded Jesús zaatne zēēb zhobxtil grë xpēēdscuel me. Ga zie zho rcaabedz zho, dzigo psilo zho ptop zho mzion co dow zho zhobxtil co. ² Goñ bla zha farisew, dzigo rëb zho:

—;Lēda i goñ noyuñ to, noguiits to ley i! Golguien ganle dze nda nac dze rii.

³ Pquiabchaa me rëb me lo zho:

—¿Pe gard glab to zaatne ziaad ganle zha been rey David, tib dze zeene pcaabedz me grë me zha ne ziegza me, ni zienied zho pe gow zho? ⁴Rneew, bzëëb me leñ yadoo güeynab me guietxtil ne nac gon, downie me grë zha ne ziegza me ga, ni loxaque zha ne nacse pxoz row guietxtil co, ¿pe led bdiitsd me ley ga? ⁵Lo xley Moisés name zhobnee ganle zha haxta dze ne rdziiladz to lo dziin run grë pxoz dziin leñ yadoo, ni rneeda dol ga sca run zho. ⁶Golwi ganle zha rats ley par gac dziin leñ yadoo, ni yadoose ga, gacnan to ganle lo to nu zo men ne mazdraa non lo yadoo.

⁷Rnee Dios lo Xtiidz me, quiambëzd me dien peraa gun miech, dien peraa cogon zho lo me, sinque mine racladz me guien zho yquia zdoo zho samiech zho. Tel niaca mine nli rien to min co, zien to gdziibdolde to zha ne rapd dol. ⁸Gacnan to ganle naa ne nac naa Mgui ne pxeel Dios, naa rnabey dze rii, nanpaa naa pe nonguiel gac.

*Biac tib mgui ne mband tib nia
(Mr. 3:1-6; Lc. 6:6-11)*

⁹Bded ga, gol stib dze ne rdziiladz zho lo dziina, güey Jesús leñ yadoo win ne zob lad guiedz co. ¹⁰Lad grë miech ne ndxie leñ yadoo co, no tib mgui ne mband tib nia; porque laa zha farisé bñabdiidzlaque lo me dien pe nonguiela gunguiac me miech dze ne rdziiladz zho lo dziin. Sca bñabdiidz zho, sac quiaguib zho dien pe yquiaaqui zho me tsiezo zho me lo wxtis.

¹¹Dzigo pquiab me rëb me lo zho:

—Togase dien, zha run to zeene lëëtse dze rii rietsobe tib xpëcwxiiil to tib leñ blë nroob, ¿led zëëb

lëe rie to riebee to ma? ¹² Tel sca rquia zdoo to mēcwxiił, įgolguien ganle mazdraa goñ non miech lo tib mēcwxiił! Gacxe waa ible nonguiela guñ ne xyudar samiech ne, niicle maase dze nda nac dze co.

¹³ Dzigo rēbchaa me lo mgui ne nē nia ga:

—įBzigaa nia luu!

Zigne bzigaa mgui nia mgui, biacgazha, białaa zig nac stib miñe ndaantaque ga.

¹⁴ Grē zha farisé co, zigne brieē zho ga laa zho psilo bnediidz dien zha gdeeda diidz gut zho Jesús.

¹⁵ Bien Jesús sca no guic zho, dzigo mazd brieē me ga. Miech guizhiu ne zienal zhits me, grēse meñ rzacnē ne zienal ga, beenguiac me zho; ¹⁶ per pso me diidz lo zho, choot lo gzodiidzd zhow.

¹⁷ Ga brieēquia miñe pquiaa Isá, tib meñ ne biadteed xtiidz Dios padzeela, zeeñe rēb me:

¹⁸ Lēe meñ rii bzooblo naa guñ xtsiñ naa, rleynie naa me, rzac zdoo naa grē ncuaañe run me.

Zded naa zhiEspíritu naa gacnie me, me nac meñ ne cxobneñ xtidz naa lo grēse miech.

¹⁹ Tilnied me miech, sedzd yan me lo zho, sod me ro nēz goptsie me.

²⁰ Grē zha ne gzhe gzhele rac, zig tib goobgui ne quiaxweele, zig tib lē guier ne noyiidiele, csand me zdoo zho; zha ne mban rac lo xliaadz zho, csaand me zho.

Min co tsoxco me, haxta gan me grēse miech gacnañ miñe nac diidzli, ni tsienal zhow.

²¹ Haxta zeeñe gan me ye grē zha ne nacdraa zha Israel, laa zho gnalo me.

*Rëb zho men̄dox nacie Jesús
(Mr. 3:20-30; Lc. 6:43-45; 11:14-23; 12:10)*

²² Dzigo güeynie zho tib mgui lo Jesús rold lo mgui ni gacdaque gnee mgui, sac nosacsi men̄dox mgui. Znuse been̄guiac me mgui, gagazh psilo gon̄ mgui, psilo bnee mgui. ²³ Grë miech ne ndxie lo me ga, per nli bzee zdoo zho, rnee zho:

—¡Bay pe lëe men̄ qui naye nac Men̄ ne zëëble diidz ga cxeel̄ Dios!

²⁴ Zeene gon̄ zha farisé sca rnee grë miech co, rzachaa zdoo zho rnee zho: “Pe Dios nazho cxeel̄ me, ma ne rnabey lo men̄dox ma co nacie me, gane rrieelo run̄cxoon̄ me men̄dox.”

²⁵ Bien̄ Jesús sca rza guic zho, dzigo rëbchaa me lo zho:

—¡Ncuaane gacd gon̄ rnee to! Tel̄ tib wxtis nadien̄ lëëque zha ne nacie zho csilo til̄nie zho, ¿niacxe zac gnabey zho? Tib guiedza, tel̄ lëëque zha guiedz co til̄nie men̄ladz zho, led znuse lozh guiedz co; tib diigaa miecha, tel̄ lëëque zha til̄nie men̄lidz zho, ¿niacxe nitlod dii co? ²⁶ Scaque men̄dox nagon̄, tel̄ne lëëque lëe ma gun̄cxoon̄ samen̄dox ma, ipe nale na bnitlo ma! ²⁷ Nana ne squi rnee to Beelzebú nacie naa gane rrieelo run̄cxoon̄ naa men̄dox, ¿zha ne nacgrë to dzigo, cho nacie zho ne ye zho run̄cxoon̄ ma? Gase nagan̄le rlu doldox i quiayun̄ to, squi rnee to. ²⁸ Sangue tel̄ naa zhiEspíritu Dios nacie naa gane run̄cxoon̄ naa men̄dox, ni ga rlu gan̄le laa Dios psilo quianabeyle nu.

²⁹ ¡Masaque nac men̄dox zig tib zha ne no xfuers, zha ne gacladz cuee grë ncuaane no lidz zha co, none cxidoogazh zho zho! ³⁰ Tel̄ men̄doxa rlëënie

ma naa, ni nanle to ganle zha ne rlëe lo ne, gacnied zho ne.

³¹⁻³² 'Gacnan to ganle, grëse dol ne run miech, grë tel zha rguie zho, rdzibdee zho, niicle tel haxta gneenë zho naa, bii zun Dios perdon min co; sangue zha ne gneenë zhiEspíritu me, ib gundraa me zho perdon.

³³ 'Nanle to ganle zig nac yag nex, mine nac yag, min co nac nex ne rdeeda. Tel yag wena nex wen rquia low, togo yag ncuaangaaw, nex ncuaanaque rquia low. ³⁴ ¡Scaque to nagon zhin mendox! ¿Zha nan to nadien gac to miech wen, tel desde zdo to ntseeb? Miech ntseeb to gane squi rzë xtiidz to, sac gon, ¡grëse diidz ne rrie ro miech, zdo zho rzaw! ³⁵ Gacxe waa, zha ne mbe zdo, niapse diidz wen, diidz ndooladz nac xtiidz zho. Sangue zha ne ntseeb zdo, niapse diidz ntseeb, niapse diidznë rrieche ro zho. ³⁶ Ni gal dze ne gon gun Dios guielwxtis, ib tedsod zunquizh me miech tib tib diidz ntseeb, tib tib diidznë ne sca rrie ro zho. ³⁷ Sac gon zigne rzë xtiidz zho niina, min co cueequia zho gal dze co, o mincogaa cteedquie zho.

Racladz zha farisé gan zho milagr

(Mr. 3:31-35; 8:12; Lc. 8:19-21; 11:24-26, 29-32)

³⁸ Tib dze wbig zla zha farisé lo Jesús gza zho zla maistr ley, rëb zho lo me:

—Maestro, racladz no dzian no gun luu tib milagr, milagr ne glu nli Dios pxeel luu.

³⁹ Pquiab me rëb me lo zho:

—Nazdpaa ntseeb to, squitaa gocndip zdo to nëz lo Dios, ¿zha nacraa milagr ne racladz to gan to? ⁴⁰ Stibaque milagr gon gan to, lëe min co gac

zeen gaḷ dze ne laa Mgui ne pxeel Dios, tso len liu tson dze, tson guieel zigne bio Jonás len mel nroob co tson dze ni tson guieel. ⁴¹ Ni gaḷ dze ne gon guḅ Dios xquielwxtis me, ib steedquie zha Nínive miech ntseeb ne nac to i; sac gon zeene güeynee Jonás lo zho, grëse zho psaan xquielntseeb zho wbig zho nöz lo Dios, laa to nède to gon to diidz niicle ne lo to nu zo tib meḅ ne mazdraa non lo Jonás. ⁴² Scaque rein ne bzob nöz Sabá, steedquie me to gaḷ dze co, sac tel rein co goḷwi ganle pa lo guidzliu ne brie me biaadgaḅ me rey Salomón, biadquiaadiag me grë xtiidz Salomón. Ni to lo to nu zo meḅ ne mazdraa non lo Salomón, ni ib ronde to xtiidz me.

⁴³ Telne csaande to xquielntseeb to i gon, low lozh to. Sac to zig bzhaac tib zha ne psaci menḅox. Zeene brie me zdo zho, güey ma güeyquianzè ma grë dan zit güeyguib ma dien pa cuöz ma. Gonse ma rdziel zaatne cuöz ma, ⁴⁴ rëb ma: “Mazd laa naa gbireque guia naa zaatne brie naa ga.” Zeene biire ma bdziḅ ma zdo zha co, gon ma nroob lugar no, pale tib yu dets, ⁴⁵ nacne güeyaque ma güeyxi ma zgadz samenḅox ma, ma ne mazdraa ntseeb blëznie ma zdo zha co. ¡Dzigole mazdraa mban biaan zha co, lëdlegaa zigne goc zho glo! Scadaa nagon gdzieelo to.

⁴⁶ Laa me bii noneeque, zeene laa xniaa me ni zha bets me bdziḅ, racladz zho gzodiidznie zho me. Per brieelod nzëb zho haxta len yu, sac scataa miech guizhiu ne ndxie lo me ga. ⁴⁷ Dzigo rëb tib zho lo me:

—Laa xniaa luu gon ni zha bets luu quiamböz luu nöz ley, racladz zho gzodiidznie zho luu.

⁴⁸ Pquiab me rëb me:

—¿Xnia naa ye, bets naa ye?

⁴⁹ Blis nia me, blu me grë xpëédscuel me, dzigo rëbchaa me:

—Zha ne gon nac zig zha rii, lëe xnia naa ga, lëe bets naa ga. ⁵⁰ ¡Sac grëse zha ne run mine rnabey Pxoz naa men ne zob gbaa, grëse zha co nac bets naa, nac bzian naa, nac xnia naa!

13

Nac Xtiidz Dios zig zhobxtil

(Mr. 4:1-20; Lc. 8:4-15)

¹ Blozh ga brie Jesúe güey me ro nisdoo. Ga zob me, ² zeene gon me nzian miech ne nocaalsa lo me ga, nacte biepe me güeysob me tib len barcw zo gax ro nis co, psilo me pseed me zho.

³⁻⁴ Ndal grë ncuane pseed me zho, per niapse con cuent rnee mew lo zho. Lëe tib cuent ne bzodiidz me ga nu, rëb me:

—Tib zha name güey gon zhobxtil. Zeene laa zho quialaal zhob co, now bliaal gax ro nëz, now bliaal lad quie, now bliaal len yag guiets. Mine bliaal gax ro nëz ga, güey grë mguin znuse dow maw.

⁵ Mine bliaal zaatne nac lad quie, znuse znuse blana, ⁶ per zeene laa lo ngbidz brie, znusaque bgoola, bidzgaw; sac guien nroob low. ⁷ Mine bliaal zaatne nac len yag guiets co, zeene laa yag guiets pxii, bnitlogaw. ⁸ Sañgue mine bliaal zaatne nac lo liu naal, blana, brooba ni goca; lo tib tib zhob co no zhimziona brie galptsii zhob, now brie tsongal, nogaaw brie haxta tib gayoow.

⁹ Blozh ga, rëbchaa me:

—Zha ne racladz guien mine rne naa nu, yquiaa-diag zhow.

¹⁰ Zeene laa grë miech co zey, dzigo wbig xpëëdsuel me bnabdiidz zho lo me dien pe nac ne sca niapse con cuent rseed me grë miech.

¹¹ Pquiab me rëb me:

—Tel to, Dioszhal rlu lo to zha rnabey me, niicle ncuane mazdraa ngeetsa; laa grëraa miech ne gard gbig lo me, grielod guien zhow. ¹² Sac zha ne noxcole dien zha rnabey me, zdedraa me guielbiini lo zho guien zhow, laa zha ne noxcoda, mine riense zho, stiche mew. ¹³ Sca rseed naa zho parne tsoguic zho zha rnabey Dios, per nac zho niicle nzhial lo zho rwi zho, per peet rand zho; niicle nzhial diag zho per peet rond zho; ib peet rien d zho. ¹⁴ Lëë mine nac zho i bzeet Isá, zeene znu rëb me:

Nac miech qui, niicle peraa ron zho, per peet rien d zho;

niicle rwiraa zho, per peet rand zho.

¹⁵ Ne nlipaa miech nad, miech ndip zdoo nac zho, rreequia ntse zho diag zho, ntse zho lo zho; parne peet gond zho, peet gand zho.

Ib rien d zho zha gbig zho lo naa, ygab zho xnëz naa, parne csilaa naa zho.

¹⁶ 'Sangué to —rëb Jesús lo zho—. ¡Dichos to porne rien to pe ran to, ni riengaa to mine ron to!

¹⁷ Blactaa zha ne biadteed xtiidz Dios padzeela, blactaa zha ne güeynal mine nac diidzli, bzoobladz zho nian zho grë ncuane ran to niina, per bgaad zho nian zhow; bzoobladz zho nquiaadiag zho grë ncuane noquiaadiag to, per bgaad zho nion zhow.

¹⁸ 'Golquiaadiag sca ganle zha nac xcuent zha ne güey gon ga. ¹⁹ Ro nëz ne sca bliaal zhob co, sca

nac palal miech ne riepaa zha ne rienee Xtiidz Dios lo zho, per rioguicd zhow, rlozh ga rdziñaque mendox, rietiche ma tel palalse mine rien zho. ²⁰ Lad quie ne bliaal spalal zhob co, sca nac grè zha ne rley rcaania Xtiidz Dios; ²¹ per led dib zdood zho rcaania zhow, gane zeene laa miech rsilo rlëe lo zho, laa miech rtsidil zho porne rililadz zhow, rsaanga zhow. ²² Nogaa zho nac zig nac len yag guiets co. Rquiaadiag zho Xtiidz Dios, per rsilo zho lel grè ncuaane no lo guidzliu rii mazdraa rionie guic zho, rquidie grè dimi zho. Grè ncuaan co rioxcora zho, laa ne tsonie Xtiidz Dios guic zho, min co rquiaqui ib rund zho mine rnabey me. ²³ Laa liu naal ne bliaal mine scataa goc ga, sca nac grè zha ne dib zdoo rquiaadiag Xtiidz Dios, rien zho zha naca, ni rban zhow zigne rnabeya. Rrieequia grè ncuaane run zho, no zho nac zig mzion ne brieegalptsii zhob ga, no zho nac zig mine brieegalsala, nogaa zho nac zig mine brieegayooow ga.

*Zha nac xquielrnabey Dios
(Mr. 4:30-34; Lc. 13:18-21)*

²⁴ Biire pcaalsa miech lo me stib, dzigo psiloque me pseed me zho con stib cuent, rëb me:

—Ziaad gac xquielrnabey Dios lo guidzliu rii zig bzhaac tib men ne gon zhobxtil. Niapse zhob wen, zhob nal gon me, ²⁵ per no tib zha ne rlëe lo me, gol tib pcow liu, horne grëse miech nixguies, güey zho güeylaal zho xmidz guizh ncuaan zaatne gon me.

²⁶ 'Zeene laa zhobxtil co psilo blan mzion, hor coraa blu laa guizh ncuaan co no lada. ²⁷ Grè zha ne quia xtsiin me, zeene gon zhow güey zho rëb

zho lo me: “Tebaa gaṅ luu gaṅle, dipse lad xoob luu zëëb guizh ncuaan, ¿dieeṅ pa brieew gochniw ga?” ²⁸ Dzigo rëb me: “Rieṅ naa no cho tib zha ne rlëë lo naa, zha co beenṅ dziin co.”

’Gocladz zho, hor cogazh nielaadz zhow per bzhiguielḁ me, ²⁹ rëb me lo zho: “Tsielaadzde tow, sac telḁ glaadz tow niina ye zhobxtil gliadzniew. ³⁰ Goḁsaan sca zëëba ga, na zeene laa wlaap gac, hor co gnabey naa zha ne quiits zhob, ctogazh zhow gdziinḁ zhow tib lad tseca; lozhraa ga quiits zho zhob, tsasa ga, glansow ro yu.”

³¹ Blozh ga bzeet me midz moxtaz, rëb me:

—Nac xquielḁrnabey Dios zig nac tib midz moxtaz ne ran miech dan rii. Naṅ to gaṅle midz moxtaz nac midz ne mazdraa win, ³² ni telḁ gacbniw, rrooba ni lëëw rroobraa lo grë guizh ne ran zho ro yu, raca lal tib yag nex, haxta rdziṅ grë mguinḁ rzhixcuaa ma zhiptsieez ma lo grë zhicwa.

³³ Rëbaque me:

—Nac xquielḁrnabey Dios zig nac ncobi ne rquiaa meṅ wnaa lad ncob ne riaa guietxtil. Niipaque ncobi riots tsonḁ lmud rin, ni dib nacse ncob co rzibe.

³⁴ Grëse miṅe pseed Jesús grë miech co, niapse con cuent bnee mew lo zho. ³⁵ Ga brieequia miṅe bzeet zha ne biadteed xtiidz Dios padzeela, zeene rëb zho: “Niapse con cuent cseed naa miech, sca gnee naa lo zho grëtaa ncuaane gard gacnaṅ miech wlal ne bre guidzliu.”

Zha nac xcuent guizh ncuaan co

³⁶ Blozhse bnee Jesús lo grë miech co guey zho, yeque me laa me zey gza xpëëdscuel me. Bdziṅ zho

ro yu, ga bñab zho lo me siguiel me gnee me lo zho dien zha nac xcuent guizh ncuaan ne bzeet me ga.

³⁷ Dzigo rëbchaa me lo zho:

—Golgona sca, znu gon nac cuent co. Rrieequia gon naa ga nac men ne gon zhob co. ³⁸ Liu ne bñiaaw ga, nac lo guidzliu, zhobxtil co nac grë miech ne nole xnëz Dios, laa guizh ncuaan co nac grë zha ne no lадznia mendox. ³⁹ Zha ne güeygan guizh ncuaan co, lëë mendox ga. Dze lo wlaap co, gac dze ne gun Dios xquielwxtis me, zha ne tsie wlaap ga, lëë anjl ga. ⁴⁰ Ni zigne sca cuee zho guizh ncuaan co lad zhobxtil, gzëëg zhow, scapaa nagon gal dze ne gac xquielwxtis Dios, ⁴¹ sxel naa grë xanjl naa tsie zho tsiebee zho grë zha ntseeb, zha ne sca runctal xtol grëraa miech, lad zha ne no xnëz naa. ⁴² ;Grëse zha ntseeb co, hor co laa zho guey lo guidox ne rieguial zho! Ga tso zho goonnë zho, haxta gow lay zho lo guielnëdox co. ⁴³ Laa grë zha ne güeynal mine nac diidzli, zha co gdziñ zaatne rnabey Pxož naa, masaque zig xbiini ngbidz glu zho ga. ;Zha ne racladz guieña yquiaadiag zhow!

⁴⁴ 'Ziaad gac xquielrnabey Dios zig tib ncuaan non ne noliu tib lo xcuaa miech. Zha ne gdziel tib ncuaane sca non, ib tedsod zie zho sto zho grëse ncuaane rap zho grieë dimi si zho liu co, parne gunchen zho ncuaan non co.

⁴⁵ 'Zha ne rzëëb lo xquielrnabey Dios ziaad gac zho zig tib zha ne rzi quie perl mine mazdraa niazh. ⁴⁶ Zeene ron zho pa no tib perl co, rto zho grëse ncuaane rap zho, rie zho rzi zhow.

⁴⁷ 'Nacaque xquielrnabey Dios, zig tib guieñ nroob ne rgaa mel niina, zeene rsëëb ngooz mela

lo nis grë lose meġ rtopa. ⁴⁸ Rlozhse riodzëw, dzigo rbeequia zhow ro nis, garaa rzob zho rbe zho grë meġ co; ma ne rquiin laa tib chicuid zole rio ma, laa ma ne rquiind rsëëb zho. ⁴⁹ Scapaa nagonġ gac miech gal dze ne gunġ Dios xquielwxtis me, ziaad grë xanjġ me cuee zho grë zha ntseeb lo zha ne no xnëz me, ⁵⁰ tsieronġ zho zho lo guidox ne rieguialġ zho. Ga tso zho goonnë zho, haxta gow lay zho lo guielnëdox co.

⁵¹ Blozhse ga, rëb me lo zho:

—¿Pe bien to na zha nac grë miñe blozh bne naa lo to nu?

Grëse zho pquiab rëb zho:

—Bien now.

⁵² Dzigo rëbchaa me:

—Tib zha ne rienle zha nac grë ley ne psan Moisés, ni squi guienġ zho zha nac zhiwseed Dios miñe zialnie naa niina, masaque nac zho zig tib zha gol ne quianie chop lo ncuaanġ non lidz zho, quianie zho grë miñ gol-le ni quianiequegaa zho miñ cub.

Güey Jesús ladz me

(Mr. 6:1-6; Lc. 4:16-30)

⁵³ Blozhse sca bzodiidz me grë cuent co lo zho, laa me brieë ga zie me nëz ladz me.

⁵⁴ Bdzinġ me ga güey me yadoo, psilo me pseed me grë miech co. Per nli rzee zdoo zho ron zho grë miñe rnee me, rnabdiidzġsa zho rnee zho:

—¿Pazhe waa squitaa pseed meñ qui? ¿Zha nac guielbiini ne squitaa rap me i, ne rnee miech ndal grë milagr ne runġ me? ⁵⁵ Tib zhinse ngurëëyag name nac me. Led lëë xingan Marí i, bets me name nac Jacob, nac José, nac Simón ni Judas; ⁵⁶ grë

bzian mew, nu no zho grë zho. ¿Pa dzigo güey me wseed qui?

⁵⁷ Ib been_{casd} zho me, haxta rlëë zho lo me. Zeene gon me sca rac zho, rëb_{chaa} me lo zho:

—Zha ne rteed xtiidz Dios, mazd wen rnee miech lo zho stib dan, stib guiedz, lëdle ladz zho ni men_{lidz} zho ni men_{ladz} zho nëd gun_{bey} zho.

⁵⁸ Beend me nzian milagr ga, sac sca ndip zdoogrë miech co ib nëd zho nliladz zho cho nac me.

14

Gut Juan Bautist

(Mr. 6:14-29; Lc. 9:7-9)

¹ Len dze co bin rey Herod (men ne rnabey Galilé) grë ncuaane run Jesús, sac tel pa lotaaw zëëb xtiidz me; ² dzigo rëb Herod lo grë zha ne run dziin lo me:

—Rien naa lëë Juan Bautist ga quiayun grë min co, segur brieegan me.

³ Sca rnee Herod sac nanwen me zha been me Juan. Me bnabey bgaa Juan bzoob zho Juan caden bio Juan ladzguiib, ⁴ loxaque ne rnee Juan lo me nonguielda ga lëëque Herodí ptsieelnia me, sac tsieelpaa bets me Lip nac Herodí. ⁵ Gocladz Herod niut me Juan, per bdzieb me men_{guiedz}, sac rleynie zho Juan, rien zho xtiidz Dios ziadteed Juan lo miech.

⁶ Laa tibtaa dzew, lëëtaque noyac zhilni Herod dze ne bloozh me stib iz, bded tib xindzoo Herodí squi ndxie grë zha ne zobnie me psilo ndzoo biee ndzoo. Bdziladz me gon me zha biee ndzoo, ⁷ haxta brieer me rëb me: “Ncuaane gacladztaa luu gnab luu, znedz naaw.” ⁸ Per glole pquuil

Herodí ndzooop, nacne rëb ndzooop lo me: “Mìne racladz naa, xooob guic Juan tib leñ bandej gneedz luuw lo naa niinagazh.”

⁹⁻¹⁰ Zeene bin Herod sca rëb ndzooop, mbanse rac me; per rdeetraaw diidz niab me grieeloda, sac grëse zha ne zobnie me ga, bin zho rëb me zdeed me ncuaañe gnabtaa ndzooop. Dzigo racse me pxeel me zha ne güeychug guic Juan leñ ladzguiib.

¹¹ Zeene wbire zho, zhoobse guic Juan tib leñ bandej bdeed zhow lo ndzooop, dzigo güey ndzooop güeydeed ndzooopa lo xniaa ndzooop.

¹² Zeene gocnan xpëèdscuel Juana, güey zho güeylis zho me ga güeyqueets zho me. Blozh ga güeyzodiidz zho lo Jesús zha bzhaac me.

Bguiaañ Jesús gaay mil miech

(Mr. 6:30-44; Lc. 9:10-17; Jn. 6:1-14)

¹³ Zeene bin Jesús sca bzhaac Juan, dzigo brieec me ga bzëeb me barcw zie me tib zaatne guiend miech. Per znuse bien diidza, nzian grë guiedz co zha ne gocnaña, tib ro nis güey zho, glole zho bdziñ zaatne no gdziñ me ga.

¹⁴ Laa me noyet leñ barcw, zeene blis lo me gon me laa grë miech guizhiu co ndxiele ga; pquia zdoo me zho, beenguiac me grë mguidz ne zienie zho.

¹⁵ Laa dze ziedzelew, wbig xpëèdscuel me rëb zho lo me:

—Mazd gudz lo grë miech qui guey zho na, zeena guiob tsie zho grë guiedz win ne ndxie gax i tsiesi zho ncuaañe gow zho; sac gon laa dze bdzele.

¹⁶ Pquiab me rëb me lo zho:

—¿Pe nacne guey zho squise? To none gdeed ncuaane gow zho.

¹⁷ Rëbchaa zho:

—¿Per pe dien yguiaan no zho? Pe rnase gaay guietxtil ni chop mel ne ziaadnie no nu, lo grëtaa miech qui.

¹⁸ Dzigo bnabey me zho güeynie zho guietxtil co, güeynie zho mel co lo me, ¹⁹ ni bnabey me grë miech co bzob zho lo grë guizh nguia ne zëëb ga. Horco bzheñ me gza guietxtil co ni grop mel co, blis lo me nëz gbaa, bdeed me xquizh lo Dios. Blozhse bdeed me xquizh, beengrol me gza guietxtil co, mel co ne, zigse rdeed mew lo xpëëdsuel me scase scase bdiiz zhow lo grë miech co. ²⁰⁻²¹ Grëse zho dow zho haxta zaatne bieltaa zdoo zho. Miech tafa, zha bguise rgaa zig gaay mil, nantragaa grë men wnaa, grë mëëdla; ni zeene blozh dow zho, scase ncuaane nroob biaan, biodzë tsiipchop chicuid bio grë guietxtil co, bio grë mel co.

Rzë Jesús lo nisdo

(Mr. 6:45-56; Jn. 6:16-21)

²² Zeene blozh ga, bnabey Jesús xpëëdsuel me bzëëb zho len barcw, zeena zienerga zho tedquia zho stib nëz ro nis co; laa me bii blëz ga, nozonëz me grë miech co. ²³ Blozhse bzonëz me zho, dzigo güey me tib guic gui zob gax ga, güeyzodiidnie me Dios, tipse me zo ga laa liu pcow.

²⁴ Horco laa barcw ne zie xpëëdsuel me ga no lo nis co, ib gacd csëëniob zhow, sac rriee me rtsire mew, nëzrii nëzrec raca lo nis. ²⁵ Merle guini liuw, tibaque zeene laa me bdziñ zaatne zie zho ga, tib lo nis co ziezë me.

²⁶ Zeene gon zho laa men co sca ziaad-zë lo nis co, bdzieb zho, broptsie zho rnee zho:

—jTib ndziin i gon ziaad i!

²⁷ Dzigo bnee me lo zho rëb me:

—jGdziebde to, naa zial nu!

²⁸⁻²⁹ Pquiab Pedr rëb Pedr:

—Tejne luu i ziaad i, bneedz diidz së naa lo nis glanso naa lo luu i.

—jDë sca! —rëb me.

Lëëlëd biet Pedr len barcw, laa Pedr ziezële lo nis co ³⁰ zeene gon Pedr scataa rlis me low, bdzieb Pedr. Tibaque zeene bien Pedr laa Pedr nodedquiele low, hor co broptsiedan Pedr, rbedz Pedr me, tsiebee me Pedr ga.

³¹ Dzigo wbig me bzhen me nia Pedr, bzoli me Pedr lo nis co.

—jAque luu gon Pedr! —rëb me—. ¿Pe nacne gocchop guic luu? ¿Gard gon gliladz wen luu cho nac naa?

³² Zeene laa me biepnie Pedr len barcw, laa me co blëz. ³³ Grëraa zha ne no len barcw ga, rleynie zho me, rzee zdoo zho rnee zho:

—jNasi nagon ndion no nli Xpëed Dios nac luu!

³⁴ Zeene bdziñ zho stib nëz ro nis co, zaatne rnee zho Genesaret, ga biet zho barcw. ³⁵ Grë miech co zeene gocnan zho laa me bdziñ ga, znuse znuse pxoon zho diidz grëraa guiedz ne ndxie gax ga. Dzigo brieë grë miech co, güeynie zho grë men rzacnë lo me, ³⁶ rnab zho lo me siguiel me maase ni xabse me xen grë men rzacnë co. Grëse zha ne bzhen ni xab me, biac zho.

15

Ncuaane runctal xtol miech (Mr. 7:1-23)

¹ Tib dze, bdziñ bla zha farisé ni zla maistr ley ne ziaad nēz Jerusalén, lo Jesús; rēb zho lo me:

² —¿Pe nacne dieñ zianałd xpēēdscuel luu miñe blu xmengol ne, pe nacne zeene laa zho row, ib rguuibd zho nia zho zigne nopaa tsara?

³ Pquiab me rēb me lo zho:

—¿To waa, pe nacne quiaguiits to xley Dios? Golguien ganle laa ne gun to miñe rnabey Dios zigne naca, leł ncuaane blu xmengol to, miñ co zianał to. ⁴ Led znu gon rnee lo xley Dios: “Gon pxoz luu, gon xniaa luu”, ni rneew: “Zha ne quie pxoz, quiegaa zho xniaa zho, ib none guet zho.” ⁵ Laa to gon rnee to: “Peet nacda gund zho xyudar xmengol zho niicle no me liaadz, totsaque gdeed zho gon.” ⁶ Tib lad rsañ to xley Dios, miñe blu xmengol to miñ co noxcoraa to. ⁷ ¡Loxaque guielwquidie qui no to! Rquiaalo to miech wen nac to, per lēēpaa miñe run to i ga bzeet Isá zeene rēb me:

⁸ Grē miech rii, rquiaalose zho runnon zho naa, rond zho diidz gun zho miñe rnabey naa.

⁹ Zhlēse nac grē ncuaane run zho, rnee zho laa zho riaadgan naa;
sac niapse guicle zho riab grē wseed ne quialu zho lo miech.

¹⁰ Dzigo bnee me lo grē miech ne ndxie lo me ga, rēb me:

—Golquiaadiag miñe gni naa lo to nu, ni goltsoxco guien to zha naca. ¹¹ Golgacnan ganle, grē ncuaane rdziñ zdoō miech, led miñcod runctal xtol zho;

sinque grē ncuaañ ntseeb ne rza guic zho, diidz ntseeb ne rriee ro zho, miñ co runctal xtol̄ zho.

¹² Horco wbig xpëēdscuel me, rëb zho:

—¿Pe bien̄ luu gan̄le blëē zha farisé gon̄ zho sca rëb luu lo zho?

¹³ Pquiab me rëb me:

—Grëse yag ne squi been̄bnid Pxoz naa men̄ ne zob gbaa, ib none laaw gliaadz zolo zolow.

¹⁴ Golsaan zho, nli zha noseed miech per nac zho zig nac zha ne rold lo. Ni nan̄le to gan̄le, tel̄ tib zha ne sca roldle lo ni xen̄aque zho nia stib zha ne ran̄d, zaatne nac tib len̄ blë, ib tedsod grop xcuaa zho tsietsobe ga.

¹⁵ Bdedse ga, wbig Pedr lo me rëb Pedr:

—Bzhiguiel̄ bnë lo no dien̄ zha nac diidz ne në luu ga, ne rnee luu led ncuane rowd miech runctal xtol̄ zho.

¹⁶ Pquiab me rëb me:

—¿Pe niicle to rien̄daquew dzigo lëē? ¹⁷ ¿Pe rien̄de to grē ncuane row miech, led miñcod runctal xtol̄ zho? Sac grē ncuane row zho rdziñda len̄ zdoomban zho, zhaa zaatne rdziña; tib rietedsew xcuerp zho, rlozh ga rrieehaw. ¹⁸ Sañgue grē diidznë ne rriee ro zho, zdoomban zho ga rzaw, ni lëē miñ co nac miñe runctal xtol̄ zho. ¹⁹ Zdoomban zho nac zaatne rza grē ncuaañ ntseeb ne run̄ zho, zig nac: zeene rio zho grë zhgab yozh, zeene rut zho samiech zho, zeene rionie zho zha ne nole tsieel, zeene rionie zho zha ne nacd tsieel zho, zeene run̄ zho guiel̄gbaan, zeene lega rnexuu zho samiech zho, zeene rneenë zho samiech zho.

²⁰ Grë ncuaan ntseeb co nagon nac mine runctal xtol miech, gunctald zho xtol zho niicle tsard nia zho zigne nacpaa grë zhiwseed mengol.

Biac xpëed tib wnaa zit
(Mr. 7:24-30)

²¹ Ga brieë Jesús, güey me haxta nöz Tiro ni nöz Sidón.

²² Nöz co no me güey tib wnaa ne ziaad lo xtii zha Canaan lo me, nguiedz zëeb tsi wnaa co rnab me lo Jesús siguiel Jesús tsiegunguiac tib xpëdwnaa me nosacsi mendox. ²³ Per ib pquiabd Jesús lo xtiidz wnaa co, dzigo wbig xpëedscuel me, rëb zho:

—Mazd bzhiguiel pquiaadiag mine rnee wnaa qui, bui ganle zha ncuëtaa zëeb tsi me nal me zhits ne.

²⁴ Pquiab Jesús rëb me:

—Ziald naa par gun naa xyudar zha zit, sinque laa Pxoz naa pxeel naa par gun naa xyudar grë zha Israel ne rzac zig grë mëcwxiiil ne zonziab lo xbaxtor.

²⁵ Scaque nonee me laa wnaa co wbig pquiits-gzhib lo me.

—Bzhiguiel —rëb me—, been tib guielnzaac been xyudar naa.

²⁶ Rëbcha Jesús lo me:

—Nonguielda gon, cob ne guiet ne no nia mëed gdeed new lo mëcw.

²⁷ —Nliw, scaw —pquiab wnaa co—, per niicle mëcwa name rsaanaque bizhuan ma rbig ma row ma mine rrieengaa nia mëed.

²⁸ Horco pquiab Jesús rëb me:

—¡Squiw nagon! ¡Rlu nli dib zdoos luu rnaloo luu naa! Gacxe waa miñe rnab luu i guñ naa, niinagazh laaw gac.

Horcogazh biac xpëed wnaa co.

Nzian miech ne beenquiac Jesús

(Mr. 8:1-10)

²⁹ Nêz co wbi Jesús bdziñ me ro Nisdoo Galilé.

Ro nis co no me, miech guizhiu ne pcaalsa lo me. Tib dze gon me scataa nzian miech co, dzigo güey me güeysob me tib guic gui win zob gax ga.

³⁰ Ga zob me rdziñ grë miech co rdziñnie zho grë zhimguidz zho lo me, no zho zienie grë zha ne nê ni, no zho zienie grë zha ne rold lo, grë zha ne guiend tib nia, grë zha ne guiend tib ni, grë zha ngop, ni grëragaa zha ne rlan pe stib guielguidz; grëse zho beenquiac me. ³¹ ¡Ncuaane gzee zdoos ne goc ga! Grë zha ne ni tib diidz gard gnee, per nli rley zho laa zho psilo rnee; grë zha ne guiend tib ni, guiend tib nia, laa ni zho laa nia zho biaan zigne no gaca; grë zha ne rgob ni, haxta rias zho laa ni zho goc-wen; grë zha ne rold lo, rlozhd gzee zdoos zho grë ncuaane ran zho. Grëse miech ne ndxie ga, rzee zdoos zho, rley zho roolnie zho Dios.

³² Dzigo bredz me xpëedscuel me rëb me lo zho:

—Rquia zdoos naa grë miech rii. Nadzele rac tson ngbidz blanso zho lo ne nu, ni na quianiedraa zho pe gow zho. Telne squise gzonêz naa zho, nend pa lo zie zho nêz ycow zho.

³³ Pquiab zho rëb zho:

—¿Per pe yguiaan ne zho? ¿Pa guioxi ne guielwagw ne yquiin grëtaa miech qui dan rii, naca zaatne guiend miech?

34 Dzigo bñabdiidz me lo zho, rëb me:

—¿Bla guietxtil ziaadnie to i?

—Gadzaquew no —rëb zho—, ni chop tson mel win.

35-36 Dzigo bñabey me grëse miech co bzob zho lo liu. Blozh bzhen me gza gadz guietxtil co, ni gza mel co, bdeed me xquizh lo Dios; blozhse bdeed me xquizh, zigse rungröl me guietxtil co scase scase rdeed mew lo xpëëdscuel me rguiz zhow lo grë miech co; scaque been me gza mel co.

37-38 Grëse miech co dow zho haxta zaatne bieltaa zdoo zho. Miech guizhiuw, zha bguise rgaa zho maase tap mil, nandragaa grë men wnaa, grë mëëdla; ni zeene blozh ga bii biodzë gadz chicuid bio grë mine biaan.

39 Blozhse bnee me lo grë miech co, blozhse bzonëz me zho, dzigo laa me bzëëb len barcw zie ne nëz xtan zha Magdal.

16

Gocladz zha farisé niungüet zho Jesús

(Mr. 8:11-21; Lc. 12:54-56)

1 Magdal no Jesús, bdziñ bla zha farisé ni zla zha saducé lo me, gocladz zho niungüet zho me dien pe nxiñd me tib diidz, pe tib ncuaañe nonguieldgaa niun me. Rquiaalo zho rnab zho lo me gun me pe tib milagr, zeena gliladz zho nli Dios pxeel me.

2-3 Dzigo pquiab me rëb me lo zho:

—¿Pe nlipaa rnee to riende to zha nac grë ncuaañe noyac len dze rii! Zha zëëb dzigo runbey to pe rlu lo xcow. Zeene ran to rquia xcow nizhnie bdze dze, rienle to guiet stib dze co zriee lo ngbidz. Sil ne ranгаа to quia xcow nizhnie, quia xcow

nlaan zhan gbaa, rienle to guixoo guiab dze co.
⁴ Nazdpaa ntseeb to, squitaa gocndip zdo to nēz lo Dios, ¿zha rnaraa milagr ne racladz to gañ to? Stibaque milagr goñ gañ to, tib miñe gac zigne bzhaac Jonás.

Blozhse sca rēb me lo zho, zoque zho ga, ziega me.

⁵ Zeene brie zho ga, zoladzd xpēēdscuel me ney zho guietxtil ne niow zho. ⁶ Lega nacle psilo me nonee me lo zho, rēb me:

—Golguien goñ, napaa noyab to lo zhincobi zha farisé, lo zhincobigaa zha saducé.

⁷ Zeene goñ zho sca rēb me, rneehaa zho:

—Porne nagon ziaadnied ne guietxtil, gane squi rnee me lo ne.

⁸ Bien me sca nonee zho, dzigo rēb me lo zho:

—¡Gardaque lēē guien to cho nac naa! ¿Pe nacle tso to zhizhgab guietxtil? ⁹ ¡Ni lalnu lēē peet riende to! ¿Pe rsoladzde to zeene gaayaque guietxtil bguiaan ne gaay mil miech, bla chicuida biaan? ¹⁰ Scaque zeene gadzaque guietxtil ni bgaaw dow tap mil miech, ¿pe niicle miñ co rsoladzdraa to? ¹¹ ¿Zha nac dzigo rzac to guietxtil nozet naa? Golguien ganle zhincobi zha farisé, zhincobi zha saducé ni naa.

¹² Dzigoraa bien zho led ncobidpaa rzeet me, sinque rēb me lo zho gap zho cuidad lo zhiwseed zha farisé, lo zhiwseedgaa zha saducé.

Bnee Pedr cho nac Jesús
(Mr. 8:27-30; Lc. 9:18-21)

¹³ Bdzin Jesús nēz xtan zha Cesarea de Filipo grē xpēēdscuel me, nēz co no me bnabdiidz me lo zho rēb me:

—¿Cho dien ron to rnee miech nac naa?

¹⁴ Pquiab zho rëb zho:

—No zho rnee Juan Bautista, no zho rnee LÍw, no zho rnee Jeremíw, men ne biadteed xtiidz Dios padzeela; nogaa zho rnee no cho stib men ne ziadteed xtiidz Diosa zig biaad zha ne biaad padzeela.

¹⁵ Dzigo rëb me lo zho:

—¿To waa? ¿Cho rzac to nac naa?

¹⁶ Pquiab Pedr, rëb Pedr:

—¡Luu nac Men ne zëëble diidz ga cxeel Dios! ¡Xpëëd Dios nac luu!

¹⁷ Dzigo rëbcha me:

—Dichos luu Simón (xingan Jonás) brieë diidz qui ro luu, sac gon Pxoz naa men ne no gbaa, men co bneedz guielbiini qui lo luu, nacda ncuaane cho miech nëw lo luu. ¹⁸ Ye naa gon niina laa naa gni ganle cho nac luu, luu nac zig tib quie, ni quie ne gon squi nac gzhixcuaa naa xyadoo naa; tsod zha ne grieelo gnitlo yadoo co, per ni guielgut gnitloda. ¹⁹ Laa naa rzo luu, luu gnee Xtidz naa lo miech zeena gacnan zho zha grieelo yгаа zho zaatne rnabey Dios; luu gac zig tib zha ne rey liow, tel zha cow, zha zac cxal ro yu, ni zha zac csiooga.

²⁰ Dzigo pso me diidz lo zho choot lo gneed zho, me nac Men ne zëëble diidz ga cxeel Dios.

Bzeet Jesús zha gun miech me

(Mr. 8:31-9:1; Lc. 9:22-27)

²¹ Len dze co psilo Jesús bzeet me lo xpëëdscuel me zha csacsi miech me. Rëb me nroob ncuaane cteed zho me, zeene laa me tsie Jerusalén; grë zha non lo menguedz, grë pxoz ne rnabey, grë maistr

ley, ible stsidil̄ zho me ni haxta zut zho me; per zeene gac tson̄ ngbidz gut me, laa me grieeban.

²² Gon̄ Pedr zha rnee me, dzigo bredzaque Pedr me blisqui Pedr lo me dien̄ pe nacne rnee me laa me guet. ²³ Zeene bin mew, zoque Pedr ga, biecw me rëb me:

—jBiche lo naa nu men̄dox! jLoxaque no luu par gun̄güet luu naa! Zienied guic luu miñe rnabey Dios, sinque miñe rleynie miech, miñ co zienie guic luu.

²⁴ Dzigo bnee me lo zho, rëb me:

—Zha ne racladz sëeb xnëz naa, none cueeladz zho zho, none lëb zho guiaadnal̄ zho miñe rnabey naa, niicle tel̄ miñ co yquiaaqui csacsi miech zho. Nodne yquia zdoo zho xquiel̄mban zho, ²⁵ sac zha ne yquia zdoo xquiel̄mban, lel̄ znu nitlo zho; sangue zha ne sca cueeladz xquiel̄mban porne no zho xnëz naa, ib zгаа zho tib guiel̄mban ndzon ne gdziñd dze lozh. ²⁶ Zha ne zienie guic loxaque gapchen, ¿pa dien̄ yquiina lo zho, tel̄ lëew yquiaaqui guey zho gabil? ¿Niacxe zrieelo gdziib zho dimi, laa zho len̄ gabil? ²⁷ Naa ne nac naa Mgui ne pxeel̄ Dios, zdziñ dze ne gbiire guial̄ naa stib, guial̄nie naa grë xanj̄l naa, glu naa gan̄le pa lotaa men̄ nroob nac Pxoꝝ naa; dze co gded naa miñe tsieguial̄ tib tib miech, tel̄ zha wban zho. ²⁸ Ib tedsod lo grë zha ne ndxie nu niina, bii no zha ne gan̄ gan̄le, zeene laa naa csilo gnabey lo guidzliu rii.

17

Bdzëëlo Jesús

(Mr. 9:2-13; Lc. 9:28-36)

¹ Goca xoop ngbidz, bredz Jesús Pedr, Jacob ni Juan bets Jacob güeynie me zho tib guic gui glaa.

² Guic gui co no zho, zeene gon zho laa me bdzëelo. Masaque biinidoo rriee lo me, pale lo ngbidz; xab mew, per nli rquiabniw, masaque biini ne rrona. ³ Tibaque zeene gon zho laa Moisés ni Lí men ne biadteed xtiidz Dios padzeela, no-zodiidznie me. ⁴ Rdzieb zho, lo dzeb co brieer ro Pedr rëb Pedr:

—Maestro, jtebaa zha grieelo guiaan ne nu! Telne racladz luu, na maase gzaa no tson yu yag xiid nu, tiba cuëz luu, tiba cuëz Moisés, stiba cuëz Lí.

⁵ Scaque nonee Pedr, zeene znuse pquia tib xcow ngali zaatne zo zho ga, masaque biini ne rron xcow co, lo xcow co bin zho zëeb tsi tib men co, rnee me:

—Lëë xpëed naa i gon, rleynie naa me, rzac zdoonaa mine quiayun me. Mine rnee me, golgona.

⁶ Mazdraa bdzieb zho bin zho sca rnee men co, lëëlëd pquiitsgzhib zho haxta bdzin lo zho lo liu.

⁷ Dzigo wbig Jesús, pcaannia me zho, rëb me:

—Golsoli, gdziebde to.

⁸ Zeene blis lo zho bui zho, mese zo ga, gon draa zho schop men co.

⁹ Blozhse ga, laa zho wbi ga. Cho gui co ziadzëebnie me zho, pso me diidz lo zho mine gon zho ga, choot lo gzodiidzd zhow, nieeda gal dze ne laa me brieaban.

¹⁰ Dzigo bnabdiidz zho lo me, rëb zho:

—¿Bay zha nacne rnee maistr ley, glo Lí no guiaad stib, dzigora guiaad Men ne zëeble diidz ga cxeel Dios?

11 Rëbchaa me:

—Nliw, ible nacle diidz ne glo Lí guiadseed miech gon zho xtiidz Dios. 12 Ni gacnaŋ to ganle laa me biaadle, per beenbeyd miech me, leĭ psacsi zho me been zho me miŋe gocladztaa zho; ni ib tedsod gon, scaque csacsi zho Mgui ne pxeel Dios.

13 Zeene blozh sca rëb me, dzigo bien zho Juan Bautist ga rzeet me.

*Biac tib mēēd ne nosacsi men̄dox
(Mr. 9:14-29; Lc. 9:37-43)*

14 Zeene blozh biet zho cho gui co, gon zho miech guizhiu ndxie ga quiambëz Jesús. Lad co brieē tib mgui, wbig me lo Jesús, pquiitsgzhib me lo Jesús, rëb me:

15 —Laa naa rnab lo luu, bzhiguiel beŋguiac xpëēd naa, nrooble nosacsi guidz gutye win. Blac-taa ziyobe win lo gui, ziyobe win lo nis ne. 16 Blansonie naa win lo xpëēdscuel luu nu, per rrieelod zho guŋguiac zho win.

17 Dzigo rëbchaa Jesús lo xpëēdscuel me:

—¡Pe na squitaa miech ntseeb nac to, ib nēde to gnalo to Dios! ¿Palal tiemp ne so naa gne naa lo to? ¡Ncuaane cxecwdraa naa lo to squi nac to! ¡Goltēnie mēēd qui nu!

18 Dzigo goctox Jesús lo men̄dox ne nosacsi mēēd co, ben̄cxoon me ma, hor cogazh laa mēēd co biac.

19 Haxta wbiraa zho ga, wbig zho lo me bnabdiidz zho dien pe nacne brieelod zho niun̄cxoon zho men̄dox ne nosacsi mēēd co. 20-21 Dzigo rëbchaa me:

—Brieelode to niun̄cxoon to ma, sacne rnalode to Dios. Tel̄ niaca miŋe rnalole to Dios siquier palal yeen, gzoob ne siquier lal tib midz moxtaz, niicxe

ncuaane mazdraa ngan gnab to lo me, zun mew; tsod ncuane grieelod gun to.

Bzeet Jesús laa miech csacsi me

(Mr. 9:30-32; Lc. 9:43-45)

²² Xtan zha Galilé no zho, tib dzew rëb me lo zho: —Naa ne nac Mgui ne pxeel Dios, ib znaaz miech naa, ²³ haxta zut zho naa; per zeene gac tson ngbidz gut naa, zriebaan naa.

Zeene bin zho sca rnee me, bio zho guielne, mbanse rac zho.

²⁴ Bdzin me guiedz Capernaum, loxaque bzëeb me lad guiedz, laa zha ne rtop dimi ne razh yadoo wbigle lo Pedr, bhabdiidz zho dien pe rguizh me dimi co. Pquiab Pedr rëb Pedr lo zho:

²⁵ —Rguizh mew, ¿pe nacne quizhd mew?

Zeene bdzin zho len yu ne rbëz me, gardle guiab Pedra lo me, glome bhabdiidz rëb me lo Pedr:

—Zig nac dimi ne razh lo men ne nac rey dien, ¿pe ye xpëed me rguizha, te loxaque zha zit rguizha ye?

²⁶ Pquiab Pedr rëb Pedr:

—Zha zitse rguizha.

—Nligaa sca naca —rëb Jesús—. Zha ne nac mëed nodne quizh zho, ²⁷ per par guiabd zho rdziond ne diidz, güey güeyron xanzuel luu lo nis. Mel ne glopaa ygaa low, bzhen ma pxal ro ma, ga gdziel luu dimi; dimi co güeynie bdiizh mine no dizh ne grop ne.

18

¿Cho nonraa?

(Mr. 9:33-37, 42-48; Lc. 9:46-48; 15:3-7; 17:1-3)

¹ Len dze co bñabdiidz xpëëdsuel Jesús lo me, dien cho tib zho gac zha ne mazdraa gacnon lo grë zha ne no xnëz Dios.

² Dzigo bredz me tib mëëdbgui win, bzo me win glowtaa lo zho, ³ rëb me:

—Gneli naa lo to ganle, telne csaande to xquielntseeb to, telne gacnguudzladzde to, gac to zig mëëdwin rii, per ni xnëz Dios grieelod sëëb to. ⁴ Zha ne racladz gac zho zha non, none gac zho tib miech ndooladz, none gac zho zig tib mëëdlas.

⁵ Miech ne gacnie zha ne sca nac, zha ne rleynie naa, rriequia naale ga racnie zho.

⁶ 'Per miech ne yquiil zho gunc̄tal zho xtol̄ zho, jprobsaxe zha co! Mazd zhi guielnëw lo zho ygadoo tib quie molin zhobxtil yan̄ zho tsieron̄ zho zho nisdoo. ⁷ ¡Nac lo guidzliu rii, runfalte guielntseeb low! Runfalte ncuaane gunc̄tal xtol̄ miech, jper probsaxe zha ne yquiil zha ne nole xnëz naa, gunc̄tal zho xtol̄ zho!

⁸ 'Golguien̄ telne tib nia to, tib nigaa to rquiaqui runctal to xtol̄ to, goltichegazha. Peet nacda maase tibaque ni to, tibaque nia to zob totsaque ygaa to guielmban ndzon ne gdziñd dze lozh, lëdle zob gropa ni laa to guey gabil, lo beldox ne gdziñd dze guiuu. ⁹ Scaque bziaalo to, mine rquiaqui runctal to xtol̄ to, goltichegazha, peet nacd maase tibaque lo to zob totsaque ygaa to guielmban ndzon ne gdziñd dze lozh, lëdle zob gropa ni laa to guey lo beldox ne nac gabil.

¹⁰ 'Ib gunde to csañwin to grëraa zha ne no xnëz naa, zha ne nac zha mban, sac gon̄ non zho lo Dios, anjl ne quianap zho, tibaque zo me lo Pxoza naa men̄ ne zob gbaa.

11 'Nziuu miech lo Dios, tel naa ne nac naa Mgui ne pxeel me, ib laa naa zial zialsilaa naa grë zha ne zonziaab lo me.

12 'Rzac Dios miech zig tib men ne rquianë zdoo xpëcwxiiil. Telne quianie zho tib gayoo ma, ni gziaab tib ma, led zëëb lëë rsañ zho stapgal tsiimtap ma ne zo lo zho, rbire zho rieguib zho ma ne bziaab ga. 13 Zeeñe rdziel ma lo zho, rlozhd gleynie zho ma, lëë ma rac guieibley que grëraa xcompañer ma. 14 Scadaa nagon rzac Pxoza naa miech, grë zha ne nole xnëz me, ib racladzd me gziaab zho.

15 'Golguien sca, tib tib to zeeñe cho tib zha ne nacgrë to gun pe tib falt lo to, goltsie goltsienee lo zho; gropse to golzodiidz pe nac mine pxin zho. Telne siguiel zho guiaan to mpas, laa to beenle gan ga gneewen to stib. 16 Laa telne nëd zho, dzigo golguib tib zha ne së, chopgaa zha ne së gan ganle zha rac zho. 17 Tel niicle scaw nëdaque zho guiaan to mpas, dzigo mazd golguiab lo grëse zha ne nacgrë to gnee zho lo zho. Telne niicle xtiidz zha co nëd zho gon zho, dzigotaa mazd golsaan zho, sacdraa to bets to ga, golcuee zho lad to, golsac zho zig rzac miech grë zha ne zienal guieintseeb.

18 'Gneli naa lo to ganle, grëse zha ne gon xtiidz to zeeñe rnee to lo zho gac-wen zho, scagaa Dios scaania me zho; per zha ne gonda, ycaaniad me zho.

19 'Ni racladz naa gacnañ to ganle, grë zha ne no xnëz naa, niicle tib nëzaque zho, per telne tipse rac zho, ncuaane gnabtaa zho lo Pxoza naa men ne zob gbaa, zdeed mew. 20 Sac zeeñe rcaalsa zho roolnie

zho naa, ga zo naa lo zho; niicle maase chopaque, tsonaque zho.

²¹ Dzigo wbig Pedr rëb Pedr lo me:

—Zha ne sca dzigo gun falt lo naa, ¿blataa vuelt no gun naa zho perdon? ¿Gadztaaw lëë?

²² Pquiab me rëb me:

—Lëda gon Pedr, led loxaque gadzse vuelta. Tel blataa vuelt gun zho falt lo luu, none gun luu zho perdon.

Zha ne beend perdon

²³ 'Grë zha ne no xnëz Dios, ib none gun zho perdon samiech zho.

'Tib rey name, tib dzew bredz me grë zha ne rquia dziin lo me, par dien zha quiayun zho dziin.

²⁴ Loxaque psilo me, zeene laa xcuent tib zha co blozh brieë, nroob brieëquia zho lo me; ²⁵ par quizh zhow, peet nzhend zho. Dzigo bnabey me to zho grop tsieel zho, xpëed zho ne, ni grëse ncuane rap zho, parne grieelo gazh xquielqui zho. ²⁶ Zeene gon zho sca rëb me, pquiitsgzhib zho lo me, rëb zho: “¿Been guielnzaac, gop tib paciens, na dien zha gun naa quizh naa xquielqui naa lo luu!” ²⁷ Gon me zha rac zho, pquia zdo me zho, psilaa me zho, beenquizhdaque me zho xquielqui zho.

²⁸ 'Loxaque brieë zho ga, bdzieel zho tib zha ne nzëëb palal yeen dimi lo zho, tib zha ne rquiaque xtsiin rey cow. Zigne gon zho zha co, zolinëz wbig zho bdie zho yan zho, rnab zho gagazh quizh zho xtimi zho. ²⁹ Dzigo pquiitsgzhib zha co lo zho, rnab zho siguiel zho gap zho paciens, dien zha gaclo dimi co quizh zhow. ³⁰ Pe nquiaadiag zho ga, bnab zho bio zha co ladzguuib, haxta bdiizh zho

dimi ne zëeb zho ga. ³¹ Grëraa zha ne rquia dziin lo rey co, zeen gocnañ zhow, bdeednë zho, güey zho güeyzodiidz zhow lo me. ³² Zeeñe bin mew, bnabey me gocredz zho, goctox me lo zho rëb me: “¡Pe clas miech nac luu! Pe rsoladzd luu zha rac luu bnab luu pquia zdoo naa luu, haxta beenquizhd naa luu guielquidox ne zëeb luu ga. ³³ ¿Pe nacre pquiad zdoo luu zha co, zigne pquia zdoo naa luu?” ³⁴ Blëe me gon me sca been zho, bnabey me bio zho ladzguiib, haxta blozh bdiizh zho grëse xquielqui zho.

³⁵ Scadaa nagon gun Pxoz naa to, telne gunde to samiech to perdon, tel pe nac falt ne gun zho lo to.

19

Zha ne rsëbtsieel (Mr. 10:1-12; Lc. 16:18)

¹ Blozhse sca bnee Jesús lo zho, brieenie me zho ga güeyted zho grë guiedz ne ndxie xtan zha Judé, grë mine riaan nëz dan ro guiubee Jordán, nëz ne rlan ngbidz. ² Miech guizhiu ne rriee grë guiedz co, rdziñ lo me; grë meñ rzacnë ne rdziñnie zho, beenguiac me zho.

³ Ga no me, bdziñ bla zha farisé gocladz zho niungüet zho me, par dieñ pe nxiñd me tib diidz; bnabdiidz zho lo me rëb zho:

—Pe gnë luu dieñ, ¿pe wena csëbtsieel zha bgui ne gacladztaa csëbtsieel?

⁴ Pquiab me rëb me:

—¿Mod rande to zha zhobnee lo Xtiidz Dios? Lo co zhobnee ganle zeeñe psañ me miech, tib nëz zho psañ me, tib mgui ni tib wnaa. ⁵ Ni rneew, ib none grieezhaa mgui lo pxoz zho, lo xniaa zho

par gbannie zho wnaa ne nac tsiel zho, gac zho tibaque miech grop zho. ⁶ Nligaa nacdreaa zho chop miech, sinque laa zho rac tibaque. Dios nac men ne psan ycatsiel miech, cho dzigo nac miech par quiits zho mine rnabey me.

⁷ Dzigo rëb zho lo me:

—¿Pex nac dzigo waa bdeed Moisés diidz csëbtsiel mgui ne racladz csëbtsiel? Rëb Moisés, zac csëbtsiel zho, totsaque yquia tib guits gdeed zho lo wnaa zaatne raquiet laa zho psaan wnaa.

⁸ Pquiabchaa me rëb me:

—Ne squitaaxe waa miech nad, miech ndip zdoo goc xmen_gol to, gane bdeed Moisés diidz csëbtsiel zho; san_gue Dios psan_d me diidz csëbtsiel miech. ⁹ Gacnan_n to gan_le, zha ne csëëb wnaa ne nac tsiel zho, ni tel_l peet guiel_yozh beend wnaa co, dol_l ga gun_n zho csëëb zho tsiel zho ycaa zho stib wnaa. Scaquegaa mgui ne ycaa wnaa ne psëëb zho ga, dol_l ga gun_n zho sac gon_n no tsiel wnaa co.

¹⁰ Dzigo rëbchaa xpëëdscuel me:

—Tel_l scataa nac xcuent guiel_tsiel, mazd lëëquew dzigo ctsielniad ne.

¹¹ Pquiab me rëb me:

—Nligaa no mgui ne rtsielniad, per zhis zho, ni no pe nacte sca riaan_n zho. ¹² No zho desde rac zho mëëd, nacd zho zha ne grieelo tsonie wnaa; no zho ib miech sca rsan_n zho. Nogaa zha ne ib zha rbeeladz zho ctsielniad zho, parne grieelo tsoxcoraa zho gun_n zho xtsiin_n Dios. Zha ne sca rquiabladz ctsielniad, maase ctsielniad zho.

Beenlay Jesús mēēdlas
(Mr. 10:13-16; Lc. 18:15-17)

¹³ Ga no Jesús, ndal zha ne bdziṅ bdziṅnie zho xpēēdlas zho lo me, parne cxobnia me guic win gunlay me win. Grē zha ne nac xpēēdscuel me, leḷ psilo zho rtsidil zho pe nacne nodziṅnie zho grē mēēdlas co lo me.

¹⁴ Zeēne gon me sca quiayun zho, rēbcha me lo zho:

—Ctsirede to grē mēēdlas yeen qui, golsaan guiaad win lo naa. Sac gon grē mēēdlas yeen, ni zha ne nac zig nac win, zha co nac zha ne sēēb ygab lo Dios.

¹⁵ Dzigo psilo me pxobnia me guic grē mēēdlas yeen co, beenlay me win. Blozhse ga, laa me brieega.

Bzodiidznie tib zha ricw Jesús
(Mr. 10:17-31; Lc. 18:18-30)

¹⁶ Laa me zieriee ga, zeēne bdziṅ tib mgui nguieg, tib zha ricwa, rēb zho lo me:

—Naṅ naa luu nac tib men ne noseed miech, ni tib men wen nac luu. Bnē diēn, ḷpe nac mine gun naa parne grieelo ygaa naa guielmban ndzon ne gdziṅd dze lozh?

¹⁷ Pquiab Jesús rēb me:

—Rnee luu lēē tib men wen nac naa. ḷNligaaw, Diosse nac men wen! Telne nli racladz luu ygaa luu guielmban co, none tsoxco luu gban luu mine rnabey Dios.

¹⁸ Pquiab zho rēb zho lo me:

—ḷPa min waa?

Rēbcha me:

—Mine rnee:

Gute luu samiech luu,
te₁ne nole tsieel luu, tsonied luu zha ne led tsieeld
luu,

cuand luu samiech luu,
yquiadiidzguizhd luu samiech luu,

¹⁹ gon pxoz luu, gon xniaa luu, cued luu xquiel₁to
me.

Bleynie samiech luu, zigne rleynie luu luu.

²⁰ Dzigo rëbchaa zho:

—Ni tib mi₁ne rnee luu i gard quits naa, grësew
zanal₁ naaw zigne naca. Racladz naa gacna₁ naa,
dien₁ peraa no gu₁ naa.

²¹ Horco rëb me lo zho:

—Te₁ racladz luu gac luu tib zha ne gban grëse
mi₁ne rnabey Dios, güey sca güeyto grëse ncuaa₁ne
rap luu, dzigo güeytiiz dimi co lo grë zha ne guiend
pe yquiin. Lozh ga, dë dënal₁ zhits naa. Mi₁n co
nagon gu₁ luu, dzigo zgaa luu guiel₁mban ndzon co;
ni scagaa nroob guiel₁nzaac ne ygaa luu nëz lo Dios.

²² Zeene bin zho sca rëb me, mbanse rac zho laa
zho zey, sac nroob ncuaa₁ne quianie zho.

²³ Dzigo rëbchaa Jesús lo xpëedscuel me:

—Gneli naa lo to gan₁le, grë zha ne squi rapchen₁
rzacxuu zho par sëeb zho xnëz Dios gnabey me
zho. ²⁴ ;Ne nligaa ngan₁ rzac zhow! Mazd ngandse
rded tib camell guieer guzh lëdle sëeb tib zha ne
squi rapchen₁ xnëz Dios.

²⁵ Zeene bin zho sca rëb me, rzee zdoo zho, rnee
zho:

—Bay, ¿choseszhe dzigo waa nac zha ne zrieelo
sëeb xnëz Dios?

²⁶ Dze bui me lo zho, dzigo rëbchaa me:

—Nligaa par miech zootle tsod zha ne grieelo sēēb xnēz me; sangue me nan me no zho. Sac tel me, tsod ncuaane grieelod gun me.

²⁷ Horco pquiab Pedr rēb Pedr lo me:

—No dzigo waa, ¿pe nac mine ygaa no? Nanle luu ganle, tel no grēse ncuaane rdziaap no, laa no psana, ziaadnal no zhits luu.

²⁸ Pquiab me rēb me:

—Golgona ganle, dze ne gacncub grēse ncuaane no, zeene laa Mgui ne pxeel Dios zob lo xcan ne zo zaatne nac lo guielndzon ne no me, dze co lo gza to ne nac to zha ne biaadnal zhits naa, sob to lo gza tsiipchop xcan ne rieguial to. To gac zha ne gun guielwxtis lo gza tsiipchop dii ne nac zha Israel. ²⁹ Grēragaa zha ne psan lidz, psan zho bets zho, bzian zho, xnias zho, pxoz zho, tsieel zho, xpēēd zho, liun zho porne noyun zho xtsin naa, na lo guielmban riique laa zho gana stib tib gayoogaw tib tiba; ni ib tedsod zgaa zho tib guielmban ndzon ne gdzindraa dze lozh.

³⁰ Nli zig nac niina, nzian zha ne rzac zha non nac zho, nogaa zha ne rzac zho peet nond, per zeene gal dze co lalga gac zho grē zho.

20

Lalga nac grē zha ne no xnēz Dios

¹ Grē zha ne no xnēz Dios, zac zho lo me zig bzhaac grē zha ne güey xtsiin tib men co.

’Tib men co name nroob dziin quianie me, tib dzew zigne biini liu brie me güeyguib me zha ne tsielaap xuv me. ² Bdzial me palal zho, biaan zho diidz palal quizh me zho dze, laa zho bzēēb

lo dziin. ³ Glaale ngbidza brie me güeyted me len guiedz, lëetse güeytsib me lo bla zha ne zob ga racladz dziin. ⁴ Dzigo bree me zho, rëb me: “Goltsie xtsin naa, na quizh naa to mine non xtse to.”

⁵ Rwe ngbidza, biire me güey me güeyguib me spalal zho. Maase las treza güeyaque me stib.

⁶ Zhile sëeb ngbidza, biire me güey me len guiedz. Ga bdieel me zla zho, gon me scase zob zho ga. Dzigo rëbchaa me lo zho: “¿Pe nacne squise noded dze to?” ⁷ Pquiab zho rëb zho: “Choot rneedzdaxe dziin waa yquiaa no.” Rëbchaa me: “Nasca zeena tsie to lo xtsin naa, maase quizh naa xtse to.” Dzigo laa zho zie.

⁸ Zeene laa dze blozh bdze, bnee me lo zha ne zo lo xtsiin me, rëb me: “Bredz grë zha qui na, bdiizh xtse zho grëse zho. Zha ne bza bzëeb lo dziin, zha co glo bdiizh, lozhraa ga quizh luu zha ne glo bzëeb.” ⁹ Dzigo bded zha ne bdzele dze bzëeb lo dziin ga, tib tib zho pcaase zho mine non zho tib dze. ¹⁰ Grë zha ne glo bzëeb lo dziin, zeene gon zhow, tibaque güeynie guic zho nroobraa nguizh me zho. Per zeene laa zho gozh, lalgaque pcaa zho.

¹¹ Zeene gon zho lalga pcaa zho grë zho, blëe zho, güey zho güeylisqui zhow lo men ne nacchen dziin ga, rëb zho: ¹² “Psacsi luu no i gon squi been luu. Bui ganle gdipse dze ptsuu ngbidz no pquiaa no xtsiin luu, ¿zha nac dzigo lalga quizh luu no grë no zha qui, ni niipyeenaque been zho dziin?” ¹³ Pquiab me rëb me: “Bets, nosacsid naa to, biaanle ne diidz name palal quizh naa xtse to. ¹⁴ Nana sca golgüey xtimi to i, zeena golsë. Ib zdoo naa rala lalga quizh naa to grëse to. ¹⁵ Stiba,

xtimi naaw, zrieelo gundziin naaw zigne racladz naa! ¿Te nē rac zdoo to ye, ran to rquia zdoo naa miech?”

¹⁶ Scapaa nagon gac zha ne no xnēz Dios. Lal gacnon zho, zigtaa zha ne glo bzēēb xnēz mew, zigtagaa zha ne sēēb bzaw.

*Bzeet Jesús stib laa miech csacsi me
(Mr. 10:32-45; Lc. 18:31-34)*

¹⁷ Nēz no Jesús zie me nēz Jerusalén, tibaque bredz me gza tsiipchop xpēēdscuel me, ¹⁸ bzeet me lo zho zha gun miech me zeene laa zho gdziñ Jerusalén, rēb me:

—Ib ziaab naa ladznia grē pxoz ne rnabey grē zho maistr ley, zha gnab guet naa. ¹⁹ Zha co naa ladznia zha zit, parne gunnguzee zha co naa, parne quin zho naa, ni haxta squiaa zho naa lo cruz. Per zeene gac tson ngbidza, zriebaanaa.

²⁰ Tibaque zeene wbig tsiel Zebedé wbignie me grop xingan me Jacob ni Juan, pquitsgzhib me lo Jesús rnab me gun Jesús tib favor ne racladz me.

²¹ Dzigo bnaabdiidz Jesús lo me, pe nac favor ne racladz me. Pquiab me rēb me:

—Racladz naa gneedz luu diidz sob tibga xpēēd rii naa cue luu zeene gdziñ dze ne laa luu zob zobnabey luu; tib zho nēz derech, stib zho nēz revés.

²² Pquiab Jesús rēb me lo wnaa co:

—Ni luu gon riend pe rnab luu! ¿Niacxe zlēb zho gan zho grē guielnē ne gan naa, tedgaa zho grē mine teed naa?

Pquiab zho rēb zho:

—Zlēēb no.

²³ Rēbchaa me lo zho:

—Nli nenda zan to grē guielnē ne gan naa, ni zdedgaa to miñe teed naa; per ne gnedz naa diidz sob to cue naa nēz derech, nēz revésgaa, led naad raguial miñ co; sac laa lugar co biaanle par zha ne tsieguiala, ni Pxoz naa meñ ne zob gbaa meñ cose nan dien chow.

²⁴ Grëraa xpëédscuel me, zeene bin zho pe nac miñe rnab Jacob grop Juan, blëe zho lo zho.

²⁵ Dzigo bredz Jesús zho grē zho, rēb me lo zho:

—Ran to ganle zha run grē zha ne rnabey grē guiedz ne ndxie lo guidzliu, ni grē zha ne nac zha non, masaque rnabey zho samiech zho zigne racladztaa zho. ²⁶ Sañgue to gon guñscade to. Zha ne racladz gac zho zha non lo to, laa ne glu zho zha non zho, none glo zho guiaanwin, gac zho zig tib ngundziin lo to. ²⁷ Scaquegaa zha ne racladz gnabey zho lo to, none glo cseed zho guñ zho miñe gnabey to zho. ²⁸ Golgan ganle, niicle naa ne nac naa Mgui ne pxeel Dios, ziald naa par gnabey naa miech, sinque laa naa zial par gac naa tib ngundziin lo zho, ni gded naa xquielmban naa zeena laa zho lo grëtaa ncuaane ngadoo zho. Ni nanpaa naa miech guizhiu ne laa.

Biac chop zha ne rold lo

(Mr. 10:46-52; Lc. 18:35-43)

²⁹ Miech guizhiu nal zhits Jesús, laa me zieriee guiedz Jericó. ³⁰ Ro nēz co zob chop zha ne rold lo, zeene bin zho laa me ziaad ga, psilo zho nguiedz rbedz zho rnee zho:

—¡Jesús, meñ xtii rey David, pquia zdoo no!

³¹ Blalaa zha ne zie ga, psilo zho ndox zho lo grop zha co parne guioog ro zho, per lel hor cole

nguedzraa rbedz zho me. ³² Nacne zeene bdzin me zaatne zob zho, blöz me, bnabdiidz me lo zho rëb me:

—¿Pe nadien gun to naa?

³³ Pquiab zho rëb zho:

—¿Racladz no guiac lo no!

³⁴ Pquia zdoo me zho gon me sca rac zho, dzigo pquiaania me zhits guidlo zho. Horcogazh laa lo zho biac, laa zho zienal zhits me.

21

Bdzin Jesús Jerusalén

(*Mr. 11:1-11; Lc. 19:28-40; Jn. 12:12-19*)

¹ Sca no Jesús nöz grë xpëedscuel me, laa me bdzin guiedz Betfagé. Gaxle ga riaan Jerusalén, nöz danse squi riaan Gui Oliv. Dzigo pxeel me chop xpëedscuel me, rëb me lo zho:

² —Goltsie guiedz win ne ndxie danse lo ne i. Ga gdzin to zaatne quiadoo tib burr gus grop xpëed, dzigo golxadz ma goltënie ma nu. ³ Tel cho gnabdiidz pe nacne noxadz to ma, golguiab lo zho: Men ne rnabey ne, men co rquiin ma, na zigne lozh xtsiin ma guiaadsan no ma.

⁴ Ga brieequia mine bnee tib men ne biadteed xtiidz Dios lo miech padzeela, zeene rëb me:

⁵ Golguiab lo men Jerusalén:

“Golwi ganle, laa men ne nac zhirey to ziaad i. Tib men ligase rlu me, zob me lad tib burr win, tib ladse ma ne rey yo zob me.”

⁶ Laa zho zie, zigne bnabeyse me zho ga, scase been zho. ⁷ Zeene wbire zho, laa zho bdzinnie burr co grop xpëed ma. Pxob zho lar ne rbix zho lad xpëed ma, laa me bzob ma. ⁸ Zigse zie me, no

grë miech guizhiu co, rta zho lar ne rbix zho ro nêz rded burr ne zob me ga; nogaa zha ne rchoo nia grë yag nguia, rdziin zhow ro nêz rded me. ⁹ Grëse zho, zigtaa zha ne nera, zigtaa zha ne naļa, nguiedz roptsie zho rnee zho:

—¡Golgotsaa co ne xviv xingan David! ¡Golgotsaa gleynie ne me! ¡Zha ndzontaa Dios, pxeel me men nroob qui lo ne!

¹⁰ Zeene bdziin me Jerusalén, rlozhd gzee zdoogrë miech ne ndxie ga, rnabdiidzlsa zho rnee zho:

—¿Bay cho nac men qui?

¹¹ Rquiab grë zha ne naļ zhits me ga, rnee zho:

—¡Lëë Jesús i! ¡Lëë men Galilé qui, noteed xtiidz Dios lo miech!

Blee Jesús miech len yadoo

(Mr. 11:15-19; Lc. 19:45-48; Jn. 2:13-22)

¹² Biini liu co, zeene bdziin Jesús Jerusalén stib, güey me yadoo nroob ne zob lad guiedz co. Bdziin me gon me nzian miech ne ndxie ga, masaque tib lgui quiayun zho, zha ne no wto, zha ne no wzi. Nacne güey me ptixche me xmezha zha ne notsëe dimi, ptixche me xmezha zha ne no wto palom; blee me zho ga grëse zho, ¹³ rëb me lo zho:

—Led znu gon zhobnee lo Xtiidz Dios: “Zaatne nac lidz naa nu, nu none guiaad grëse miech sodiidznie zho naa.” Laa to gon, quiayun to lugar rii zig tib zhibliee ngbaan.

¹⁴ Ga no me bdziin bla zha ne roļd lo, zla zha ne nē ni, wbig zho lo me. Gzase zho beenguiac me.

¹⁵ Nzian mëedlas yeen ne ndxie len yadoo ga, psilo win nguiedz rnee win: “¡Zha ndzontaa xingan rey David!”

Grë zha ne nac pxoz ne rnabey, ni grë maistr ley, zeene gon zho milagr ne been me ga, ni gon zho zha rnee grë mөөdlas co, rlөө zho, ¹⁶ rөb zho lo me:

—¿Pe ib rond luu ganle pe nonee grë mөөdlas qui?

Pquiab me rөb me:

—Ron naaw. ¿To waa, pe rande to ganle zha zhobnee lo Xtiidz Dios, zaatne raquiet mine noyac nu? Led rneew lөө:

Haxta grë mөөdlas ne bii radz, ye win rley win roolnie win me.

¹⁷ Blozhse sca rөb me, zoque zho ga, laa me bio nөz zie me nөz Betain. Ga blөz me wdze co.

Wbidz tib yag guigw

(Mr. 11:12-14, 20-33; Lc. 20:1-8)

¹⁸ Sil co zeene no me nөz gdziñ me Jerusalén, pcaabedz me. ¹⁹ Gon me zob tib yag guigw gax ro nөz, dzigo güey me güeyso me low dien pe ndziel tib nex low niow me. Bdziñ me gon me loxaque zhiblagsew zөөb, nacne rөb me low:

—¿Lөө blozh xtse luu nu gon! ¿Gdziñdraa dze ne yquia nex lo luu!

²⁰ Biini liu, zeene laa zho zie Jerusalén stib, gon xpөөdscuel me, laa yag guigw co bidzle. Bzee zdoo zho, bnabdiidz zho lo me rөb zho:

—¿Bui ganle, bay zha nacne squi znuse wbidz yag guigw qui?

²¹ Pquiab me rөb me:

—Gneli naa lo to ganle, telne dib zdoo to rnalto to Dios, niicle ncuaane mazdraa ngañ gnab to lo me, zun mew. Lөөraasi none dib zdoo to gliladz to zaca, ni palal gacchopd guic to. ²² Grөse ncuaane gnab

to zeene rzodiidznie to me, zneedz mew, totsaque dib zdoo gliladz to laa to ycaaniaw.

²³ Bdziñ me Jerusalén, wbiire güey me len yadoo. Ga noseed me miech, zeene bdziñ bla zha ne nac pxoz ne rnabey ni zla zha ne nac meñ non lo menguiedz, bñabdiidz zho lo me rëb zho:

—¿Cho dzigo nac luu ne squitaa ziaadnabey luu len yadoo? ¿Cho rnabey luu?

²⁴ Pquiab me rëb me lo zho:

—Ye naa laa naa guñ tib wñabdiidz lo to. Telne stsire to low, dzigo gni naa lo to ganle cho rnabey naa ne laa naa noyūñ grë ncuaane noyūñ naa.

²⁵ Golnë dien, ¿cho pxeel Juan Bautist biaad me pchoobnis me miech? ¿Pe Dios pxeel me, te miechsew ye?

Psilo zho rñabdiidzlsa zho dien zha ctsire zho lo xtiidz me, rnee zho:

—Telne dzieets ne Dios pxeel Juan, dzigo laa me gnë: “¿Pex nac dzigo waa bliladzde to mine bnee me?” ²⁶ Tel na dzieetsgaa ne, miechse pxeel Juan, grieequiadaque ne.

Rdzieb zho niab zho miechse pxeel Juan, sac nan menguiedz nli Dios pxeel Juan biadteed Juan xtiidz me lo miech.

²⁷ Dzigo mazd mine been zho rëb zho lo me:

—Ndiond no dien cho pxeel Juan.

Dzigo rëbchaa me lo zho:

—Niicle naagaa nagon, grieelod gni naa lo to cho rnabey naa quiyūñ naa grë miñ rii.

Zha nac zha ne rond diidz

²⁸ 'Golquiaadiaga ganle. Tib mgui, quianie me chop mēēdbgui. Tib dzew, bredz me tib zho rëb me lo zho: “Xin, none gon tsie luu nadze, tsietop luu

uv xcuaa ne.” ²⁹ Pquiab zho rëb zho: “¡Gad naa!” Wdzeelaaw, bien zho nonguielda ga sca gun zho, dzigo bio zho nëz güey zho. ³⁰ Laa stib zho, zeene bredz me zho bnabey me zho tsie zho lo dziin, rëb zho: “Peet nacda, na maase ga naa.” Blozh ga pasë zho nie.

³¹ ’Golnë dien, lo grop mëed co, ¿cho nac zha ne bin xtiidz pxoz?

Pquiab zho rëb zho:

—Zha glo cow.

Dzigo rëbchaa me:

—Gneli naa lo to ganle, miñcodaa quiayac nu niina: Grë zha ne rzac to mazdraa ngoopdol, zig nac grë zha ne rtop dimi ne razh lo zha Roma, zig nac grë wnaa ro nëz, mazd glole zha co nozëëb xnëz Dios, lëdle to. ³² Biaadpaa Juan Bautist name biadseed me miech csaan zho xquiełntseeb zho, gban zho zigne racladz Dios, ni pe liaadz to nion to miñe rnee me. Mazd grë wnaa ro nëz, grë zha ne rtop dimi ne razh lo zha Roma, znuse psaan zho xquiełntseeb zho. Laa to, niicle ran to nosaan grë zha co xquiełntseeb zho, per ib rsaande to miñe nac to.

Xcuent zha ne pquianap liu

(Mr. 12:1-12; Lc. 20:9-19)

³³ Dzigo bzodiidz me stib cuent lo zho rëb me:

—Tib meñ name, nroob lbë uv beenbni me lo liuñ me. Psilo me ptse me igose liu co, bzaa me zaatne gzhii grë uv co, ni bzaa me tib yu glaa zaatne sob zha ne yquiaanapa. Blozh ga, blediin me liu co lo bla zha ne ran liu, dzigo laa me brieë, laa me zey zit.

³⁴ 'Zeene gol meë ne laa nex co gol, pxeel me bla zha ne quia xtsiin me zie lo zha ne quianap liun me ga, parne gdeed zha co uv ne rieguial me ycaa me. ³⁵ Per leļ bnaaz zho zho, zha ne blooquie zho, zha ne bdeedgolp zho, haxta beet zho tib zho. ³⁶ Wbiire pxeel me zla zho, hor cole nzianraa zho pxeel me, per niapse sca psacsi zha co zho.

³⁷ 'Tibaque zeene pxeelaque me xpëed me, bza guic me rëb me: "Gaņse zho xpëed naaw, zon zho mine gnee me."

³⁸ 'Pex nion zho diidz, zeene gon zho xpëed me, rëbchaa zho: "¡Lëë zha qui nagon guiaanne liu rii! ¡Golgotsaa dziuut ne zho, zeena guiaana lo ne!" ³⁹ Dzigo bnaaz zho xpëed me, güeynie zho me zaatne nac tib lad lo liu co, ga güeygut zho me.

⁴⁰ '¿Zha sca dien rzac to gun bizhuan liu co gza zha co, zeene laa me gbire?

⁴¹ Pquiab grë zha ne nac pxoz ne rnabey, ni zha ne nac zha non lo menguedz ga, rëb zho:

—Ni lalnu yquiad zdo me zho, znitlogazh me zho. Lozhse ga, cuediinga me liun me lo zla zha ne gundziina, zha ne guien gdeed nex ne rieguial me ycaa me.

⁴² Dzigo rëbchaa me lo zho:

—Haxta lo Xtiidz Dios no tib zaatne znu rnee, ¿pe gard ganle glab tow? Rneew: Quie ne psëeb zha ne nozaa yu, ni nand zho lëepaa quie co nac mine rnazdziits yu. ¡Ncuane gzee zdo new! Sac Dios bnabey sca goca.

⁴³ 'Gacnan to ganle, scadaa nagon grieet to lad grë zha ne ngab lo Dios, parne gbig zha ne tsoxcopaa gun xtsiin me, zha cole guiaan xlugar to. ⁴⁴ Zha ne tsietsoebe lo quie ne raquiet ga, zac zho zig tib

ncuaane rac tson tap lë; laa tel lëegaaw tsobe lad zho, zac zho zig tib ncuaane die die rac.

⁴⁵ Grë zha ne nac pxoz rnabey ga, ni grë zha farisé, zeene blozh pquiaadiag zho cuent ne bzodidz me lo zho ga, bien zho zha ga rzeet me.

⁴⁶ Nacne gocladz zho naaz zho me, per bdziebaque zho; sac ndal miech rleynie me, niicle ne rzac zho tib zha ne noteedse xtiidz Dios nac me.

22

Zha ne néd sëëb xnëz Dios

¹ Bzodiidz Jesús stib cuent lo zho, rëb me:

² —Grë zha ne rbedz Dios ygab zho xnëz me, none tsoxco zho gon zho miñe rnee me; sac nenda gdzieelo zho zig bdzieelo zha ne bredz tib rey co nie zho lo zhilni xpëed me.

³ Tib rey name, ziaadyob ctsieelnia xpëed me, nzian zha ne bredz me tsie lo lni. Zeene laa dze co bdziñ, pxeel me zha ne quia dziin lo me zietsedz grë zha ne bredz me lo lni ga, per néd zho nienal zho. ⁴ Wbiire me pxeel me zla zho rëb me: “Goltsietsedz zho, golguiab, laa guielwagw ne yquiin goclole, siguiel zho na guiaad zho.” ⁵ Per ib beencasd zho zha ne pxeel me ga, no zho brieë zie lo xcuaa, no zho brieë zie zhiwto, ⁶ nogaa zho lel bnaaz zho zha co, psacsi zho zho, beet zho zho. ⁷ Zeene gon me sca been zho, blëë me, bnabey me grë xmenguiib me güey zho güeygut zho grë zha ntseeb ne psacsi xmandad me ga, ni bnabey me bzëëg zho guiedz co. ⁸⁻⁹ Blozh ga biire pxeel me zla zho, rëb me: “Laa guielwagw rii goclole, miñe naca goltsie tib nëz yu, zha ne gdzieeltaa to, golcuedz zho guiaad zho lo lni; sac grë zha ne bredz naa ga

niaad, laa zho blule ganle rieguiald zho guiaad zho nu.”

¹⁰ 'Dzigo brieë zho güey zho, miech ne bdzieeltaa zho, zigtaa zha ndzinliw, zigtaa zha ntseeba, grëse zho bredz zho bdziñnie zho zho lo lni. Gol hor wagw, biodzëse len yu ndxie miech.

¹¹ Zeene laa rey bzëëb zienee me lo zho, gon me lad co no tib zha co nacwxabd zho zigne rieguial gacwxab zha ne sca rie tib lo guieltsieel. ¹² Dzigo rëbchaa me lo zho: “Bets, çpe nacne squise luu bzëëb luu nu, bui ganle nacwd luu lar ne bneedz zho niacw luu?”

'Dzese zob zho, rdziel zho pe guiab zho lo me. Gonse me sca rac zho, ¹³ bnabey me zha ne nodziib lo mezh rëb me: “Golzobdoo zha rii, golxidoo grop nia zho, grop ni zho, golcuee zho nu goltsieron zho lo ncow nëz ley. çGa nac zaatne rieguial zho, ga gan zho guielnëdox ne no ted zho, goonnë zho, haxta gow lay zho!”

¹⁴ 'Mincodaa nagon rac len dze rii —rëb Jesús—, ndal zha ne racredz sëëb xnëz Dios, per zhis nac zha ne rioxco rzëëb.

Pe nonguel quizh miech contribucion

(Mr. 12:13-17; Lc. 20:20-26)

¹⁵ Blalaa zha farisé ne ndxie ga güey zho bneditdz zho dien zha gungüet zho Jesús cxin me tib diidz, zeena min co yquiaaqui tsiezo zho me lo wxtis. ¹⁶ Dzigo pxeel zho bla zha ne nacgrë zho, ni güey zla zha ne racnie Herod gocgza zho. Bdziñ zho rëb zho lo me:

—Maestro, ndion no niapse diidzli ziena luu, ni scagaa zeene rseed luu miech, rdziebd luu mine nac diidzli min co rnee luu lo zho. ¹⁷ Gane niina,

racladz no gnë luu dien pe nonguiela ga rdeed no dimi ne razh lo rey ne zob Roma, te nonguielda ye.

18-19 Bienga me racladz zho gungüet zho me, dzigo rëbchaa me lo zho:

—¿Pe nan to na riend naa pe no guic to? Masaque rëb to na lëë, znuse gungüet to naa. Golneedz tib pes ne rguizh to nu ganle.

Dzigo bdeed zho tib pes plat lo me. 20 Blozh ga, rëbchaa me lo zho:

—¿Cho nu, cho lë nu quia lo pes rii?

21 Pquiab zho rëb zho:

—Lëë rey i, lëë lë me i quia lo qui.

Dzigo rëb me lo zho:

—Mïne rieguial sca ycaa rey, goldeeda lo rey; scaquegaa mïne rieguial ycaa Dios, lo Dios goldeeda.

22 Zeene gon zho sca ptsire me lo xtiidz zho, bzee zdoo zho, mazd mïne been zho laa zho wbichese ga, laa zho zey.

¿Pe nli zrieaban miech?

(Mr. 12:18-27; Lc. 20:27-40)

23 Dze coquew, güey bla zha saducé lo Jesús. Nac zha saducé rliladzd zho zdziñ dze grieegan miech. Dzigo bdziñ zho, 24 rëb zho lo me:

—Maestro, znu psan Moisés diidz: Telne glo mgui guet lo wnaa ne nac tsieel mgui, ni gopd wnaa mëed, dzigo none betsaque zho ctsieelnia wnaa co stib, zeena gap wnaa mëed ne guiaan xlgar xpëed zha ne gut ga.

25 'Bio tib dii zha co znu bzhaac, gadz bets nac zho. Ptsieelnia zha ne nac zha gol, zeene laa zho gut biaand xpëed zho. Dzigo ptsieelnia stib bets

zho wnaa co. ²⁶ Blozh ga gutaque zha co, pa sē zho nsan mēēd. Ptsieelniaque me stib zho, goc zho tson, niicle zha co psandaque mēēd. Sca sca haxta bza gza gadzse zho ptsieelnia me, ²⁷ tibaque zeene yeque me laa me gut. ²⁸ Miñe racladz no gacndion no, ¿chopaa dzigo gac tsieel wnaa co zeene laa zho grieeban? Sac gza gadzse zho ptsieelnia me.

²⁹ Pquiab Jesús rēb me lo zho:

—I nagon laa to rxin, miñe naca riende to zha nac Xtiidz Dios, niicle rliladzde to zrieelo me gun me ncuuan ro ne gard gan miech. ³⁰ Sac gon zeene gal dze ne laa grē miech grieeban, niicle mguiw niicle wnaaw led yedraa hor co dien cho ctsieelnia zho; sac hor co laa zho gac zig nac grē anjl ne no gbaa. ³¹ Stiba, ib nli zrieeban mengut. Mod rande to zha zhobnee zaatne raquiet zeene rēb Dios: ³² “Naa nac Dios ne rliladz Abraham, naa nac Dios ne rliladz Isaac, naa nac Dios ne rliladz Jacob.” Niicle ne gutle gza zha co hor co, per zeene sca bnee Dios gase rlu mban zho no zho lo me; sac tel Dios, jnacd me xDios mengut, sinque xDios zha mban nac me!

³³ Grē miech ne ndxie ga, zeene gon zho sca ptsire me lo xtiidz zha saducé co, rzee zdoo zho.

Xley Dios miñe mazdraa non

(Mr. 12:28-34)

³⁴ Grē zha farisé ne ndxie ga, gon zho sca psioog Jesús ro grē zha saducé co.

Horco biire grē zha farisé co bzodiidz zho stib. ³⁵⁻³⁶ Lad zho no tib maistr ley, dzigo wbig maistr ley co lo Jesús, rēb zho:

—Maestro, lo grë xley Dios, bzhiguiel bnë lo naa dien, ¿pa min nac mine mazdraa non?

Sca rëb zho, sac gocladz zho niungüet zho me.
³⁷⁻³⁸ Pquiab me rëb me lo zho:

—Lëë mine mazdraa non nu znu rnee: “Dib zdoo luu, dib xalm luu, dib guielbiini ne no guic luu, blynie Dios, men nroob ne rnabey luu.” Lëew nac mine mazdraa non, ni lëew glopaa raquiet lo grëse ley. ³⁹ No stib mine rnee: “Blynie samiech luu zigne rlynie luu luu.” Ye min rii nona, meraque lala con min glo. ⁴⁰ Zha ne gban zigne rnabey grop ley rii, lëele grë ley ne psan Moisés ga, lëele grë zhiwseed zha ne biadteed xtiidz Dios ga, zienal zho.

¿Cho xpëed nac Crist?

(Mr. 12:35-37; Lc. 20:41-44)

⁴¹⁻⁴² Gon Jesús nzian farisé ndxie lo me ga, nacne bnabdiidz me lo zho rëb me:

—¿Zha dien rzac to guiaad Men ne zëëble diidz ga cxeel Dios? ¿Cho lo xtii grieequia me?

Pquiab zho rëb zho:

—Lo xtii David grieequia me.

⁴³ Dzigo rëbchaa me lo zho:

—¿Pe scaw sca? Zha nac waa zeene bdeed Espíritu Sant guielbiini lo David bzeet David men co, rëb David me nac men ne rnabey David. Golgan ganle znu bnee David:

⁴⁴ Rëb Dios lo men ne rnabey naa:

“Cue naa nëz derech, nu bzob, nieeda lozh gnaz naa grëse zha ne rlëë lo luu, csan naa zho ladzna luu.”

⁴⁵ Gase nagon telne nli zha xtii David gac Men ne cxeel Dios ga, ¿zha nac dzigo rnee David men co rnabey David?

⁴⁶ Ni tib zho ib bdziel zho zha ntsire zho lo xtiidz me; desde dze co ni stib zho biazhdraa pe nabdiidz zho lo me.

23

Minē nac maistr ley grē zho zha farisé

(Mr. 12:38-40; Lc. 11:37-54; 13:34-35; 20:45-47)

¹ Dzigo psilo Jesús bnee me lo grē miech co, ni lo xpëëdsuel me, ² rëb me lo zho:

—Grē maistr ley ni grē zha farisé ib lëë xtsiin zho ga, nac cseed zho miech zha nac ley ne psan Moisés. ³ Golguien golgon xtiidz zho, iper nsin golso, ib gunde to minē run zho! Nac zho, ni lalnu rund zho minē rseed zho miech. ⁴ Rio zho rnee zho lo miech, min rii, min rii rnabey ley gun to, ni per ni zha rioxcd zho siquier csilo zho gun zhow.

⁵ ¿Grē ncuaane run zho, laaw runse zho par ganpaa miecha! Par guiab miech nguzobdiidz zho lo Dios, rio zho led zhid nzhen grē lo cint rquiaa zho Xtiidz Dios, rlozh ga rzhidoow yan nia zho, rzhidoow quia zho ne. Lar ne rbix zhow, rlozhd dieen peraa rquia lada, xab zhow, haxta zhits ni zho rbiba. ⁶ ¿Zeene rbedz miech zho tib wagw nroob, rdziladz zho zhapaa rzob grol mezh, niicle len yadoogaaw, zaatne glupaa zha non nac zho, ga rzob zho! ⁷ Ro nëza, rdziladz zho ndooladz gnee miech bdiuzh lo zho, zeene rnee miech “zha rac”, “zha non”, nac zho, rlozhd gley zho.

⁸ Sangue to gon yguibde to dien zha gnee miech “zha rac” nac to, sac tibaque men rac no, lëë me ga

zëëble diidz cxeel Dios; golguien ganle tel to lalga nac to, rriequia bets to grë to. ⁹ Ib gunde to zig run grëraa miech, runnon zho tib samiech zho rnee zho lëë pxoz zho ga, sac tibaque men ne nac Pxoz to, lëë men co no gbaa. ¹⁰ Yguibde to sac miech topaa gunctsin zho lo Dios, sac loxaque Men ne nole diidz ga cxeel me, men cose zrieelo gunctsin zho lo me. ¹¹⁻¹² Nodne gacglaa to lo samiech to, mazd ndooladz golgac lo zho, sac zha ne racglaa, ziaanwin zho. Gacxe waa, telne racladz to gacnon to, none ndooladz gac to lo samiech to.

¹³ ;iProbsaxe to maistr ley, probsaxe to zha farisé! Lëda i gon noyun to, rzac to noxco to sëëb miech xnëz Dios, per lel noca to sëëb zha ne racladz sëëb. Ni stiba, per ni to nod xnëz me. ¹⁴ [;iProbsaxe to! Guielntseeb i gon run to, rio to rlozhd goal to xlay to rzo to ro nëz, ni noque to rla to ncuaane rapse grë wnaa viud; ib tedsod gon guielnëdox ne ygaa to.] ¹⁵ ;iProbsaxe to, rzac to na lëëw ga run to! Rio to gui dan rbix to, haxta rded to nisdoo, rquiaguib to dien cho sëëb xnëz to ni rlozh ga laa ne ygab zho nëz lo Dios, lel nëz len gabil zienie to zho. ¹⁶ ;iProbsaxe to, nac diidz name to noseed miech, ni per ni to rien pe rnee to! Rnee to lo miech: “Zha ne rzeet yadoo ni tel gund zho mine rnee zho, peet nacd ga, per tel gzeet zho grë or ne no len yadoo ni gund zhow, dol ga gun zho.” ¹⁷ ;iNadzpaa nxen to, nadzpaa ncow nac guic to! ;iNiacxe mazdraa non or lo yadoo? Golguien ganle por yadoo, naclay grë or co. ¹⁸ Rneequé to: “Zha ne gzeet lo pcoog, led dolda telne gund zho mine rnee zho; per tel gzeet zho gon ne ndziib lo pcoog ni gund zhow, dol ga gun zho.” ¹⁹ ;iPe nlipaa rnee

to peet riende to! ¿Niacxe mazdraa dzigo non gon que lo pcoog? ¿Pe ran̄de to por lo pcoog co raclay gon? ²⁰ Gol̄guien̄ gan̄le, zha ne rzeet lo pcoog, yele gr̄e ncuanē ndziib low ga quiazeet zho; ²¹ zha ne gzeetgaa yadoo, haxta Diosle ga gon̄ rzeet zho, sac ga rb̄ez me. ²² Scasaque zha ne gzeet gbaa, zaatne rzoble Dios ga nozeet zho, masaque rrieequia me ga rzeet zho.

²³ ¿Probsaxe to maistr ley, probsaxe to farisé! Rzac to na demas nguzobdiidz to lo Dios, rio to haxta gr̄e guizh bitxtil, guizh nizh, guizh comin run̄ to tsii lal, rdeed to tib lala miñe rieguial̄ tsiesan̄ to yadoo, laa ley ne mazdraa non zienied guic to gun̄ to miñe rnabeya. Nli rieguial̄a gdeed to gr̄e gon co, per none scaque tsoxco to gun̄ to miñe nac diidzli, none yquia zdoo to samiech to, none dib zdoo to gnalo to Dios. Miñ rii nac miñe mazdraa non.

²⁴ ¿Ne nlipaa ib riende to pe quiayun̄ to! Rzac to na noxc̄o to gun̄ctalde to xtol̄ to, masaque ni tib ngurudz rsaande to tso lo ncuanē row to, ni riende to rrieequia haxta tib camell rab to.

²⁵ ¿Probsaxe to, masaque nac to zig tib plat, zig tib tas ne n̄ez zhitssew mbe rna, laa n̄ez leña rnadraa! Laglaase rquiaalo to miech wen nac to, per tibaque noban to, tibaque nosacsi to samiech to. ²⁶ Gol̄guien̄ none glo csaan to xquiēlntseeb to, none gac to zig tib plat zig tib tas ne zigtaa mbe n̄ez zhitsa, scagaa mbe n̄ez leña. ²⁷ ¿Probsaxe to, nac to gon̄ zig gr̄e baa ne dieen̄ paraa nquitsbie rna! Niow rlu n̄ez zhitsa, laa n̄ez leña loxaque gr̄e ncuaan̄ biodz, loxaque gr̄e dzit ngutoo nodz̄e.

²⁸ Sca gon̄ nac to, ne rac to zootxe luu waa nli

miech ndzinli nac to, per nēz leṅ zdoo to loxaque zhgab ne dien zha yquidie to miech, zha csacsi to miech no to.

²⁹ ¡Probsaxe to maistr ley, probsaxe to farisé! Ni lalnu guieḷto guieṅd lo to, rio to rzhixcuaa to ro xpaā grē zha ne biadteed xtiidz Dios, ni lēēpaa grē pxozgol to beet zho. Dieen peraa run to rquiaalo to rsoladz to zho. ³⁰ Rnee to: “Telne niaca miṅe nole ne leṅ dze co, ndeete ne diidz nsacsi xmēṅol ne grē meṅ rii.” ³¹ ¡Lēēque to goṅ nobeero ga, zha nactaa lo dii ntseeb ne ziaad to! ³² ¡Scaque nasca goḷḡun! ¡Goḷtsienal grē miṅe been pxozgol to ga! ³³ ¡Miech ngoopdo! ¡Zhin meṅdox! Telne csaande to xquieḷntseeb to i, ib tedsod goṅ gabil guey to.

³⁴ Grē zha ne cxel naa, zig nac zha ne guiadteed xtidz naa, zha ne nacie Espíritu Sant, zha ne ygaa guieḷbiini yquiaa zho miṅe gnabey Espíritu Sant zho, ib tedsod sacsi to zho. No zho gutgazh to, no zho yquiaa to lo cruz, no zho lēēque leṅ xyadoo to gdeed yag to zho, ib gaṅzede to zho, stib guiedz, stib guiedz tso to ctsidil to zho. ³⁵ Blactaa grē miech ne sca peet xtold ziyut to grē xmēṅol to, psilow desde Abel haxta Zacarí xingan Berequí, meṅ ne beet xmēṅol to zaatne nac gax lo pcoog leṅ yadoo. Ni ye to goṅ zēēb xchen grēse zha co. ³⁶ ¡Gneli naa lo to gaṅle, grē miech ne goṅ mban leṅ dze rii, grē to zho ygaa guieḷnēdox ne tsieguial to por grētaa guieḷntseeb co!

³⁷ ¡Aque tow meṅ Jerusalén! ¿Pe nacie squitaa nac to, rut to zha ne ziadteed xtiidz Dios lo to, rgoquie to grē zha ne rxeeḷ me lo to? Blactaa gocladz naa, niacnie naa to, nquianaap naa to, zig run nguid rgueedz ma xpēēd ma, per bzhiguieḷde

to. ³⁸ Gacnaṅ to sca ganle, nadzetaa goṅ laa lidz to nu guiaanṅ ngan, ³⁹ sac gaṅdraa to naa, haxta gaḷ dze ne guiab to: “iZha ndzontaa meṅ qui pxeel Dios lo ne!”

24

iNsin goḷso!

(Mr. 13:1-23; Lc. 17:22-24; 21:5-24)

¹ Laa Jesús zieriee lenṅ yadoo grē xpēēdscuel me, zeene pcuēēzdze zho me, rēb zho:

—Gotsaa gwi ne ganle zha niaataa yadoo rii.

² Blozhse bui zho low, rēbchaa me lo zho:

—Niicle squitaa nagonṅ niaaw, per zdziṅ dze ne nitlow dib nacsew. Ni stib quie qui guiaanṅdraa zigne squi zhobxcuaaw i.

³ Brieē me lenṅ yadoo ga grē me zho, laa zho zie nēz Gui Oliv. Bdziṅ zho cho gui co, ga bzob me grē me zho. Dzigo wbig gax bla zho lo me, bnabdiidz zho rēb zho:

—Bzhiguielṅ bnē lo no dienṅ, iṅpa hor dzigo gac miṅe bzeet luu ga? iZha glu zeene laa luu ziaadyoble guiaad? Zeene nitlogaa guidzliu, iZha gacndioṅ no laa dze co ziaadyoble?

⁴ Pquiab me rēb me lo zho:

—Nsin goḷso, zeena choot yquidiede to. ⁵ Sac nzian zha ne grieequia guiab zho zha nac Menṅ ne zēēble diidz cxeel Dios; ni nzian miech ne yquidie zho. ⁶ Zeene gon to nēzrii nēzrec noxtseeb csilo dilṅ, guiabde to togo lēēle dze ne guaḷ naa ga bdziṅ; sac niicle noyacle dilṅ, noxtseebragaa pa csilo gaca, led lēdle ne nitlo guidzliu ga. ⁷ Garaa csilo grē dilṅdox, grē guiedz nroob laaw tilṅnie saguiedz nrooba; grē zha ne rnabey grē guiedz nroob, laa

zho tilnie sazha rnabey zho. Nözrii nözrec csilo gni grë rhodox, nzian zaatne gañ miech gbin. ⁸ Ni lega loxaque mine rsilosew ga, sac nroobraa guielñe ne gañ miech lozh ga.

⁹ Zeene laa grë ncuuan rii noyac, įnsin golso! Sac hor co laa miech tsielo to ladznia zha ne csacsi to, haxta zut zho palal to, grëse miech stsidil zho to loxaque ne nac to zha ne no xnëz naa. ¹⁰ Nzian zha ne nole xnëz naa, leñ dze co laa zho gbiche, laa zho csilo lëëque zha glëënie zha ne nacgrë zho, haxta zielo zho zho ladznia zha ne gut zho. ¹¹ Leñ dze co zrieequia nzian zha ne yquidie miech guiab zho xtiidz Dios noteed zho, ni nzian zha ne gliladza. ¹² Grë zha ne nole xnëz naa, zeene gañ zho grëtaa guielntseeb, grëtaa dol ne quiayun miech leñ dze co, ndal zho gleyniedraa zho Dios dib zdoo zho. ¹³ Per zha ne tiblique gac, gbiched zho lo Dios, niicle tel petaa gañ zho noyac, zha co gac zha ne gdziñ lo me. ¹⁴ Niicle scataa noyac grë ncuuan co, ib none ygaaz Xtiidz Ndzon Dios lo grëse miech, grëtaa zaatne ndxie miech laa zho gacnaa; lozhraa ga dzigo laa guidzliu rii nitlo.

¹⁵ Zeene gañ to zaatne nac Lugar Nda leñ yadoo, zo tib ncuane rieguiald so ga, tib ncuane ziaad gnitlo, zigne bzeet Daniel meñ ne biadteed xtiidz Dios (zha ne glaba, none guien zho zha naca), hor co golguib dien zha xoon to. ¹⁶ Zha ne no grëraa guiedz ne ngab Judé, none xoon zho tsie zho dan, ga tsietsolan zho. ¹⁷ Zha ne lëëtaque hor co no glaa guic lidz, none lëëléd xoon zho, ib guiabd zho sëëb zho leñ yu tsiebee zho ncuane rap zho. ¹⁸ Zha ne quiagaa lo dziin dan, ib gund zho tsie zho lad guiedz tsixi zho xab zho. ¹⁹ įProb grë

men wnaa ne lëetse len dze co zoney xpëed, men ne quaniegaa mëdyeen ne bii radz! ²⁰ Golnab lo Dios gande to guielnë co len mëe ne rac nal, dze ne rdziiladzgaa to lo dziin. ²¹ Ne nligaa guielnëdoxa. Wlal ne biaan guidzliu haxta lo nadze, gard gan miech tib guielnëdox sca, ni gandragaa zhow ted ga. ²² Telne csaan Dios nroob dze gac guielnë co, ni stib miech rii guiaandraa; per na por grë zha ne bzooblo me sëeb xnëz me, gdeete me diidz gaca nroob dze.

²³ Zigne rne naa ga, len dze ne scataa gan miech grë dil co, zha ne gnë lo to: “Golte nu ganle, lëe Men ne nole cxeel Dios ga blanso nu”, gnëgaa zho: “Goltsie nec ganle, laa me bdziñ ga”, gliladzde tow. ²⁴ Sac zrieequia zha ne yquidie guiab zho zha nac men co, zrieequia zha ne guiab xtiidz Dios ziadteed zho lo miech, zun zho grë milagr nroob, parne yquidie zho miech, haxta zha ne nole xnëz Dios, zguib zho dien zha gdeeda diidz yquidie zho zho. ²⁵ ¡Nsin sca golso! Benque laa naa nilew lo to. ²⁶ Nligaa zha ne gnë lo to laa men ne pxeel Dios ga blansole, gliladzde tow. Nenda cxeel zho to tib dan zit, gnë zho: “Goltsie ganle laa me no ga”, gnëgaa zho pa tib len yu ne no me, ni tib xtiidz zho gliladzde to. ²⁷ Sac zeen gal dze ne guiaad me stib, gacda ncuaan ngeets zhliaan, grëse miech gan me. Zig tel guiab tib belye nroob ne glu zhan gbaa, desde nëz ne rlan ngbidz haxta nëz ne rzëeb ngbidz, ¿niacxe gand grëse miecha? ²⁸ Zlupaa zeene laa me guiaad; nanle to ganle zaatne nix ma gut, ga rcaalsa pech.

Ziaad Jesús stib

(Mr. 13:24-37; Lc. 12:41-48; 17:26-30, 34-36; 21:25-33)

²⁹ 'Zeene lozhse gan miech grë guielñëdox co, laa lo ngbidz ycow, gziinidraa mëë. Grë mel ne ndziib gbaa, laa ma gliaal; grëraa ncuaane no gbaa, masaque nëzrii nëzrec gaca. ³⁰ Horco zlu ganle zeene laa Mgui ne pxeel Dios ga, ziad-zëëb lo xcow con grë guielndzon, con grë poder ne rap me, grëse miech mban gac zho, zoon zho gan zho me. ³¹ Grë xanj Dios, hor co laa Dios cxeel zho tsiecuedz zho zhitrompet zho parne ycaalsa grëse zha ne ngab xnëz me, tel pa lotaa lo guidzliu no zho.

³² 'Golzoob cuidad zha nac yag guigw. Led nanle to ganle, zeene laa grë zhicwa racnieen, ni rsilo rdzib zhiblaga, gase rlu ne laa mëë nëëg ziaadgaxle. ³³ Scaque nagon zeene gan to laa grë minë rne naa lo to nu rsilo noyac, dzigo nanle to laa dze ne guiaad men co ziaadgaxle. ³⁴ Gneli naa lo to ganle, nzian miech ne mban niina bii zan zho zeene laa grë ncuaan co csilo gac; sac ible ncuaane gaca. ³⁵ Zdzin dze ne nitlo gbaa, nitlo guidzliu, sangue minë rne naa lo to nu, nitloda; ible laaw none gac.

³⁶ 'Lëëraasi choot nand dien pa dzew, dien pa horgaaw, per ni grë anjl ne no gbaa, per ni naa nanda, loxaque Pxozse naa nana.

³⁷⁻³⁹ 'Nanle to ganle zha bzhaac miech len dze ne wban Noé, ib bliladzd zho xtiidz me. Guxt no zho lo zhilni zho, zha ne notsieelnia, zha ne nobediingaa xpëed, laa dze bdzin laa Noé bzëëb len barcw; tibaque zeene biala zho biini laa guiedox co nonitlole zho. Scadaa nagon sac grë miech nad

rii, tibaque zeene tsa zho biini laa Mgui ne pxeel Dios ga ziaadle. ⁴⁰ Horco zaatne quia chop mgui lo dziin dan; tib zho tsienal zhits me, stib zho guiaan. ⁴¹ Zaatne quiayot chop wnaa, tib zho tsienal zhits me, stib zho guiaan.

⁴² 'iNsin sca golso, sac gon nande to dien pa horpaa guiaad me, benque laa vis racle lo to! ⁴³ Golgan ganle, tel niaca mine gacnan miech laa ngbaan tsieban lidz zho guieel, per nand zho dien pa horpaaw; iniacxe zaaguies zho? Led sobna zho leë, nsin nsin so zho. ⁴⁴ Scaque to nagon, none nsin so to, sac gon lega naclew zeen gan to laa me ziaadle.

⁴⁵ 'Golgan ganle, masaque laa to gac nagon zig tib ngundziin ne riaannie ro lidz men ne rquia zho xtsiin.

'Ngundziin ne ndzinli, zeene laa men ne quia zho xtsiin ga grieë, ine niowse guiaan zho guiaannie zho grëraa zha ne no lidz me. ⁴⁶ Zha ne sca gun, jwen tsie zho, sac zeene gbire me gan me scataa noxco zho dziin ne pso me zho, zianziuu zho lo me ⁴⁷ haxta so me zho, zha yquiaanap grëse ncuaane rap me!

⁴⁸ 'Tel ngundziin yozhgaaw, mine tsienie guic zho guiab zho gbireniobd men ne quia zho xtsiin ga, ⁴⁹ csilo zho csacsi zho grëraa zha ne nac ngundziin, csilo zho ctsieelsa zho grë ngonziu tso zho loxaque gzudz zho, loxaque gowcho zho, ⁵⁰ tibaque zeene gan zho laa me bdzinle. ⁵¹ Zha ne sca gun, per peraa dien gun me, ib tedsod nroob caxtigw ne cteed me zho, sonëz me zho guey zho zaatne no grëraa zha ne rond diidz, ga tso zho grë zho zha co goonnë zho, haxta gow lay zho lo guielnedox ne ted zho.

25

Zha bzhaac tsii wnaa nguieg

¹ Blozh ga rëbchaa Jesús lo zho:

—Par sëëb miech zaatne rnabey Dios, masaque naca zig rzëëb miech tib lo lni zaatne noyac tib guiełtsieel.

’Tsii wnaa nguieg name, brieë zho ziexinëz zho mgui ne ctsieelnia, tib tib zho bise zho psin win ne rec nceit ne rziini. ²⁻⁴ Gaay zho goc ligier pcodzëë zho zhipsin zho nceit, ni zhaaque bi zho zniipa; laa zgaay zho gocnroladz, zigne bzhense zho psin co scase bi zhow, bid zho nceit ne niodzëraaw.

⁵ ’Goc pa hora rio zhimcaalo zho, ni rdziñdaque mgui ne ziexinëz zho ga, tibaque zeen laa zho pquia mcaal. ⁶ Gol grol guieela, zeen laa vis rac, laa mgui co ziaadle, zha ne ziexinëz me ga, zac greeë zho tsiedzieel zho me. ⁷ Lëëlēd brieë mcaallo gza wnaa nguieg co, psilo zho nozhix-cuaa zho zhipsin zho. ⁸ Zeene gon gza zha nroladz co ygaadraa zhinceit zho, dzigo bnab zho lo zgaay zha co, gdeed zho niip nceit yquiin zho, sac laa zhipsin zho noyuule. ⁹ Pquiab zho rëb zho: “Grieeloda, sac miñe yquiinse zhipsin no ziaadnie no. Mazd gołtsie zaatne rto zhow, ga gołtsiexiw.” ¹⁰ Per lo lal ne ziexi zho nceit, laa mgui co bdziñ. Zeene wbire zho, laa ro yu nioogle, loxaque gza zha ne nsinle zo ga, zha cose bzëëb len yu. ¹¹ Dzigo psilo zho, rcaan nia zho ro yu, rbedz zho mgui co cxal me ro yu sëëb zho. ¹² Per bdeete me diidz nzëëb zho, rëb me: “Runbeyd naa to gon, nand naa dieñ cho nac to.”

13 'iNsin sca go_lso! —rëb Jesús—. Sac go_n nan_de to pa dzepaa, pa horpagaa gbiire guiaad Mgui ne pxeel Dios.

Zha ne biaannie dimi

14 'Mgui ne pxeel Dios ga, ziaad gac me zig tib men ne no griee tsie tib viaj zit.

'Tib men name no griee me tsie me tib guiedz zit, dzigo bredz me zha ne run dziin lo me, bdeed me palalga xtimi me lo zho gundziin zhow len dze ne guiend me ga. 15 Tib zho pcaania gaay mil pes plat, tib zho chop mila, stib zho pcaania tib mila. Tib tib zho, bdeedse me mine rgobey me grieelo zho gundziin zho, dzigo laa me brieelaa me zie.

16 'Zha ne biaannie gaay mil pes plat co, güey zho bloonon zhow, beena gan zgaay mila. 17 Zha ne biaannie chop mila, ye zho güey zho bloonon zho dimi co, scaque beena gan schop mila. 18 Laa zha ne pcaania tib mila ga, lel güey zho güeyteen zho tib guieer güeyloliu zhow.

19 'Goc bla iza laa men co bdziin, dzigo bredz me zho tib tib zho, tsie zho gzodiidz zho dien yo dimi ne biaannie zho ga.

20 'Bdziin zha ne pcaania gaay mil pes plat co, bdziinnie zho xtimi me, rëb zho: “Laa xtimi luu nu gon, lëë gaay mil pes ne psan luu lo naa nu, laa zgaay mil min rii nac mine bdziniaaw.” 21 Rley me rëb me lo zho: “iZha squi nagon racladz naa! Rley naa ran naa squitaa ndzinli luu, squitaa nguzobdiidz luu; sac gon lo palalse dimi ne psan naa lo luu ga, bioxco luu zaacse bendziin luuw. Nana gon, nroobraa mine gnedz naa gundziin luu. iNa bded, zeena yгаа luu grë guiebley ne quiayac nu!”

²² 'Blozh ga, bdzi_naque zha ne bia_annie chop mila ga, ye zho laa zho bdzi_nnie xtimi me, rëb zho: "Laa xtimi luu nu gon, lëë chop mil pes ne psan luu lo naa nu, laa schop mil mi_n rii nac mi_ne bdziniaaw." ²³ Pquiab me rëb me: "iSquiw nagon! Rley naa ran naa squitaa ndzinli luu, squitaa nguzobdiidz luu lo naa; sac gon lo palalse dimi ne psan naa lo luu ga, bioxco luu zaacse bendziin luuw. Nana gon, nroobraa mi_ne gnedz naa gundziin luu. iNa bded, zeena yгаа luu grë guielbley ne quiayac nu!"

²⁴ 'Zeene bdzi_ntaa zha ne bia_annie tib mila ga, rëb zho lo me: "Nli bendziind naa xtimi luu, sac nanle naa zha nac luu, niicle paraa niundziin naaw, grëse mi_ne niuna gan lo luu niaana; ²⁵ gane mazd bialoliu naaw. Tib mil naca bneedz luuw, ledaaw nu." ²⁶ Blëë guic me, rëb me lo zho: "iBiche nu, paat rquiind naa miech yozh, miech nroladz ne squi nac! Conque nanle luu sca nac naa, ²⁷ ipex nac dzigo waa bioxcod luu maase mbediin luu dimi qui, ndziniaaw palal ncaania naaw niina?" ²⁸ Dzigo rëbchaa me lo zha ne ndxie ga: "Niinagazh golcob tib mil pes qui lo zha qui, goldeeda lo zha ne ziaadnie tsiw i. ²⁹ Sac zha ne rioxco rundziin ncuaane rcaania zho, zacnroobraa ncuaane yquianie zho. Laa zha ne squi nac, haxta mi_ne pcaaniale zho, zdiooba lo zho. ³⁰ Golxen zha yozh qui, goltsiesan zho lo ncow nëz ley. Ga gan zho guielnedox ne tsieguial zho, ga goon zho haxta gow lay zho."

Zha gun Jesús guielwxtis

³¹ Blozhse bzodiidz Jesús cuent co lo zho, rëbchaa me:

—Naa ne nac naa Mgui ne pxeel Dios, zeen gal dze ne laa naa guial tib, zialnie naa grë xanj naa, zlu grëtaa guielndzon ne rap naa, laa naa sob lo xcan ne raguial naa soob naa. ³² Grëse miech ne ndxie dibdoose lo guidzliu, hor co laa zho gacredz lo naa, laa naa cueextso zho zig rbeextso baxtor chiv lad xpëcwxiiil zho. ³³ Zha ne no xnëz naa, zha co gdziñ naa cue naa nëz derech, laa zha ne nod xnëz naa, cue nëz revés.

³⁴ 'Lozhse ga, naa ne nac naa meñ ne rnabey, hor co laa naa cuedz zha ne no xnëz naa, guiep naa lo zho: “Goltë grëse to, to ne nac to zha ne nziuu lo Pxoz naa. Golted zeena ycaania to zaatne cuëz to, ible par to bzaa mew desde zeene bzaa me guidzliu. ³⁵ Sac zeene pcaabedz naa, bneedz to ncuaane dow naa; zeene bnab zhis naa, bneedz to ncuaane go naa; zeene bial naa ladz to, bneedz to lidz to blëz naa; ³⁶ zeene gon to guien d xab naa, bgacwxab to naa; zeene bzhacnë naa, zeene bio naa ladzguiib, biaad to biaadgan to naa.” ³⁷⁻³⁹ See zdoo zho gnë zho: “¿Per pa hor bneedz no ncuaane doow luu, ncuaane go luu, pa hor bneedz no zaatne blëz luu, pa horgaa bneedz no lar ne gotxab luu, ib bdzion d no nzhaacnë luu, bdzion d no niogaa luu ladzguiib?”

⁴⁰ 'Dzigo guiep naa lo zho: “Gzobtaa hor ne gon been to xyudar zha ne nacgrë to, güeygan to zho, pcaaniagaa to zho, niicle zha ne bzoob miech peet nonda, rrieequia xyudar naa ga been to, rrieequia naa ga biaadgan to.”

41 'Laa zha ne ndxie nēz revés, hor co laa naa gzonēz zho, guiep naa lo zho: “¡Golbiche lo naa nu, miech ndziibdee! ¡Golsē lo guidox ne rieguiāl to, zaatne no guey mendox grē xanj! ma! 42 Sac gon, bio dze pcaabedz naa ni bneedzde to ncuaane niow naa; bnaab zhis naa, ni bneedzde to pe nie naa. 43 Bial naa ladz to, ni bneedzde to zaatne mbēz naa; gon to guiend xab naa, ni ni tib lē lar bneedzde to niacw naa. Bio naa ladzguiib, bzhacnē naa, ni pe liaadz to niaadgan to naa.”

44 'Squiab zho gnē zho lo naa: “Per pa hor bdzion no luu rcaabedz luu, rnabгаа zhis luu; pa hor bdzion no guiend pa cuēz luu, guiend lar ne gacw luu; pa horgaa bdzion no no luu ladzguiib, nixгаа luu rzacnē luu.”

45 'Dzigo guiep naa lo zho: “Grēse vuelt ne bzoliaadz to niun to xyudar zha ne no xnēz naa, bzoliaadz to niegan to zho niicle zha ne mazdraa wina, rrieequia naa ga sca been to.”

46 'Horco grēse zha co laa zho guey lo guidox ne gdziñdraa dze grieē zho; laa zha ne bioxco wban zigne rnabey naa, grēse zho laa zho yгаа tib guielmban ndzon ne gdziñdraa dze lozh.

26

*Bnediidz zho dien zha gnaaz zho Jesús
(Mr. 14:1-2; Lc. 22:1-2; Jn. 11:45-53)*

1 Zeene blozh sca bnee Jesús lo grē miech co, dzigo rēbchaа me lo xpēēdscuel me:

2 —Nanle to ganle schopaque ngbidz, laa lni Pascw csilo. Naa ne nac naa Mgui ne pxeel Dios, lo lni co gon gnaaz miech rii naa, tsielo zho naa ladznia zha ne yquiaа naa lo cruz.

³ Grë zha ne nac pxoz ne rnabey, grë maistr ley ni grë zha ne nac meñ non lo meñ guiedz Israel, lëëtaque hor co laa zho ndxie lidz Caifás, meñ ne nac pxoz nroob. ⁴ Laa zho ndxie ga, nonediidz zho dien zha grieelo gnaaz zho Jesús, gut zho me, per tib mod ne grieelod glisqui meñ guiedza. ⁵ Rnee zho: “Lëëraasi choot gnabeyd ygaa me merpaa dze lni, zeeña gacntseebd meñguiedz.”

*Pchoob tib wnaa nceit nex guic Jesús
(Mr. 14:3-9; Jn. 12:1-8)*

⁶ Betain ga no tib meñ ne biac lo guiedz lepr, lë Simón. Lëëtaaque no Jesús lidz meñ co, ⁷ zeene bdzin tib wnaa bdzinne tiblo nceit nex, nosew tib len ncuaan win niaa niapse quie rbebni, tiblo nceit niazha. Squi zob Jesús lo mezh, güey wnaa co güeychoob me nceit co guic Jesús. ⁸ Zeene gon xpëedscuel Jesús sca been wnaa co, blëe zho, rnee zho:

—¡Pa rieguiala squi pxin zhlë wnaa qui nceit qui! ⁹ Tel niaca mine ndow, pe zhidaa dimi ne nguizh zhow, nquiinpaa dimi co ngaaza lo grë zha ne guiend pe yquiin.

¹⁰ Gon Jesús sca rac zho, dzigo rëbchaa me lo zho:

—¿Pe nacne rlëe to lo wnaa qui? Golsaan me. Par naa nroob non mine been me i. ¹¹ Tel nli lëe racladz to gun to xyudar zha ne guiend pe yquiin, zac ygad to lo zho stib dze, sac tibaque ran to zho; sangue naa zhile laa naa gbiche lo to. ¹² Led pxin zhlëd wnaa rii zhinceit me, sac gon rriequia laa me bzhixcuaale xcuerp naa nu gal dze ne ygueetsa. ¹³ Gneli naa lo to ganle, dipse lo

guidzliu zaatne cseedtaa miech Xtiidz Dios, ible soladz zho wnaa rii, seet zho miñe been me nu.

Güeyto Judas Jesús

(Mr. 14:10-11; Lc. 22:3-6)

¹⁴ Lo gza tsiipchop zha ne nac xpëëdscuel Jesús ga, brieë zha ne lë Judas Iscariot güeyzodiidznie Judas grë zha ne nac pxoz ne rnabey, ¹⁵ rëb Judas lo zho:

—¿Palal quizh to naa telne gun naa Jesús ntregar lo to?

Dzigo biaan zho diidz quizh zho Judas galptsii pes plat. ¹⁶ Nacne psilo Judas noguib Judas dien zha gdeeda diidz csañ Judas me ladznia zho.

Dowxtseenie Jesús xpëëdscuel me

(Mr. 14:12-25; Lc. 22:7-23; Jn. 13:21-30; 1Co. 11:23-26)

¹⁷ Mer dze ne rsilo lni Pascwa, len dze ne sca row zho quietxtil ne riotsd ncobi ga, bnabdiidz xpëëdscuel Jesús lo me dien pa lo racladz me tsiegunlo zho ncuaañe gowxtseenie me zho wdze co. ¹⁸ Dzigo rëbchaa me lo zho:

—Nanle to ganle cho lidz zrieelo gdziñ ne. Goltsie Jerusalén golguiab lo zho: “Znu në xmaistr no: Gneedz luu lidz luu me dioow no xtsee Pascw rii. Niinataa laa xtse me bdziñ, gane racladz me lidz luu nu diowxtsee no nawdze grë no me.”

¹⁹ Dzigo laa zho zie. Güey zho zaatne pxeel me zho ga, ga beenlo zho xtsee co.

²⁰⁻²¹ Wdze co, laa me no xtsee grë me zho, zeene bnee me lo zho rëb me:

—Gacnan to ganle, lëëque tib to gon tsielo naa ladznia zha ne gnaaz naa nawdze rii.

²² Zeene bin zho sca rëb me, mbanse rac zho, dzigo psilo zho tibga tibga zho rnabdiidz lo me, rnee zho:

—Bnë dien, ¿cho gun min co? ¿Pe naaw?

²³ Pquiab me rëb me lo zho:

—Zha ne gan to csëeb xcuun len xquien naa, lëe zho ga. ²⁴ Naa ne nac naa Mgui ne pxeel Dios, niina laa miech gut naa zigne raquietsew lo Xtiidz Dios; per, ¿probsaxe zha ne tsielo naa ladznia zho! ¿Mazd wen nie zho, ib niacd zho miech lo guidzliu!

²⁵ Yeze Judas rnabdiidz lo me rnee Judas:

—Maestro, ¿pe goon naaw ye?

Rëbcha me lo Judas:

—Luuw gon Judas, luu güeyto naa.

²⁶ Laa zho noyow, zeene bzhen Jesús tib guietx-til, bdeed me xquizh lo Dios, blozh ga beengrol mew, dzigo bdiiz mew lo zho, ni rëb me:

—Golquiina, lëe xcuerp naa i gon.

²⁷ Ni bzhen me tib cop nroob vin, bdeed me xquizh lo Dios, blozhse bdeed me xquizh, dzigo pteed me cop co lo zho grëse zho, rëb me:

—Golguie vin qui, ²⁸ sac lëe xchen naa i, mine no gzhiee par guiaanmbe grë miech lo xtol zho sëeb zho xnëz Pxoza naa, sac lëe stib mod cub nu psan me parne sëeb miech xnëz me. ²⁹ Lëe lultm vult nu guie naa vin rii, sac zhaale stib vin cub ne guie naa gal dze ne guienie naa tow zaatne rnabey Pxoza naa.

Dzigo psilo me biilnie me Dios gza me zho.

Bzeet Jesús zha gun Pedr

(Mr. 14:26-31; Lc. 22:31-34; Jn. 13:36-38)

³⁰ Blozhse biilnie zho Dios, laa me brie ga gza me zho, laa me zienie zho nëz Gui Oliv.

31 —Ible saan to naa nawdze rii —rëb me lo zho—, sac scale ziaad lo Xtiidz Dios zaatne rnee: “Zdeed Dios diidz csiwee zho baxtor, lozh ga nëzrii nëzrec gliaal mëcwxil.” 32 Mincopaa nagon gun miech naa, per zeene laa naa grieeban glole naa ga Galilé, ga cuëz naa to.

33 Dzigo rëbchaa Pedr lo me:

—Niicle telne saan grë zha qui luu, sañgue naa gon csaand naa luu.

34 Pquiab me rëb me lo Pedr:

—Gneli naa lo luu ganle, guieel riigazh, gardle ycuedz gall, laa luu csale tson vuilt guiab luu runbeyd luu naa.

35 Per tibaque nac xtiidz Pedr, rnee Pedr lo me:

—Niicle tel zaatne guet luu guet naa, per gunscad naa. ¿Pe nacne guiep naa runbeyd naa luu?

Scaque rnee grëraa xpëëdscuel me.

Bzodiidznie Jesús Pxož me Getsemaní
(Mr. 14:32-42; Lc. 22:39-46)

36 Zeene bdziñnie Jesús zho zaatne lë Getsemaní, dzigo rëbchaa me lo zho:

—Nuse nagon goľsob, laa naa ga gazodiidznie naa Pxož naa.

37 Horco psilo mban rac zdoo me, riabguieľnë me, dzigo bredz me Pedr, ni grop xingan Zebedé, bzënie me zho palal 38 dzigo rëbchaa me lo zho:

—Mban rac zdoo naa, zootle zig zet naa lo guieľnë rii. Nuse nagon goľguiaan, per goľsobna.

39 Bzë me spalal, dzigo pquitsgzhíb me haxta bdziñ lo me lo liu; psilo me bnab me lo Dios, rëb me:

—Papá, laa naa rnab lo luu, telne zala zdoo luu, bzhiguielpsilaa naa lo grë guielnë rii. Min rii rnab naa lo luu, per telne grieeloda, miñe gnëtaa luu, miñ co gac.

⁴⁰ Zeene guso me, güey me zaatne biaan gza tson zha co, gon me laa zho nixguesle; dzigo rëbchaa me lo Pedr:

—¿Pe ni palal blëbde to nzobna to? ⁴¹ Golsobna, golnab lo Dios zeena yquild mendox to. Niicle ne squi lëbdraa xcuerp to sobna to, per golnab lo Dios, sac gon min co nac miñe racladz zhiespíritu to.

⁴² Dzigo güey me stib, güeyzodiidznie me Dios; scaque miñe bnab me glo miñcoque bnab me.

⁴³ Zeene wbiire me bdzin me lo zho, gon me laa zho nixgueslaque, sac lëbdraa zho mcaal.

⁴⁴ Wbiire güey me güeynab me lo Dios, scaque miñcoque bnab me. ⁴⁵ Zeene laa me wbiretaa bion vuelt co, rëbchaa me lo zho:

—Lëew nagon, zacle na gagues to, zacle gdziladz to. Naa ne nac naa Mgui ne pxeel Dios, laa hor nagon bdzin zeene laa grë miech ntseeb rii guiadnaaz naa. ⁴⁶ Goltieso, zeena zio ne; sac gon laa zha ne glu naa lo zho ziaadle nu.

Bnaaz zho Jesús

(Mr. 14:43-50; Lc. 22:47-53; Jn. 18:2-11)

⁴⁷ Laa Jesús bii quianeeque, zeene laa Judas (tib zha ne nac xpëëdsuel me) bdzin, bdzinne Judas tib dzoon zha ne pxeel grë pxoz ne rnabey, ni grë zha ne nac zha non lo men guiedz Israel. No zho nzhen spad, nogaa zho nzhen yag. ⁴⁸ Biaanniele Judas zho diidz zha glu Judas cho nac Jesús, rëb Judas lo zho zha ne gan zho gow Judas bzhid cuas,

lëe me ga, ligier so zho gnaaz zho me. ⁴⁹ Zigne bdziñ Judas pquiaabdiuzh Judas me, blozhse ga wbig Judas dow Judas bzhid cuas me. ⁵⁰ Dzigo rëbchaa me lo Judas:

—Judas, ¿pe ziaadgun luu nu?

Lëëlëd wbig be grë zha co, bzhen zho me. ⁵¹ Horco biet tib zha ne rzënie me ga, bdoz zho zhispad zho psilaa zho tib niaw, bliengaa zho diag tib zha ne rquia xtsiñ meñ ne nac pxoz nroob.

⁵² Dzigo rëb Jesús lo zha ne pquiaaw ga:

—Blootsow zhispad luu, ib gundraa luu squi cob luuw. Sac gon zha ne rdil con spad, noxtseeb ne low guet zho. ⁵³ ¿Niacxe nañ to na grieelod gnab naa lo Pxoza naa niina cxeel me tsiipchop partid xanj l me guiaadla ne nu? ⁵⁴ Per telne sca gun naa, ¿zha dzigo gac mine zhobnee lo Xtidz Dios, zaatne raquiet mine noyac nu?

⁵⁵ Dzigo rëbchaa me lo grë zha ne bdziñ ga:

—¿Pe nacne squitaa rac to? ¿Niacxe naa cho zha ntseeb, ne squitaa nzhen to spad, nzhen to yag ziadnaaz to naa? Blactaa name gon to noseed naa miech len yadoo, ¿pe nacne bnaazde to naa ga? ⁵⁶ Per ible laa grë ncuaan rii gon noyac, zeena griequia grë mine bzeet grë zha ne biadteed xti-idz Dios lo miech padzeela.

Horco grëse zha ne nac xpëëdsuel me laa zho bzhoon, tipse me psañ zho ga.

Güeynie zho Jesús lo zhiwxtis zha Israel

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Ga brieenie zho Jesús bdziñnie zho me lidz Caifás, meñ ne nac pxoz nroob. Grë zha ne rnabey

lo menguiedz Israel, laa zho ndxiele ga. ⁵⁸ Ye Pedr maase zit zit nal Pedr laa Pedr bdzin xley men co. Bdzin Pedr güeysobga Pedr lo gre zha ne ndxienap, quiambëz Pedr dien zha gun zho Jesús.

⁵⁹ Gre pxoz ne rnabey, gre zha ne nac zha non lo menguiedz, grese zha ne nac wxtis, laa zho ndxie nëz len yu co, quiaguib zho zha ne gzhixcuaa maase diidzguizh ycaadz zho Jesús, parne gdeeda diidz gnab zho guet me. ⁶⁰ Ndal zha ne sca been, per brieequiad xtiidz zho, sac zhaase zhaase rnee zho. Tibaque zeene guso chop zho, ⁶¹ rëb zho:

—Bdzion no gon rnee me laa me ctixche yadoo ne zob lad guiedz nu, zaatne riodziann ne Dios, lozh ga tsonaque ngbidz gzaalo me siba.

⁶² Dzigo hor co bzoli men ne nac pxoz nroob, rëb me lo Jesús:

—¿Pe nacne rquiabd luu? ¿Pe nli sca rnee luu, te nlida ye?

⁶³ Gon pxoz nroob co rquiabdaque Jesús, rëbchaa me:

—Zig zob Dios mban ne no gbaa, laa naa rnab lo luu bneeli lo no dien cho nac luu. Bnë tell nli Xpëed Dios nac luu, Men ne zëble diidz ga cxeell me.

⁶⁴ Dzigo pquiab Jesús rëb me:

—Scaw gon, naa nac men co. Naa ne nac naa Mgui ne pxeel Dios, bii zan to ganle zeene laa naa zoob cue Dios nëz derech, ni zeene laa naa guieet gbaa zialzëb naa lo xcow.

⁶⁵ Horco ptsiez pxoz nroob co xab me, sac blëe me bin me sca rëb Jesús.

—¿Pe mazdraa textigw ne racladz ne? —rëb me—. Laa to binle ganle zha rzëtaa xtiidz me

noguitnie me Dios. ⁶⁶ Nana waa, ¿pe gnë to zha dziuun ne me?

Pquiab be zho rëb zho:

—¡Ib rieguial guet me!

⁶⁷ Dzigo hor co psilo zho nosacsi zho me. Zha ne rtsuc lo me, zha ne rdeed puñet me, nogaa zho rgap lo me, ⁶⁸ rlozh ga rzhidznie zho me rnee zho:

—Luu ne nac luu men ne pxeel Dios, ¿bnë dien cho ga bdiñ luu?

Rëb Pedr runbeyd Pedr Jesús

(Mr. 14:66-72; Lc. 22:56-62; Jn. 18:15-18, 25-27)

⁶⁹ Horco laa Pedr bii zob nëz ley. Ga zob Pedr, güey tib ndzooop ne quia dziin lidz men rnabey co; rëb ndzooop lo Pedr:

—¿Ye luu lëë rzënie Jesús, men Galilé ne bdziñnie zho i?

⁷⁰ Per bneelid Pedr. Squi zob grë zha co, rëb Pedr:

—Riend naa dien cho men rnee luu.

⁷¹ Laa Pedr ziele nëz ro puert ne quia ro nëz, zeene gon stib ndzooop ne rquia dziin ga Pedr, rëb ndzooop lo zha ne ndxie ga:

—Ye mgui qui gon nacgrë men Nazaret ne bdziñnie zho i.

⁷² Scaque bneelid Pedr, haxta rzeet Pedr Dios rëb Pedr runbeyd Pedr me. ⁷³ Wdzeepaaw, rëb zha ne ndxie ga lo Pedr:

—Ne nligaa ye luu rzënie men ne bdziñ i. ¡Rlupaa name zig rnee zha nëz Galilé rnee luu!

⁷⁴ Dzigo psilo Pedr rzeet Pedr Dios rnee Pedr runbeyd Pedr Jesús, haxta rnee Pedr:

—Dios zobwi ganle, telne led diidzlid nu rne naa, maase cuibdee naa.

Loxaque blozh sca brieë ro Pedr zeene laa tib gall pcuedz. ⁷⁵ Horco psoladz Pedr xtiidz Jesús zeene rëb me lo Pedr: “Gardle ycuedz gall, tsonle vuelt rëb luu runbeyd luu naa.” Dzigo mbanse rac Pedr. Brieë Pedr ga, psilo Pedr biin Pedr guieinë co.

27

¹ Ziadyiinile liuw, wbiire pcaalsa grë pxoz rnabey, grë zha non lo menquiedz, bnediidz zho dien zha gnabey zho guet Jesús. ² Blozhse bzodiidz zho, dzigo laa zho bzobdoo me blee zho me ga ziesan zho me lo Pilat, men ne nac gobernador.

Gut Judas

(Mr. 15:1; Lc. 23:1-2; Jn. 18:28-32)

³ Laa Judas Iscariot zha ne pto Jesús ga, zeene bin Judas laa zho rnab guet me, lëëlëd güey Judas lo grë pxoz rnabey co, lo grë zha non lo menquiedz ga, zietsire Judas dimi ne bdiizh zho Judas ga. Mban rac Judas, ⁴ bdzin Judas rëb Judas lo zho:

—Naraa rien naa lëda nu ben naa. ¡Tib dol nrooble nu, znu bialto naa tib men ne peet xtold!

Pquiab zho rëb zho:

—¡Minçotaa gon ndiond no! ¡Xcuentzhe luu ga!

⁵ Horco pchel Judas dimi co len yadoo. Lo guieinë co brieë Judas ga güey Judas lëëque Judas pxiiyan Judas.

⁶ Grë zha ne nac pxoz rnabey ga, güey zho ptop zho dimi co. Per blozh ga, rien zho dien zha gun zhow.

—¿Zha dziuun ne dimi rii? —rëb zho—. Telne guiaana yadoo, per rdzieelda, sac gon xchen tib miech bdzëew.

⁷ Dzigò bzdòidz zho dien zha gaca, nacne mazd pquiin zhow bzhii zho tib lè liu, zaatne rdieen yu ne ríaa grè ncuaan psin ne rquiin; parne lo liu co ygueets grè zha zit ne guet Jerusalén. ⁸ Nacne brieelè liu co “Liu ren”, ni sca runbey zhow len dze rii. ⁹⁻¹⁰ Ga brieequia mine bzeet zha ne biadteed xtiidz Dios padzeela, zeene rëb zho: “Galpsii pes plat ne bzhii zha Israel men nziuu co, dimi co bzhii zho tib lè liu, zaatne rdieen yu ne ríaa grè ncuaan psin ne rquiin. Sca në Dios lo naa.”

Bnab zho guet Jesús

(Mr. 15:2-20; Lc. 23:3-5, 13-25; Jn. 18:33-19:16)

¹¹ Bdzinnie zho Jesús lo Pilat, ga bnabdiidz Pilat lo Jesús rëb Pilat:

—Bnè dien, ¿pe nli luu nac zhirey zha Israel?

Pquiab me rëb me:

—Nliw.

¹² Grè zha ne nac pxoz rnabey ga, ni grè zha ne nac zha non lo menguedz, rzadraa ncuaane rquiaqui zho me; per ni tib diidz rtsired me lo zho.

¹³ Dzigò rëbchaa Pilat lo me:

—¿Pe nacne rquiabd luu? ¿Pe ib rond luu grëtaa ncuaane rquiaqui zho luu i?

¹⁴ Bzee zdoo Pilat gon Pilat, ible rquiabd me.

¹⁵ Gzobse iz, zeene ral lni Pascw rnabey Pilat ríaa tib zha ne no ladzguiib, zha ne gnabtaa menguedz laa. ¹⁶ Len dze co no tib zha ntseeb ladzguiib lè Barrabás, zëëb xtiidz zho. ¹⁷ Nacne rëb Pilat lo grè zha ne ndxie ga:

—¿Cho racladz to csilaa naa? ¿Pe silaa naa Barrabás, te silaa naa Jesús ye, men ne nac diidz pxeel Dios lo to?

¹⁸ Sca rëb Pilat sac bien Pilat loxaque porne ndal miech nobig lo Jesús miñ co ne rlëënie zho me, bnabey zho bgaa me.

¹⁹ Laa Pilat zob lo xcan ne run me guielwxtis, zeene bdzin tib mandad rëb lo me:

—Znu nē tseel luu: bzhiguiel me peet gund luu men qui, rlu peet xtold me; sac nieewdze me nroob ptseb mcaal tseel luu.

²⁰ Grë zha rnabey co, bio zho pquiil zho menquiedz gnab zho csilaa Pilat Barrabás, ni gnab zho guet Jesús. ²¹ Zeene wbiire Pilat bnabdiidz Pilat stib, dien chopaa racladz zho laa, grëse zho nguiedz pquiab be zho, rëb zho:

—¡Barrabás psilaa!

²² Dzigo rëbchaa Pilat:

—Men ne waa nac diidz pxeel Dios lo to nu, ¿zha gun naa me?

Pquiab zho rëb zho:

—¡Bnabey yquia me lo cruz!

²³ —¿Per pe nacne yquia men rii lo cruz? —rëb Pilat—. ¡Ni tib dol rapd me!

Biireque zho nguiedz roptsie zho rnab zho yquia me lo cruz. ²⁴ Gonse Pilat rquiaadiagd zho xtiidz me, lel mazdraa rac zho, dzigo bnab me nis, squi ndxie zho bdiib me nia me, rëb me lo zho:

—¡Nanle to nasca, led xtoldraa naa nu ne laa xchen men rii gzhiee, sac nanpaa naa peet falt rapd me!

²⁵ Pquiab be zho rëb zho:

—¡Peet nacd ga! ¡Zhits no grë xpëed no cuib dol co, na no guiotizha!

²⁶ Dzigo bnabey Pilat blaa Barrabás, laa Jesús racse me bnabey me zha ne bdiñ Jesús, blozhse ga

laa me psan̄ Jesús ladznia men̄guiib ne tsiequiaa me lo cruz.

²⁷ Biire grē men̄guiib co bzëëbnie zho me n̄z len̄ yulow, ga pcaalsa grëraa men̄guiib ne nacgrē zho, briñ zho igose me. ²⁸ Blee zho xab me, bgacw zho me tib lar nizhnie nlaan, zig rna lar ne racw grē rey, ²⁹ bzieecw zho bla lē yag guiets, bzoob zhow guic me zig rzob coron guic zha ne nac rey, ni bloo zho tib lē goobgui nia me. Run̄nguzee zho me, rquiitsgzh̄ib zho lo me, rnee zho:

—¡Golwi gan̄le zha ractaa zhirey zha Israel!

³⁰ No zho rtsuc zho lo me, rgob zho goobgui ne no nia me ga, rdeed zhow guic me.

Güeyquiaa zho Jesús lo cruz

(Mr. 15:21-32; Lc. 23:26-43; Jn. 19:17-27)

³¹ Blozhse sca bdziitnie zho me, blee zho lar nizhnie co lad me, bgacw zho me xab me stib, dzigo laa zho brieenie me ga zienie zho me zaatne yquia me lo cruz. ³² N̄z zienie zho me bdzieel zho tib meñ Ciren lē Simón, bnabey zho meñ co bi me zhicruz me.

³³ Zeene bdziñ zho zaatne nac “Gui Beerguic Ngutoo” (Gólgota), ³⁴ ga bdeed zho nziu lo me notsa tiblo guizh nlayag, per zeene pquiaaro mew bien̄ me nziu cow, bn̄ed me nie mew.

³⁵⁻³⁶ Blozhse pquiaa zho me lo cruz, bzhen̄ zho tib xab me pchug zhow biaan̄nie zho tib lēgaw, laa stiba bio zho rif; dzigo laa zho bzob ga, bzobnap zho. ³⁷ Guic zhicruz me, ga pquiaa zho bla lan̄ diidz zaatne rnee: “LĒË JESUS NU, MEN̄ NE NAC ZHIREY ZHA ISRAEL.” Sca pquiaa zho, sac min̄co pquiaqui sca pquiaa zho me lo cruz. ³⁸ Ye chop

ngbaan pquiaagza zho me lo cruz, tibga zhicruz zho bzo tib nēz cho zhicruz me. ³⁹ Grēse miech ne rdedtaa ran zho laa me quia ga, rzhidznie zho me, haxta rdzi zho guic zho ⁴⁰ rnee zho lo me:

—Led rēb luu lēē laa luu ntsil yadoo, ni tsonaque ngbidz nzaalo luu stiba, ¿pe nac dzigo rrieelod luu guieet luu i? Telne nli Xpēēd Dios nac luu, biet lo qui.

⁴¹ Scaque grē pxoz rnabey, grē maistr ley, grē zha farisé ni grē zha ne nac zha non lo menquiedz, rzhidznie zho me, rnee zho:

⁴² —Stib miech scataa beenguiac me, stib miech scataa bla me, ¿pe nac dzigo rrieelod me gla me me? ¿Goon me name nac zhirey ne, quiet me i sca zho; zeeṇa dziuunbey ne meṇ rnabey nac me! ⁴³ ¿Conque tant rnalo me Dios, haxta rnee me Xpēēd Dios nac me, guiaadsilaa Dios me i nazho!

⁴⁴ Ye ngbaan ne quiagza me lo cruz ga, miñcoque rbidzgo zho lo me.

Gut Jesús

(Mr. 15:33-41; Lc. 23:44-49; Jn. 19:28-30)

⁴⁵ Zig groldzew, tibaque zeeṇ goc tib ncow dipse lo guidzliu, haxta las tres bīaa biini stib. ⁴⁶ Horco nguiedz zēēb tsi Jesús, rnee me:

—Elí, Elí. ¿Lama sabactani?

Diidz co nac zig nac ne rnee ne: Luu nac xDios naa, luu nac xDios naa. ¿Pe nacne psaan luu naa?

⁴⁷ Zha ne ndxie ga, zeeṇe bin zho sca rbedz me, no zho rēb Lí, meṇ ne biadteed xtiidz Dios padzeela, meṇ co rbedz me. ⁴⁸ Dzigo rias tib zho güeygadz tib lē zhiil lo nziu bla, bzoob zhow tib guic goobgui pquiaa zhow ro me. ⁴⁹ Laa zla zho rnee:

—Psaan, nu dzian ne dien pe ziaad Lí guiaadlit Lí me i.

⁵⁰ Tibaque zeene pquiaa me stib redz nroob, znuse blozh me.

⁵¹ Horne nolozh me ga, hor co briez nzoli lar nroob ne quia leñ yadoo, groltaa goca; psilo bni tib zhodox, grë quie masaque wbiła, ⁵² nzian ro baan grë zha ne bnalo Dios mazd padzeela bzhial.

⁵³ Zeen goł dze ne brieaban me, ye zho laa zho brieaban, brie zho leñ baa, bzëeb zho lad guiedz; nzian miech ne gon zho.

⁵⁴ Grë menġuiib ne quianap me ga, ni zha ne rnabey lo zho, zeene gon zho bni zho co, ni gon zho grë ncuane goc ga, per nli bdzieb zho.

—iNe nlipagaa —rnee zho—, Xpëed Dios nac men qui!

⁵⁵ Nzianlaa men wnaa, zit zo zho rwi zho. Lëe grë men wnaa co güeynal zhits Jesús, been zho xyudar me dipse leñ dze ne pseed me miech, desde dze ne psilo me nëz Galilé. ⁵⁶ Lad co no Marí Magdal, Marí tsieel Zebedé, ni Marí ne nac xniaa Jacob grop José.

Bgueets Jesús

(Mr. 15:42-47; Lc. 23:50-56; Jn. 19:38-42)

⁵⁷⁻⁵⁸ Zhile sëeb ngbidza, zeene bdziñ tib mġui lë José lo Pilat, bnaab me diidzbey tselit me xcuerp Jesús lo cruz; tib zha ricwa, men guiedz Arimaté nac me, ye me zienal zhiwseed Jesús. Nacne pxeel Pilat diidz lo zha ne quianap Jesús ga, parne siguiel zho glit José me lo cruz.

⁵⁹ Dzigo güey José. Blozhse blit José me lo cruz, laa José neyle tib lë lar cub, pchel José me lar co,

⁶⁰ güeyxob José me tib len̄ baa ne nacchen̄ José ndieen̄ tib cho quie gax ga; tib baa cuba. Blozhse bdzig José tib quie nroob bioog ro baa co, laa José zey. ⁶¹ Laa Marí Magdal bii biaan̄ ga, grop me stib Marí ne nacgrop me ga; zobse zho gax ro baa co.

⁶² Biini liu co, pcaalsa grē pxoz rnabey, grē zho zha farisé, güey zho lo Pilat, ⁶³ rēb zho:

—Gun̄ luu dispensar, laa no ziaadaque lo luu stib. Naraa rsoladz no, len̄ dze ne bii mban̄ men̄ ntseeb ne sca biaadquidie miech ga, rēb me, zeene gac tson̄ ngbidz guet me laa me grieeban. ⁶⁴ Gane ziaad no lo luu, bzhiguiel̄ pxeel̄ zha ne yquiaanap ro baan̄ me haxta gac tson̄ ngbidz co; sac nend tsie zha ne nac xpēēdscuel me tsiebee zho me, lozh ga guiab zho laa me brieeban. Nan̄le luu gan̄le, tel̄ gac min̄ co, cho gnē peraa gzhixcuaa zho.

⁶⁵ Dzigo rēbchaa Pilat lo zho:

—Tel̄ne sca racladz to, laa tib partid men̄guiib ndxie i. Gol̄tsienie zho, gol̄guiab lo zho yquiaanap zhow tel̄ zha racladz to.

⁶⁶ Dzigo laa zho zie zienie zho grē men̄guiib co. Bdziñ zho bloo zho tib bey cho quie ne nioog ro baan̄ Jesús ga, par glu tel̄ cho zha ne tsiegaal̄a, ni biaan̄ grē men̄guiib co yquiaanapa.

28

BRIEEBAN JESUS

(Mr. 16:1-8; Lc. 24:1-12; Jn. 20:1-10)

¹ Zna dze goc dze ne rdziiladz zho lo dziin ga, biini liu, dze ne rsilo zhmal, silgaw zie Marí Magdal grop me stib Marí co zieso zho ro baan̄ Jesús.

² Lëëtaaque hor co bni tib zhodox, lo zho co biet tib xanjł Dios gbaa bđob me quie nroob ne nioog ro baa co, bđiix mew tib lad, bzobga me lada. ³ Masaque rlu me zigne rlu belye, xab mew, nquitsbie rnaw, zig rlu zaatne ndxie guieg. ⁴ Grë menġuiib ne quianap ro baa ga, zeene gon zho anjł co, per nli bđzieb zho, rzhidz zho. Lo dzeb co, pcowgazh zho, grëse zho biab liu. ⁵ Zeene laa grop wnaa co bđziņ, rëbchaa anjł co lo zho:

—Gđziebde to. Nanle naa Jesús men ne pquiaa zho lo cruz ga, men co ziaadguib to. ⁶ Per guiendle me nu, įlaa me brieebanle zigne bneele me ga! Gołwi ganle nu nac zaatne pxob zho me. ⁷ Niinagazh gołtsie gołtsienie diidz lo xpëëdscuel me, gołguiab lo zho laa me brieebanle. Galilé me cuëz me zho, ga gan zho me. Laa to nanlew nasca.

⁸ Lëëłëd brieegrop wnaa co ga, rias zho laa zho zienie diidz lo xpëëdscuel me; lala rdzieb zho, ni lala rley zho. ⁹ Laa zho zie, tibaque zeene gon zho laa Jesús zole lo zho, ine pquiaabdiuzh me zho. Horco wbig zho pquiitsgzhib zho lo me, bdeedz zho ni me. ¹⁰ Dzigo rëbchaa me lo zho:

—Gđziebde to. Gołtsie gołtsienie diidz lo grë zha bets naa, gołguiab lo zho tsie zho Galilé, ga gan zho naa.

¹¹ Horcoraa laa bla zhaguiib ne pquianap ro baan Jesús ga bđziņ lad guiedz. Güey zho lo grë pxoz rnabey, bzodiidz zho zha gon zho bzħial ro baa co. ¹²⁻¹³ Dzigo pcaalsa grë pxoz co grë zho zha ne nac zha non lo menġuiedz, dien zha gun zho. Nacne biaan zho diidz, mazd gdeed zho dimi lo grë menġuiib co, parne gneelid zho, sinque guiab zho, segur xpëëdscuelaque me güeybee me len baa, per

biend zhow sac nixguies zho. Nroob dimi bdeed zho lo grë menguiib co, ¹⁴ rëb zho:

—Peet tsienied guic to, niicle telne gon gobernadora na no guionee lo me, zeena peet gund me to.

¹⁵ Dimi co pcaania zho, dzigo laa zho psilo pxoon diidz co zigne rëbse grë zha co lo zho. Grë zha Israel ne bina leñ dze co, masaque bliladz zho nli sca goca, jni haxta lo nadze sca zienie guic zho!

¹⁶ Zeene bdziñ dze ne gdzieelo Jesús xpëedscuel me nëz Galilé, brieegza tsiptib zha ne bzo gaxpaa lo me ga, güey zho nëz co; bdziñ zho guic gui ne rëble me ga gdzieelo me zho. ¹⁷ Zeene gon zho me pquiitgzhib zho liu.

Lo grë zha ne ndxie ga, no zho rienpaa lëe me ga, nogaa zha ne bii racchop guic. ¹⁸ Dzigo wbig me lo zho, rëb me:

—Laa to gonle nasca naa rnabey. Grëse ncuaane no gbaaw, nogaa guidzliuw, ladznia naa psan Pxoza naaw. ¹⁹ Niina nagon, laa naa rsan diidz lo to: goltsie dipse lo guidzliu, goltsieseed miech gac zho zha ne sëeb xnëz naa, golchoobnis zho, golguiab lo zho lëe min co rnabey Pxoza naa, rnabey naa ne nac Xpëed me, ni rnabeygaa Espíritu Sant.

²⁰ Golseed zho gban zho, grëse mine bnabey naa to gun to. Min co rsan naa diidz lo to gun to; ni gacnan to ganle, ib csaand naa to, gzataa dzew niicle haxta dze ne nitlo guidzliuw, naa gacnie to.

**Diidz ne rdeed guielmban
New Testament in Zapotec, Mixtepec
(MX:zpm:Zapotec, Mixtepec)**

copyright © 1998 Wycliffe Bible Translators, Inc.

Language: Mixtepec Zapotec (Zapotec, Mixtepec)

Translation by: Wycliffe Bible Translators, Inc.

Zapoteco, Mixtepec [zpm], Mexico

Copyright Information

© 1998, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mixtepec

© 1998, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 11 Nov 2022 from source files
dated 29 Jan 2022

5317ca58-7555-5e4c-a420-e1e9210e2df2